

WANTOK

NIUSPEPA BILONG YUMI OL PAPUA NIUGINI STRETI - 27 YIA NAU

28 pes Namba 1,210 Wik i stat long Fonde Septemba 4, 1997 50 toea

INSAIT



• LAIPSTORI
BILONG
PRINSES
DIANA. p10

• Kaumi laik
kotim Oro
gavman.

p2

• Ol bisnis
laikim lo
bilong stapim
pipel long
limlimbur.

p3

Ol Wangela man Filipino save pronia man Hanuabada. Filipino em wangela Sula Bol. Taim em sei long bikolwara. Hanuabada save kilim sich wantaim wangela Duke. Sempela mun bilon Hanuabada i bel na kerim wangela bebi bol. Bebi i kism atrel kala bilong man Duke na gat blakpela skin. Tasol papa i ranawa. Makim na Hanuabada i pamim hat, na lak glemamim man Filipino long kamap papa bilong bebi. Em salim samons na Filipino i kamap long haus kor long Mosbi taun. Mejetret givim olgeta sas pinis na lak wokim olsem. Tasol em askim Filipino. "Yu gat sampela toklok o nogat!" Filipino tok. "Yes your

wokim. Mi laik tok olsem, taim pusi prenim pusi, pusi kamap, taim dog prenim dog, dog kamap, taim kau prenim kau, kau kamap! Tasol hau na, Filipino prenim Hanuabada, na Duke i kamap!" Mejetret i hanim dispela hap pein na paul olgeta. Bilin em tromol ai i go long bebi, na kism ming long tok pisin bilong Filipino. Em dismisim kor na Filipino smail tasol na takov.


Jedason Wilson
Lapwing Draly
Godens
MOSBI

KANAGE

bilong
dispela
wik



Ol Bogenvil ailan lida laikim Trensisenel Gavman stap yet



• Bernard Narokobi.

VERONICA HATUTASI i raitim

ASKIM bilong sampela Bogenvil lida nau em long Haus Palamen i mas skruim taim bilong Bogenvil Trensisenel Gavman (BTG). Dispela i min olsem Oposisen i mas sapotim gavman bilong Prait Minista Bill Skate, na vot wantaim long sapotim bil bilong skruim taim bilong BTG.

Oposisen Lida Bernard Narokobi i bin tokim Wantok las wik olsem ol i no inap sapotim

gavman long mekim dispela senis.


Bikpela o hettok stori bilong *Wantok* long las wik em long taim bilong Bogenvil Trensisenel Gavman (BTG) i sot. Na bai pinis long Janueri 1998.

Dispela i min olsem i gat tripela mun tasol i stap long BTG i kari-maut wok bilong em, aninit long Ogenik Lo bilong kantri. Na Rijonal Memba John Momis bai kamap gavana bilong provins, na fomim nupela provinsal gavman olsem ol arapela insait long kantri.


i go moa long pes 5




• Bill Skate.



• Joseph Watawi.




• Josephine Harepa.



• William Lavabua.



• Agnes Titus.



MUTRUS

MAJOR SPONSA BILONG RAGBI LEAGUE INSAIT LONG PAPUA NIUGINI

GOVERNMENT WARNING: SMOKING IS DANGEROUS TO HEALTH

Plis RIPOT



MOSBI, NCD:

TRIPELA pipel i bin dai na wanpela i kisim bikipela bagarap na i stap nau long haus sik bihainim tupela ka aksiden long Mosdobi las wiken.

Bos bilong ol plis long Nesenel Kapitel Distrik na Sentrel provins Sam Inguba i tok tupela ka i bin bam long 14 mail, rot i go olsem long Sogeri long las Fraide 9 klok nait. Tupela draiva i dai kwiktam. Boskru bilong narapela i kisim bikipela bagarap na em i stap nau long Mosbi jenerel haus sik.

Mista Inguba i tok narapela birua i bin kamap long Waigani Draiv.

Wanpela minibas i ron i go olsem long Boroko Motos na em i bam wantaim wanpela Nissan yutiliti ka we i wok long tanim long Sir John Guise Stadium draiv. Draiva bilong minibas i bin kisim bikipela bagarap long het bilong em. Em bin dai taim ol i karim em i go long haus sik. Plis i mekim ol wok painimaut long dispela birua.

- **PLIS** i holim pasim pinis wanpela ronawe kalabusman long las Fonde bilong gat wantaim em wanpela gan long ka bhain long plis i bin karimaut wanpela sek long Mazda 323 stesen wegon ka. Plis i ronim ka, holim pasim na sasim man long gat wantaim em wanpela poin 22 pistol.

Plis i autim nem bilong man olsem Mako Rarai Raphael. Em i gat 26 krismas na em i bilong ples Erere long Tapiini Distrik insait long Sentrel provins. Plis i bin sasim Raphael long ronawe long lo taim em i stap long kalabus long rong we em bin wokim long kilim dai narapela man.

- **PLIS** long NCD i karim wok painimaut long wanpela stil pasin long las Fonde we faivpela pipel i bin holimap peimasta na sekyuriti gad bilong wanpela gavman dipatmen. Ol stilman i bin wokim holap wantaim wanpela hai pawa raifol na tupepa pistol. Mani ol i stilim em pei bilong ol kesuel wokman. Plis i bilip olsem dispela i bikipela hap mani na ol i go hetim ol wok painimaut long dispela samting.

- **PLIS** i holim pasim na sasim wanpela man Galp long sutim wanpela misis wantaim naip na stilim hanpaus bilong em las wiken. Samting i bin kamap long Stimsips stoa long taun.

Plis i autim nem bilong man olsem Kopi Evan husat i gat 22 keismas na em i bilong ples Evau insait long Galp provins.

Plis i bin holim em taim em i ranawe i go olsem long bris.

Mista Inguba i tok pasin bilong stilim ol ka i kamap bikipela gen long Mosbi Gordons na Boroko plis stesen i holim moa long 20 ka i stap bhain ol i kisim bek long ol stil lain.

LAE, Morobe:

Plis i holim pasim na sasim wanpela manki long stap insait long pasin bilong brukim Butibam klinik long Lae las mun.

Bos bilong ol plis long Lae, Simon Kauba i tok plis i bin holim pasim Sai Adam husat i gat 20 kris-mas bilong stilim wanpela aibokis na ol arapela samting we em i stilim long klinik. Stil man ya i bilong ples Kuli long Salamaua eria insait long Morobe provins.

Mista Kauba i putim strongpela toktok i go long ol pipel insait long ol setelmen bilong noken bagarapim na kisim ol samting bilong gavman.

Minista laik kotim Oro gavman

OL WOK painimaut bilong ol hevi na paul pasin insait long Oro provinsel edministresen i pinis nau na wok bilong statim kot na kotim ol man i redi long kamap.

YAKAM KELO i raitim

Ol lain bilong mekim wok painimaut olsem ol Odiata Jenerel na Nesenel Investigesen Ogenaisesen (NIO) i pasim wok painimaut bilong ol pinis na i go bek long Mosbi long redi tasol long kirapim kot. Ol lain husat i stap bek em ol sampela plisman husat i stap insait long Fraud Skwat.

Minista bilong Provinsel na Lokol Gavman Afeas na memba bilong Ijvitari Simon Kaumi i tokaut olsem planti paul pasin na ol samting i rong nabaut em wok painimaut i kamautim ol pinis. Olsem na ol i redi tasol long kotim ol man husat i stap insait long ol dispela samting.

Mista Kaumi i tok ol sampela samting olsem mani bilong narapela wok i go sua long han bilong narapela wok na i nogat gutpela ripot o risit pepa long soim tru olsem ol dispela mani i go long wok stret o nogat.

Em i tok wok painimaut i kamautim na putim ples klia pinis sampela bilong ol dispela paul na hait pasin.

"Olsem Minista i lukautim ol provins na wok bilong en, mi mas stretim pastaim provins bilong mi na bhain mi ken toktok long ol arapela provins. Nogut banis bilong mi i gat hevi i stap na mi haitim i stap na toktok tasol long arapela provins".

Taim mi pinis long stretim Oro provins, bai mi lukluk gen long stretim wanpela o tupela provins insait long Momase rijon, Mista Kaumi i tok. Em i

no tokaut long nem bilong wanem tupela Momase provins.

Em i tok planti taim ol man-meri i save sutim tok long ol lida long nesenel level olsem ol i paulim samting. Na planti taim yumi lukim ol nesenel lida i sanap long kot long ol kain ripot olsem ol i paulim mani na ol samting. Tasol insait long provins tu, i gat planti paul pasin na hait wok i wok long kamap, em i tok. Olsem na olsem Minista bilong Provinsel na Lokol Gavman Afeas, em bai sekim gut olgeta provins na painimaut long dispela.

Minista amamas long plen bilong Morobe

MOROBEO provins i wanpela provins insait long Momase rijon we Minista bilong Provinsel na Lokol Gavman Afeas, Simon Kaumi i amamas long lukim. Bikos olgeta wok edministresen na ol wok politikis bilong karimaut nupela rifom sistem i stap redi pinis long wok na i wetim tasol mani bilong karimaut wok.

Minista Kaumi i mekim dispela toktok bhain long raun bilong em insait long Momase rijon long las wik long luksave na save gut long wok bilong karimaut rifom sistem i stap long wanem mak nau. Na bikipela astingt-ing em long kamapim pasin poroman na luksave wantaim olgeta gavana na edminstreta bilong wanwan provins.

Mista Kaumi i tokaut aste olsem em i amamas long lukim olgeta provins long Momase rijon i gat sampela kain plen na wok redi i stap pinis long karimaut wok bilong rifom. Tasol bikipela amamas bilong em, em long Morobe provins bikos ol i redim pinis rot bilong dispela sistem bai i wok bhainim na i go daun long distrik level.

"Bikipela samting tasol em Morobe provins i wetim mani bai i kam long opis bilong Fainens Dipatmen long mekim wok bilong em".

Mista Kaumi i tok long luksave bilong em tu long dispela raun, em i laik statim wanpela opis we olgeta provinsel gavana na edminstreta bai

wok klostu wantaim. Em i ting dispela opis o yunit bai mekim isi long olgeta provinsel lida husat i save go long Mosbi long stretim ol hevi bilong provins. Em i tok i no gutpela long ol gavana na em i tok pait na salens long floa bilong palamen long hevi bilong provins. Olsem na ol i mas gat wanpela opis we olgeta gavana i ken kam bung na stretim hevi bilong ol wantaim na kisim ansa na helpim bilong ol i go bek long provins bilong ol wanwan.

I no gutpela long ol provinsel lida i kam long Mosbi na westim mani bilong provins long raun long ol kain kain opis na i no kamapim tru kaikai bilong wokabout bilong ol. Olsem na bai mi kamapim dispela opis insait wantaim Dipatmen bilong Provinsel na Lokol Gavman Afeas long was long dispela eria, Mista Kaumi i tok.

Bai Minista Kaumi i statim gen dispela wankain raun i go long Hailans rijon long neks wik. Bihain long en, bai em i go gen long Niugini Ailan rijon na las long en, bai em i pinisim long Sauten rijon.

Minista Kaumi i tok em i ripot pinis long praim minista Bill Skate long dispela luksave bilong em na em long Septemba 11 long neks wik, bai em i holim wanpela bung wantaim olgeta gavana bilong ol provins long toktok moa long ol wok bilong ol long karimaut wok bilong provinsel na lokol level gavman rifom.

Kot bilong ileksen i stat

NESENEL Kot i statim pinis kot bilong ol kendidet husat i bin lus na i laik salensim gen risal bilong nesenel ileksen egensim ol memba husat i win na kamap memba bilong palamen.

Long dispela wik, kot i stat wantaim stori bilong Sumkar Open long Madang we olpela memba na minista Peter Yama i salensim nau memba, Mathew Gubag long ileksen risal bilong em.

Kot bilong Perry Zeipi long Westen provins tu i stat pinis we em i lus long Riddler Kimave.


Long dispela wik, kot haus i pulap long dispela kot long planti manmeri na sapota bilong ol kendidet na ol sapota bilong ol lain i win.

Nesenel Kot i gat nem bilong 86 memba bilong nesenel palamen long sanap gen long kot na salens wantaim ol kendidet husat i bin lus long ileksen 97. Na 28 memba tasol i no bin kisim wanpela petisen o salens yet long ol arapela kendidet husat i resis long nesenel ileksen wantaim ol.

Ol memba husat bai kot em: Chris Haiweta Galp, Fabian Pok Not Wagi, Puri Ruing Dei, Jack Genia Abau, Gabriel Dusava Yangoru Sausia, Philip Taku Mosbi Not Is, Ledi Carol Kidu Mosbi Saut, Michael Nali Mendi, Kuk Kuli Aglip Saut Wagi, Smith Henry Iyapo Goroka, Philemon Embel Nipa Kutubu, Robert Nagle Baiyer Mul, Andrew Baing Makam, David Basua Kagua Erave, Bill Skate NCD rijin, Sir Mekere Morauta

Mosbi Not Wes, Castan Maibawa Okapa, Bart Philemon Lae, Mathias Karani Lufa, Viviso Seravo Henganofi, George Wan Usino Bundi, Damson Lafana Unggai Bena, Mathew Gubag Sumkar, Baki Reipa Kainantu, Gallus Yambui Wosera Gawi, Anderson Agiru Sauten Hailans rijin, Ginson Saonu Kabwum, Samson Napo Bulolo, Ludger Mondo Sinasina Yongomul, Yauwe Riyong Chuave, Peti Lafanama Isten Hailans rijin, Peter Loise Ambane Simbu rijin, Jacob Wama Madang Open, Ling Stuckey Kavieng, Ganaufu Ron Daulo, Sir Pita Lus Maprik, Masket Ilangio Wapenamanda, Kennedy Wenge Nawae, Bernard Vogae Wes Nu Briten rijin, Peterson Lowa Talasea, Peter Arul kandrian Gloucester, Ebenosi Moyola Kiriwina Goodenough, Ephraem Apelis Namatanai, Michael Ogio Not Bogenvil, Samuel Akotai Sentrel Bogenvil, Tukape Masani Huon Galp, Bia Elali Ajax Goilala, Bernard Molok Bogia, Tommy Tomscoll Midel Ramu, Riddler Kimave Kikori, Moi Awei Kairuku Hiri, John Kamb Kerowagi, Robert Sakias Telefomin, Joseph Wamil Gumini, Sir Tom Koraea Kerema Open, Herowa Agiwa Koroba Lek Kopyago Open, Peter Ipatas Enga Open, Takai Kapi Wabeg, Opis Ipan Papo Laiagap Porgera Open, John Pundari Kompiam Ambum, Yagabo Dibara Rigo Open, Charlie Benjamin Manus Open, Arthur Somare Angoram, Simon Kaumi Ijvitari Open, Sylvanius Siembo Oro na Peter Waiange Kundiawa Open.

Isten Hailens gavana lukluk raun long Bihute haus kalabus



□ Isten Hailans gavana Peti Lafanama i raun lukluk long haus kalabus long Goroka. FOTO: Sape Metta.

NUPELA gavana bilong Isten hailen, Peti Lafanama husat i bin kamap long opis bilong em long Goroka long karim aut ol opisel wok bilong en i bin mekim wanpela lukluk raun long Bihute haus kalabus long Fraide wik i go pinis.

Sape Metta i raitim Bihain long lukluk raun insait long Bihute banis kalabus, gavana Lafanama i tok planti samting insait long banis kalabus i no gutpela.

Em i tok sori long ol woda man na meri bikos sindaun bilong planti long ol i luk olsem ol i sindaun na i stap long viles bilong ol yet. Planti haus bilong ol i bagarap na ol i wokim ol kunai haus na sli long en wantaim famili bilong ol.

Mijsta Lafanama i tok bikos long kondisen bilong sindaun bilong ol woda, morel bilong ol tu i go daun tru.

Long bekim, ol woda long Bihute banis kalabus i tok ol i sanap strong na mekim wok bilong ol tasol gavman i

no luksave long hatwok bilong ol na bringim ol gutpela sevis i go isnait long helpim ol.

Ol woda man na meri i bin givim wanpela petisen i go long gavana Lafanama wantaim 6-pela askim.

Namba wan askim em - hausing (leving kondisen) (2) hausing meintenens (hausing na sampela fasilities) (3) kar (motivesen) (4) yunifom bilong woda na kalabus (5) pei rais na (6) sevis pei.

Mista Lafanama i tok, olsem nupela lida bilong provins em bai lukluk i go insait long ol dispela askim na sapos i gat inap mani long baset bilong Isten hailens neks yia, em bai traim long stretim ol dispela hevi.

Em i tok nau yet em i laik lukluk raun long olgeta institusen, gavman dipatmen na ol pablik severn wokan na meri we em i laik setim ap na establisim gut olgeta wok isnait long provins.

Na sapos em i mekim olsem bai provins i ken lukim sevis i ken kamap na wok i ken go het gut insait long provins.

WANTOK

All departments. Phone: 325 2500 - Fax: 325 2579
P.O. Box 1982, Boroko, NCD, Papua New Guinea.

Published Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and Group Editor in Chief:
Anna Solomon.

Papers distributed by air throughout PNG.

Advertising Manager:
Mike Kanin.

Available by airmail subscription within Papua New Guinea and overseas

Editor of Wantok: Leo Waliwa

Advertising deadlines, Display Bookings and Camera ready copy: Tuesday midday. Classified Advertising: Wednesday 2pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty Ltd. and are set out in full on the reverse side of its official Display Advertising Booking Form.

WANTOK

Bogenvil Gavman mas stap yet

PLANTI manmeri bilong Bogenvil i laikim Bogenvil Trensisenel Gavman i mas stap yet. Gutpela moa, ol tingting bilong politiks na kisim biknem i mas raus na dispela laikim bilong ol manmeri i mas kamap pastaim.

BTG, BIG na BRA i gat gutpela pasin poroman na bung wantaim pinis aninit long wanpela bikpela astingting bilong stretim olgeta hevi bilong Bogenvil na kamapim gutpela sindaun gen. Dispela tripela grup bilong Bogenvil i gat wanpela astingting bilong mekim olsem na palamen i no ken traime long bagarapim wanpela bilong ol.

Yumi save olsem laip bilong BTG i klostu long pinis nau long mun Desemba, 1997. Tasol gavman i mas bung gut na skruim moa taim bilong BTG long wok poroman yet wantaim BIG na BRA long pinisim wok bilong ol. Na dispela em bikpela laik bilong olgeta Bogenvil manmeri, gavman na tu olgeta pipel bilong Papua Niugini.

Lida bilong BRA, Francis Ona i wok long toktok yet long independens na Bill Skate i tok nogat. Tasol bikpela samting em long stretim gen olgeta bagarap na sindaun pastaim. Bihain orait ol i ken toktok long ol arapela tingting na toktok ol i gat.

Benham Dekleresen i kamap na bilip na laik bilong olgeta manmeri na gavman i stap long dispela i mas kamap gut bikos olgeta toktok bilong stretim hevi na bringim bek gutpela sindaun long Bogenvil i stap insait long dispela bung bilong Benham Dekleresen. Ating i gutpela moa, Francis Ona, Moses Havini, praim minista Bill Skate, John Morris, Leo Hennett, Sam Akotal, Joseph Kabui na Gerald Sinato olgeta i mas kamap bung long dispela bung long Nu Silan.

WANTOK

NIUSPEPA BILONG OL PNG STRET

P O Box 1982 BOROKO
Telepon namba: 325 2500
Feks namba: 325 2579

PE BILONG WANPELA YIA 52 NIUSPEPA

| PLES | AIR |
|-----------------------|---------|
| Mosbi | K 40.00 |
| Arapela PNG eria | K 75.00 |
| Australia na Nu Silan | K115.00 |
| Asia pasifik na Japan | K150.00 |
| Amerika na Yurop | K215.00 |

Ol bisnis laikim lo bilong stapim raun nating

GAVMAN i kisim pinis wanpela hap pepa bilong kamapim nupela lo bilong stapim ol manmeri long raun nating long ples i go long ol taun na siti.


YAKAM KELO i raitim Ol kampani na bisnis grup insait long Mosbi i bin kamapim dispela hap pepa bilong gavman i skelim na traime pusim long kamapim dispela lo. Ol i kolim, Vegrensi Ekt (lo).

Sapos gavman i pasim dispela lo, bai arapela senis tu i kamap bihainim pawa bilong dispela lo. Ol samting olsem, ol manmeri i mas kisim aidi kat na soim taim ol i laik lusim ples na i go long taun o siti. Na ol i mas raitim long pepa, wanem as tru ol i laik long go siti o taun na hap wik o mun ol bai i go stap.

Ol kampani na bisnis grup long Mosbi i kamapim dispela toktok bihain long ol i save bungim planti bikpela hevi long pasin raskol na stil we i kamap long ol planti taim pinis.

Planti bisnis nau i kisim taim long pasin raskol na ol i ting as bilong ol stil pasin insait long siti em bikos planti man i stap nating na i nogat wok na i kamap wantaim ol raskol pasin.

Tasol ol i tok long ripot bilong ol olsem, wok bisnis insait long kantri (ekonomi) i no bikpela na i no groa strong yet long givim wok long olgeta pikinini husat i pinis long skul na i stap nating long haus.



• Bikmeri ya em wanpela strongpela tru sapota bilong Wantok niuspepa. Em i oltaim salim Wantok long Lae Top Taun olgeta Fonde na Fraide. FOTO: Watson Gabana.

Olsem na ol i askim gavman tu long kamapim na strongim gut skul long sait bilong wok agrikalsa. Ol i mas skulim na givim gutpela tingting na rot long ol pikinini long wok bilong agrikalsa we ol i ken mekim na kamapim mani.

Ripot bilong ol i tok planti i pinis skul na i go gen na stap long ol taun na siti we namba bilong ol i bikpela moa na ol i

bung na raun long grup na kamapim ol tingting nogut bilong stil.

Dispela hap pepa o ripot bilong ol i stap yet wantaim praim minista Bill Skate. Na sapos praim minista i putim i go long floa bilong palamen long ol memba i paitim toktok long en, bai ol i ken pasim i kamap olsem lo.

Dispela i no nupela toktok toktok. Ol toktok i bin kamap pinis bipo long haus palamen long taim olpela praim minista Paias Wingti i bin stap.

Taim ol i kamapim Intenel Sekyuriti Ekt (lo), ol i toktok tu long strongim Vegrensi Ekt. Olsem na i ol pepa bilong dispela toktok o lo i stap pinis.

Kaumi laikim gavman apim mani bilong lukautim PNG/Indon boda

INDONESIA gavman i wok long strongim yet boda agrimen bilong em wantaim Papua Niugini. Tasol PNG i no strongim sait bilong em.

Long soim tru wok bilong em, Indonesia gavman i wok long stretim gut ol rot na bris na ol sevis em i ken givim long hap bilong Sandaun provins i go. Em i putim kolta na stretim gut rot long hap bilong Wutung na bihainim boda i go long Indonesia sait na i kam bek gen long PNG sait.

Minista bilong Provinsel na Lokol Gavman Afeas, Simon Kaumi i tok long raun bilong em i go long Sandaun provins long las wik, em i lukim dispela na em i no amamas tru. Bikos Indonesia gavman i mekim wok bilong em tasol PNG gavman i nogat. Ol sevis na wok bilong PNG gavman long karimaut long boda i no gat tru. Ol skul, bris na rot long hap i wok long bruk daun na gavman i no

tingting long stretim olsem Indonesia gavman i mekim long sait bilong ol, Mista Kaumi i tok.

Minista Kaumi i tok em i lukim dispela ino gutpela tru na em i raitim pepa pinis long praim minista long putim dispela toktok long kabinet miting long toktok na lukluk long en.

Mista Kaumi tok em i laikim gavman i mas apim mak bilong mani em i save givim long boda developmen i go

antap. Olgeta yia gavman i save givim tasol K300,000 na dispela mani i no inap tru, em i tok.

Em i laik moa mani i mas go long lukautim ol sevis na wok long boda na mekim ol i kamap gut bai ol manmeri i ken kisim helpim long en.

Em i tok i gat Sandaun na Westen provins bilong Papua Niugini i stap long boda. Tasol gavman i no mekim gut wok bilong em na Sandaun provins tasol i kisim

sampela kain helpim pinis long wok bilong gavman aninit long boda developmen fan. Tasol Westen provins i no gat wanpela kain helpim olsem yet.

Minista Kaumi i tok em i askim praim minista Bill Skate long traime raun i go na lukim ol dispela samting em i toktok long en long hap bilong PNG na Indonesia boda.

- WENCESLAUS MAGUN

TORO
HOT SAN NA TORO I GO SPIN LONG GEREHU NA EM GO SOTKAT LONG BARUNI WEI.

BAGA INO WERIM HELMET BILONG EM NA SAN KUKIM HET BILONG EM... MI GO PANIM WANPELA HELMET!

INO LONG TAIM EM KAMAP LONG BARUNI DUMP, NA EM LUKIM SOSPEN LONG SIDE LONG ROT. MI KISIM DISPELA SO SPEN NA WERIM NAI!

BAGA LUKIM POLIS MIAN BLOCKIM ROT NA SEKIM LAISINES BILONG OL MIAN. PODO BAI MI LUSIM LU GO. OLSEM LU LUK NABADELA KAIN STRET... OLSEM SAMPELA TAIM KUMI MAS LUK SMAT

OL MANMERI LONG GEREHU SERVICE STATION, OL LAP I PAI LONG TORO... OL TING OLSEM WANPELA BOT KAPTEN.

Ol Bogenvil nius wantaim VERONICA HATUTASI

Laimo amamas long BRA harim tok

NESENEL Palamen memba bilong Saut Bogenvil, Michael Laimo, i amamas long lukim gutpela senis i wok long kamap nau long Bogenvil. Dispela em long ol lida bilong Bogenvil Revolusinari Ami (BRA) i bung wantaim ol pipel long kamapim gen gutpela sindaun.

Mista Laimo i mekim dispela toktok bihain long lukluk raun bilong em wantaim grup bilong Nu Silan Foren Minista, Don McKinnon, i go long Roreinang, Loloho na Wakunai long las Fraide.

Mista Laimo i tok long namba wan taim insait long 10-pela yia taim tabel i stap long Bogenvil, em i lukim bikipela senis tru we ol BRA/BIG lida i wok bung wantaim ol Bogenvil Trensisenel

Gavman lain, ol siefs, sekyuriti fos na komyuniti long go hetim ol agrimen we i stap insait long Burnham Tokorait, em ol Bogenvil lida i bin wanbel long en na kamapim long Nu Silan long las mun, Ogas.

Em i tok em i amamas tru long lukim na harim sapat long maus bilong ol BRA na Bogenvil Interim Gavman(BRA) lida olsem Joseph Kabui, Sam Kauona, Andrew Miriki yet we insait long las 9-pela krismas, ol no save wanbel long sapatim ol planti arapela agrimen we ol lida bilong tupela sait i save kamapim.

Mista Laimo i tok pasin we ol BRA/BIG lida i bin mekim long sapatim strong ol wok bilong bringim bek gutpela sindaun i givim hop na strong-

pela tingting olsem ol pipel bilong yumi i laikim trupela gutpela sindaun.

"Kabui, Kauona, Miriki na ol arapela BRA lida bilong Buin, Siwai, Nagovis na Sentrel Bogenvil i tok sapatim Burnham Dekleresen na ol i laik go fowet. Ol i tok ol pipel i karim hevi long planti krismas na ol inap nau. Ol i laikim gutpela sindaun i kamap na ol bai wok hat long mekim dispela i karim kaikai", Mista Laimo i tok.

Em bin tok em i amamas tru long lukim moa long 1,000 pipel i kamap long Roreinang Yunaited Sios Misin stesen we long tripela awa samting, grup bilong Mista McKinnon i bin bung wantaim ol BRA/BIG lida na ol pipel bilong Sentrel na saut Bogenvil.

Ripot tok ol soldia sasim fi long sekyuriti sek poin

PLANTI pipel bilong Selau insait long Not Bogenvil eria i no amamas na ol i komplem long pasin we ol sekyuriti fos i mekim long sasim 60t fi long Kokopau sekyuriti sek poin, taim ol i laik go long Buka Ailan.

Ol ripot we Wantok i bin kisim long Buka long dispela wik i tokaut olsem ol sekyuriti fos husat i lukautim sek poin long Kokopau i sasim 60t long wanwan manmeri husat i laik lusim not Bogenvil eria na go long Buka. Dispela em ol pipel bilong Selau distrik, na ol arapela hap olsem

Tinputz, husat i save yusim motobot long not Bogenvil na go long Buka Ailan.

Wanpela man husat i no laikim nem bilong em i kamap long niuspepa i bin tokim Wantok olsem ol sekyuriti fos i mekim dispela samting bihainim wanpela meknais i bin kamap long Selau eria las wik. Wanpela mangi ol i bilip olsem em i wanpela BRA i bin stilim gan bilong wanpela sekyuriti fos memba na ronawe wantaim long las wik.

Kikbek bilong dispela samting em ol sekyuriti fos i

belhat na ol i wok long kisim 60t fi long olgeta manmeri bilong dispela eria husat i kam long Buka, stat yet long las wik.

Man i tok ol pipel i no amamas tru long dispela samting. Na ol i laikim ol atoriti long Buka long sekim dispela samting bikos ol i wok long kamapim hevi long ol pipel.

Man ya i bin tokim Wantok olsem ol i toksave pinis long ol sampela gavman atoriti long lukluk long en. Tasol ol i no harim bekim yet long dispela samting i kam long ol bikman.

RAUSIM SIK POLIO, MISEL NA TETANAS

1997 NENESEL IMUNAISESEN DE



RAUN 1: Septemba 22 i go inap long Fraide 26.

RAUN 2: Oktoba long Monde 27 i go inap long Fraide 31.

Nu Silan minista bringim gutnius long pipel

FOREN Minista bilong Nu Silan, Don McKinnon, i bin lukluk raun long Bogenvil las wik. Na i tok olsem ol wansolwara kantri na gavman bilong em i laik helpim long pinisim pait, na bringim bek gutpela sindaun long Bogenvil.

Em i tokim moa long 500 pipel husat i bin bung long Buka long las Fraide olsem "ol kasen bilong yupela long Nu Silan em ol Maori pipel, husat i sapatim tru dispela wok long kamapim gutpela sindaun long Bogenvil".

Mista McKinnon i tok ol tok-tok na wanpela agrimen we ol Bogenvil lida i bin kamapim long Nu Silan i bihainim gutpela tingting we olpela Provinsal na Lokol Level Gavman minista long Chan/Haiveta gavman, Peter Barter. Ol gutpela wok em Barter i bin kamapim em ol i kolim long Bogenvil Pis Strateji. Mista Barter i bin stap tu long dispela wokabaut we grup bilong Mista McKinnon long las wik Fraide.

Em i tok bikipela wok i stap



Wanpela sumatin bilong Hutjena hai skul bungim mista McKinnon long ples balus long Buka.

yet na gutpela luksave, hatwok na wok bung wantaim bilong ol pipel long Bogenvil tasol bai i kamapim trupela gutpela sindaun.

Em bin strongim ol pipel long tingim ol pikinini we pait na hevi

i pasim ol long skul na ol i misaut long lainim planti samting.

"Mi lukim ol pikinini husat i groap nau na ol i save tasol long pait na hevi. Ol i nogat sans long go skul. Ol dispela tu we ol bin liklik na trabel long

ailan i stat i save tasol long gutpela sindaun na laip bilong bipo.

"Taim yupela i tingim bihain taim, tingim ol pikinini long Bogenvil na askim yupela yet sapos ol pikinini i redi long kalap long senseri 21", Mista McKinnon i tok.

Taim em i strongim ol Bogenvil pipel long bung wantaim na wo hat long rot bilong kamapim gutpela sindaun na belisi pasin, em i tok hevi ya i bin planti hundred pipel long wok bilong painim gutpela sindaun. Na pasin bilong yusim gan bai bagarapim olgeta gutpela wok i kamap pinis.

Em i tok em i gat bilip long Burnham Tokorait bai wok gut, sapos ol pipel i sapatim wantaim strongpela bilip na laik.

Long wokabaut bilong em, em i lukim olsem ol pipel long Bogenvil i les pinis long pait na sindaun nogut na ol i laikim gutpela sindaun.

Olsem na em bin tok em i taim nau long gutpela sindaun i mas kamap tru tru.



Go hetim wok bilong gutpela sindaun - McKinnon

NU SILAN Foren Minista, Don McKinnon, i tokim ol pipel bilong Bogenvil em long go hetim strong wok bilong painim gutpela sindaun na belisi pasin long ailan.

Mista McKinnon i bin mekim dispela toktok long Buka long las wik Fraide. Dispela em long wanpela de lukluk raun em bin mekim i go long provins. Samting olsem 50 pipel, we i gat long en grup bilong Mista McKinnon yet long Nu Silan na sampela i wok long Nu Silan Hai Komisaris opis long Mosbi, tripela nesenel memba bilong Bogenvil olsem John Momis (rijonal), Sam Akoitai (Sentrel Bogenvil na Minista bilong Provinsal Afeas) na Michael Laimo (Saut Bogenvil). Long dispela wokabaut i gat tu Ledi Carol Kidu (Memba bilong Mosbi Sautwes), ol sampela arapela bikman bilong gavman na Bogenvil, na ol niusman.

Bihain long grup i go kamap long Buka, Mista McKinnon na 14 pipel i bin kisim helikopta na go lukluk raun long Roreinang, Loloho na Wakunai

insait long Sentrel Bogenvil.

Roreinang i stap anitit long lukaut bilong Bogenvil Revolusinari Ami (BRA). Moa long 1,000 pipel i bin kamap long Roreinang Yunaited Sios misin stesen long bungim Mista McKinnon na grup bilong em. BRA na Bogenvil Interim Gavman (BIG) lida, Joseph Kabui na Sam Kauona i bin go pas long dispela bung. Ol arapela lida olsem Andrew Miriki na ol BRA komanda wantaim ol sampela bikman bilong Saut Bogenvil i bin stap tu.

Mista McKinnon i bin amamas long lukim olsem ol pipel bilong Bogenvil i wok strong nau long rot bilong painim gutpela sindaun long ailan. Bihainim dispela, em i putim strongpela toktok long ol pipel long go hetim gutpela wokbung we i kamap bihainim bung we ol lida bilong ol i bin holiir long Nu Silan long mun Ogas, 1997.

Em bin tokim ol long tingim ol pikinini we i mas stap insait long ol nupela wok kamap long wol.

Maus bilong PM i popaia

WAIGANI gavman i as bilong Bogenvil hevi, na i no ol pipel bilong Bogenvil olsem Praim Minista Bill Skate i bin tokim ol Buka pipel long Ogas 23, 1997.

LEO WAFIWA i raitim

TUPELA wik i go pinis, Praim Minista Bill Skate i bin go long Buka, na tokim ol pipel olsem, "Yupela ol pipel bilong Bogenvil ailan yet i statim dispela trabel, olsem na yupela yet mas stretim."

Dispela hap toktok bilong praim minista i welkamim planti tok nogut i kam long ol pipel na lida. Wanpela bilong ol dispela lida em Memba bilong Bogenvil, John Momis.


Momis i askim nau praim minista long rausim dispela toktok bilong em. Em i tok kain pasin bilong praim minista i tromoi kain toktok long ol pipel husat i kisim mekimsave nau i no gutpela.

"Ol pipel bilong Buka i pilim nogut tru long dispela toktok. Olsem wanem bai yu tokim ol, yupela kirapim dispela hevi, yupela yet i stretim," Momis i givim strongpela toktok olsem.

Mista Momis i tok praim minista mas save olsem dispela agrimen i kamap bikos ol praim minista bilong bipo i no bihainim askim bilong ol Bogenvil pipel long sekim na senisim dispela Bogenvil Kopa main agrimen, we bai amamasim ol pipel. Olsem na dispela hevi i kamap.

Long painimaut as bilong Bogenvil hevi, bihainim dispela toktok bilong Skate, Wantok i mekim liklik wok painimaut, na i go olsem.

Dispela tokorait long wok i go het long Bogenvil Kopa Main i olsem wanpela piksa em ol arapela wankain bikipela projek insait long kantri i ken bihainim. Dispela taim olgeta pati na pipel i lukim olsem em i wanpela gutpela agrimen, we



• Praim Minista Bill Skate.

i winim lewa bilong ol papagraun, gavman, na olgeta lain.

Tude PNG i lukim olsem dispela agrimen i no orait. Papagraun na ol arapela pipel long kantri i lukim olsem ol bekim bilong dispela main i no go gut long ol pipel. Tok sut i go olsem CRA na gavman i kisim moa moni, na ol papagraun nogat.

Insait long dispela tokorait long Panguma main, ol i makim olsem bai i gat sekap long agrimen long olgeta 7-pela yia. Wok painimaut i soim olsem gavman bilong PNG yet i no bihainim dispela tokorait insait long agrimen. Na i no sekim gen agrimen long tupela taim.

Long 1981, husat i bin stap olsem rijonal Memba bilong Bogenvil, i askim Praim Minista long sekim na mekim sampela senis long dispela agrimen. Pater Momis, olsem ol bin kolim em long dispela taim, i tok lukaut olsem sapos gavman i no go

pas long sekim na senisim agrimen ya, bai bikipela trabel i kamap long bihain taim. Long dispela taim, Sir Julius i bin praim minista.

Sans bilong sekim na senisim dispela agrimen i no bin kamap.

Eitpela yia bihain, sans bilong sekim gen agrimen na senisim i no bin kamap.

I kam na Francis Ona, wanpela papagraun i belkaskas long dispela. Na kisim hevi i go insait long han bilong em, taim em ranawa i go insait long bus na fomim Bogevil Revolusinasini Ami (BRA). Na hevi bilong Bogenvil Kopa main i stat.

Long 1975 Papua Niugini i bin kisim independens. Dispela taim ol pipel bilong PNG i gat gavman bilong ol yet nau, husat i gat pawa na rait long sekim na mekim senis long Bogenvil kopa agrimen, em i bin kamap aninit long bikipela lukaut bilong Ostrelia gavman. Tasol PNG gavman yet i feil.

Mista Momis i skruim tok long dispela wik olsem ol praim minista bilong bipo em Bill Skate i kisim ples bilong ol nau i as bilong dispela hevi. Bikos planti taim ol pipel bilong Bogenvil, wantaim provinsal gavman, na ol Memba long Palamen olsem em yet, i askim long sekim na senisim dispela Bogenvil Kopa Agrimen.

"Dispela hevi i stat taim Bogenvil pipel i pilim olsem ol i les pinis long bikhet pasin bilong Waigani, we ol i kisim taim. Olsem na nau ol i givim bek liklik mekimsave em Waigani i bin givim long ol," Momis i tok.

Olsem na kain pasin bilong i no tingting o skelim gut toktok na tromoi toktok nating i no gutpela. Bikos em i ken bagarapim o daunim sapot bilong ol pipel long ailan long wok bung wantaim na bringim bek gutpela sindaun. Dispela i bihainim tingting bilong Momis: "Kain toktok i bagarapim tasol bilip o sapot bilong ol Bogenvil pipel, na tu ol arapela Papua Niugini manmeri na pikinini, husat i bin kisim mekimsave o bagarap long dispela hevi."

Ol deputi gavana bai kamapim hevi: Kas

WENCESLAUS MAGUN i raitim

GAVANA bilong Madang Jim Kas i laikim olgeta deputi gavana i mas memba bilong wankain politikel pati olsem ol gavana. Bikos sapos deputi gavana i bilong narapela politikel pati na gavana bilong narapela pati, bai i nogat gutpela wok-bung na nogat gutpela wok kamap.

"Mi laik senisim Ogenik Lo bilong Provinsal na Lokol level gavman. Dispela bai mekim ol deputi gavana i sapotim gavana bilong ol provins na kari-maut olgeta plen na tingting bilong gavana," Mista Kas i tok.

Em i tok, deputi gavana i mas wanpela man gavana i gat bilip long em. I no wanpela man husat bai senisim ol plen na tingting bilong gavana na we bilong ronim provins long laik bilong em. Em i tok yumi lukim ol kain pasin i kamap pinis long taim bilong traime dispela nupela sistem bilong provinsal na lokol-level gavman.

"Dispela i ken kamapim bikipela hevi. Ol gavana bai pret long lusim provins bikos ol bai pret nogut deputi gavana i mekim ol samting ol i no laikim taim ol (Gavana) i lusim provins na go mekim wok long sampela hap," Mista Kas i tok. Long tingting bilong Mista Kas, dispela pasin inap long kamap bikos ol lida husat i nogat wankain politikel bilip na sanap, bai ol kain paul pasin na hevi inap kamap.

Arapela hevi Mista Kas i glasim em olsem ol deputi gavana i noken wari tumas long ol hevi bilong nesenel level. Em i tok, ol deputi gavana i mas gat bikipela laik na bel bilong helpim tru ol pipel bilong ol long provins o lokol level. Ogenik Lo bilong Provinsal na Lokol-level Gavman i tok, provinsal asembli bai makim deputi provinsal gavana. Na em i wanpela hetman o mausman bilong ol lokol-level gavman long ples, taun na ol kaunsel long provins. Em i no mas wanpela memba bilong palamen. Mista Kas i tok em i pret yet bikos lo deputi gavana inap go egensim ol plen, tingting na laik bilong em na gavman bilong em.

Long nesenel palamen ol i save bihainim pati sistem. Na dispela i min olsem praim minista na deputi praim minista i mas kam long ol pati i bung na mekim gavman. "I nogat narapela we moa long bihainim. Tasol dispela i no save kamap long provinsal level," Mista Kas i tok.

Ol Bogenvil ailan lida laikim Trespisenel Gavman stap yet

i kam long pes 1

Provinsal na Lokol Level Gavman Minista, Peter Barter, i tok sapos Momis i no stap insait long Bai-Patisen Komiti husat i go pas long paitim toktok na bringim bek gutpela sindaun long ailan, bai gavman bilong Praim Minista Skate i painim hat long kisim bikipela sapot bilong Haus Palamen. Dispela em long skruim taim bilong BTG long stap longpela taim long opis, na paitim toktok long kamapim gutpela sindaun. Bikos sapos Oposisen aninit long lukaut bilong Lida Bernard Narokobi i no givim sapot, bai Momis i kamap gavana stret aninit long Ogenik Lo.

Mista Narokobi i tok Oposisen i no lukim wanpela gutpela as long BTG i stap yet. Olsem na BTG i mas pinis, na ileksen i mas go het, bai ol pipel i makim stretpela lida.

Dispela wik *Wantok* i skruim dispela ripot. Na toktok wantaim sampela lida bilong Bogenvil ailan stret. Na ol i autim tingting bilong ol. Planti i tok ol i laikim BTG long stap yet. Na paitim toktok long bringim bek gutpela sindaun.

Joseph Watawi em i siaman bilong Notwes Interim Atoriti. Em i tok BTG na ol Bogenvil lida i mas paitim toktok wantaim nesenel gavman long skruim taim bilong BTG i go moa. Na givim sans long BTG long go hetim ol wok bilong painim gutpela sindaun long ailan. Sapos gavman i hariap rausim BTG na mekim em i kam long nupela rifom em no gutpela. Rifom i no ansa long stretim hevi long Bogenvil. Mipela ol pipel i laikim nesenel gavman long givim moa

tingting, skelim na glasim ol samting. Na givim moa fanding o mani long go hetim gut ol wok bilong painim gutpela sindaun na belisi pasin long ol ples. Bikos wanpela bikipela hevi mipela i gat nau em nogat inap mani bilong mekim wok bilong stretim ples na painim gutpela sindaun.

Em i tok moa olsem narapela bikipela samting em tripela grup, BRA/BIG, BTG na ol sief i mas wok wantaim. Nau tasol bihainim ol toktok i stap aninit long Burnham Dekleresen o Tokorait em ol grup ya i wok bung wantaim. Em i tok ol i lusim birua na pret we ol i bin gat long las 10-pela yia tu, bihainim toktok bilong ol Bogenvil lida long Nu Silan. Ol grup i laik wok wantaim PNG gavman na ol i luksave long BTG olsem stretpela grup long karim ol toktok wantaim i go i kam namel long nesenel gavman, Bogenvil komyuniti na BIG/BTG.

"Aninit long toktok i kamap namel long BTG, BRA/BIG na ol Bogenvil lida yet i kli na luksave long wanem samting tru ol i laikim, wok bilong gutpela sindaun na bihain taim bilong ailan bai bagarap", Mista Watawi i tok. "Taim ol samting i luk na go gut BTG tu i mas stap na moabeta nesenel gavman i skruim taim bilong em long kari-maut wok bilong em i go moa yet."

Agnes Titus em i wanpela strongpela mausmeri long Bogenvil. Em i bilong Nissan Ailan. Na i makim ol meri long BTG. Em i gat wankain tingting olsem Watawi.

"BTG i mas stap yet. Em i no pinisim wok yet long rot bilong painim gutpela sindaun na belisi

pasin. Ol pipel i luksave long wok bilong BTG. Na tu BTG i save long ol hevi long graun na pipel bilong em. Moabeta long nesenel gavman i skruim taim bilong BTG i wok moa yet inap long olgeta grup long Bogenvil i belgut, kamapim belisi pasin. Na bai sindaun i ken kamap long provins", MisiTitus i tok.

Parara Ahewa bilong Nuguria long Atols distrik em i memba bilong Atols long BTG: Em tu i gat wankain tingting.

"Bipo long BTG i pinis, em i gat wok yet long mekim na stretim gut pastaim. BTG wantaim BIG/BRA i mas kam olsem wanpela grup na wok strong wantaim long painim gutpela sindaun.

"Planti pipel i paul nau tu long ol tok kros na hevi we i bin kamap namel long ol Bogenvil lida tupela wik i go pinis, taim John Momis na Laimo i no go wantaim grup bilong Praim Minista Bill Skate long Bogenvil. Ol dispela kain hevi namel long ol lida i mas pinis. Pastaim mi harim olsem Mista Momis i egensim nupela gavman rifom na long ol kain hevi namel long ol lida, i luk olsem em i sutim wankain tingting i go long BTG. Mi paul ya", Mista Ahewa i tok.

Bernadette Ropa em i hetmistres long Tarlena Hai skul. Em i tok sampela pipel i bilip olsem ol gavman sevis bai ron gut taim yumi kam aninit long nupela gavman rifom. Tasol bai yumi kisim gut sevis olsem wanem sapos gutpela sindaun na belisi pasin i no stap namel long yumi? Bikipela samting em BTG i mas stap na go hetim wok long painim gutpela sindaun long Bogenvil. Bikos sapos gutpela

sindaun i no kamap, em bai hat long ol arapela samting olsem gutpela sevis i bihainim rot na kam long mipela.

Josephine Harepa em i wanpela mauseri bilong Sentrel Bogenvil. Em i tok BTG i mas stap yet. Bikos BTG i no mekim inap wok yet long kamapim gutpela sindaun long Bogenvil. "Na tu ol BIG/BRA i wok nau wantaim BTG na nesenel gavman i mas luksave long dispela, tingim ol tu na kisim tingting bilong olgeta wantaim bipo long kamapim senis," em i tok.

Josephine i tok moa olsem "nau i no rait taim long pinisim BTG, na Bogenvil i no redi yet long kam aninit long nupela gavman rifom. Pasin we ol lida bilong yumi tu i wok long pait namel long ol yet na tromoi toktok i go i kam namel long ol i no gutpela. Bikos ol i mas wok wantaim long stretim hevi. Kain pasin i mas pinis.

Em i skruim tok olsem gavman i mas kisim sapot bilong oposisen long skruim taim bilong BTG inap ol pipel bilong Bogenvil i putim het wantaim, wok gut na makim kain gavman ol i laikim na bai sevim gut ol. Em i tok ol kain gavman we Bogenvil inap kisim, na ol lida i mas lukluk em long:

- Givim moa pawa long ol pipel long provins;
 - Kamapim Stet gavman long Bogenvil;
 - we Bogenvil mas wok fri wantaim Papua Niugini; na
 - kisim independens.
- Josephine i tok dispela em ol samting we BRA i save toktok strong long em.

William Lavabua, siaman bilong Bana Interim Atoriti i sapotim tu ol wantok bilong em. Em i tok nau i no stretpela taim long rausim BTG. Bikos aninit long BTG, ol gutpela toktok na luksave i kamap nau namel long BIG/BRA, ol lida bilong Bogenvil na ol pipel. "Ol grup ya wantaim BTG olsem namel man i mas sindaun na paitim ol toktok long painim kain gavman long Bogenvil we i gutpela long sevim ol pipel."

Em i tok moa olsem sapos gavman i rausim BTG, na i kam aninit long rifom, em bai paul nabaut na i no ron gut. "Sapos Bogenvil i kam aninit long rifom, em bai no sevim gut laik bilong ol pipel bilong em", Mista Lavabua i pinisim tok olsem.

Michael Laimo, Memba bilong Saut Bogenvil em Wantok i nogat sans stret long kisim tingting bilong em. Tasol wanpela sinia opisa bilong em i tok tasol long asde, Trinde Septemba 3 olsem em tu i laikim olsem Palamen i mas skruim taim bilong BTG.

Bikos nau tasol em i namba wan taim bilong BTG, BRA na BIG i bung wantaim long paitim toktok wantaim gavman. Olsem na dispela wok bung i mas go het. Olsem nai no gutpela long nupela kain gavman we i kisim ples bilong BTG i kam insait long dispela taim.

Tingting bilong olgeta lida i soim olsem wanem samting Oposisen i laik mekim long i no laik sapotim Skate gavman long skruim taim bilong BTG i no kisim blesing o sapot bilong ol. Ol i laikim olsem Palamen mas skruim moa taim bilong BTG long stretim dispela hevi long ailan.

KRIS em i sotpela we bilong tok Kristofa. Nau mi laik stori ong dispela. Santu Kristofa. Kristofa em i wanpela draipela bun, wanpela maselman stret. Olsem na king i makim em wanpela ofisa long ami bilong em.

Kristofa i gat wanpela bikpela driman: em i laik painim husat man long dispela graun i winim olgeta arapela long strong bilong em.

Orait, long wanpela de storiman bilong king i wokim planti fani stori long Seten. Tasol olgeta taim king i harim dispela nem Seten, em i stat long guria. I olsem em i pret. Nau Kristofa i askim king long wari bilong em, na king i tok, "Seten ya em i winim strong bilong olgeta man long dispela graun. Olsem na mi pret long em."


Orait, nau Kristofa i joinim ol man bilong Seten na wantaim ol raskol na stilman em i raun nabaut long olgeta hap. Long wanpela de Kristofa i wokabaut wantaim Seten na tupela i kamap long warpela maus rot, we ol man i bin sanapim wanpela diwai kros. Seten i lukim diwai kros ya, na em i arere long em na i laik go longwe

TU MINIT TINGTING DISPELA NEM 'KRIS' EM I MIN WANEM?

liklik. Nau Kristofa i askim bilong wanem na em i mekim olsem. Na Seten i tok, "Bipo long planti ya wanpela man, nem bilong em Jisas, em i bin dai long dispela kain diwai kros. Na stat long dispela taim, mi save pret long olgeta diwai kros."

Orait, nau Kristofa i lusim Seten na i go i laik painim dispela Jisas. Pastaim em i painim wanpela dairekta bilong staim laip bilong em. Dairekta i lukim dispela patpela Kristofa na em i tokim em, "Sapos yu laik painim Jisas, yu mas tambu long kaikai pastaim." Na Kristofa i bekim tok olsem, "Mi draipela bun, mi mas kaikai planti. Sapos nogat, bai sik i painim mi."

Orait, nau dairekta ya i tokim Kristofa olsem. "Sapos yu no inap hapim kaikai, yu mas beten inap long tupela awa long olgeta biknait." Kristofa i tok long em i no inap mekim dispela kain samting tu. Em i askim dairekta olsem. "Yu mas givim mi wanpela kain wok i



FRANK MIHALIC i raifim

pas gut wantaim strong bilong mi." Orait, nau dairekta i tokim em olsem: "Yu go daun long riva na yu wokim wanpela liklik haus long arere bilong en. Dispela riva i no gat bris na ol pipel i no inap kalap i go long hapsait, long wanem, wara i boil nabaut nogut tru. Tasol

yu strongpela bun na yu inap karim ol i go long hap."

Oke, nau Kristofa i wokim haus na i sindaun i stap na i wok long karim olkain pipel i go i kam.

Mekim olsem, na long wanpela nait wanpela liklik boi i signaut long hap sait bilong wara na i laik brukim wara i kam. Orait, na Kristofa i putim em antap long soldia bilong em na i karim em i kam. Tupela i wokabaut i kam, tasol oltaim dispela liklik boi em i kamap moa hevi. Hevi bilong em i krungutum Kristofa na em i go daun insait long wara inap long nek bilong em. Klostu liklik boi i kapsait i pundaun. Taim tupela i kamap long hapsait bilong wara, Kristofa i tait olgeta na i sotwin na i slip long graun na pulim win. Nau em i askim dispela liklik boi, "E, liklik boi, yu husait"

Nau boi i tok, "Mi dispela Jisas yu wok long painim. Mi hevi tumas bikos mi save karim dispela graun

insait long han bilong mi. Olsem na yu no bin karim mi tasol i go. Nogat. Yu bin karim graun tu i go wantaim mi." Toktok pinis, nau liklik boi i go olgeta.

Wanpela mining bilong dispela stori em i dispela yumi mas painim God insait long wok yumi save mekim long olgeta wan wan de. God i no stap longwe. Nogat. Em i stap klostu. Kristofa i no inap hapim kaikai o mekim longpela beten. Tasol em i go karim man i go i kam, na insait long dispela wok em i bin painim Jisas.

Tude long planti kantri ol i gat pasin bilong pasin medal bilong Santu Krisfa insait long ol ka na PMV na bas na trak bilong ol. Sen Kristofa i gat biknem long lukaut gut bai ol ka samting i mas kamap gut long ples em i go long en.

Dispela nem "Kristofa" i min: wanpela man o meri husat i karim Kraisi nabaut wantaim em. Yumi olgeta wan wan i Kristofa, bikos yumi gat Kraisi stap insait long yumi na yumi karim em nabaut insait long yumi. Sapos yu laik sapotim dispela tingting wantaim Baibel, orait, yu lukim Matyu 25:40.

God i makim ol wokman bilong em pinis: Pasto Gendi

"MI MAKIM yu bilong mi pinis," Jon 15. 16. Dispela em i het tok bilong Evanjelikel Luteran Sios bilong Papua Niugini (ELCPNG sinot bilong 1998 long Niugini ailan distrik.

Maus bilong Jisas Kraisi stap klia pinis long Baibel. "Mipela ol pasto bilong Niugini Ailan Distrik, i skelim dispela het tok na mipela i pilim tru long bel bilong mipela. Dispela tok i kotim mipela na soim rot tru," Pasto Henry Gendi bilong Kimbe Seket i tok.

Em i tok planti taim yumi save tingim biknem, namba na wok bilong yumi tasol. Yumi no save pilim tru olsem Jisas yet i makim mi pinis na mi bilong em. Em i givim mi namba na nem long wok. "Olsem na mi mas daunim mi yet long wok Jisas i givim mi long mekim gut, lukautim namel long wokman, pasto na kongrigesen," Pasto Gendi i tok. "Yumi ken tok tu olsem, Jisas i makim mi pinis bilong lukautim wok misin bilong en long graun na i no bilong paitim bros bilong yumi," em i tok.

Pasto Gendi i tok, yumi mas klia long sios bilong God long Olpela Testamen long pasin bilong makim lida. Em i samting bilong God long makim profet, na ol man i save kapsaitim wel long het bilong lida. Olsem tasol, God i makim man pinis, na sios bai strongim na givim wok long em. Dispela lida bai kamap lida tru na lukautim wok long sios bilong Bikpela olgeta.

Em i tok tenkyu tu olsem Niugini Ailan Distrik bai lukautim Sinot 21. "Mipela i amamas na redi long lukautim dispela sinot. Mipela i stap long arere bilong kantri we kain kain senis i no save kamap klia long mipela. Olsem na mipela i amamas tru long lukautim 21 sinot bilong ELCPNG," Pasto Gendi i tok.

Pasto Gendi i singaut strong i go long ol lida na deleget bilong ol arapela distrik long pasin tru bilong God. "Yupela i mas kam wantaim gutpela nek, gutpela bel na soim gutpela wok bihainim Gutnius yumi autim pinis insait long distrik bilong yumi wan wan," em i tok. Pasto Gendi i tok, pasin bilong tok pait i save daunim wok bilong telimautilim Gutnius long ol arapela manmeri husat i no harim Gutnius. "Pasin bilong daunim yumi yet em i mas bikpela long laip, tingting na wokabaut bilong yumi long sinot 21," em i tok.

Pasto Gendi i mekim strongpela tok lukaut olsem em i no laik lukim bruk pasin i kamap long sinot 21 wankain olsem long Mosbi sinot. "Mipela i laikim yumi kam wantaim het tok bilong 1998 sinot na save tru Baibel i gat wanem tok long yumi wan wan long dispela bung," em i tok.



• ELC/PNG - Ranara seket. Wafuzuan, amamas na paitim gita long konfrens. Foto: Paulus Tali.

Bisop Kurztz i salensim ol diken long bihainim Kraisi

WENCESLAUS MAGUN i raifim

LONG Ogus 31, insait long wanpela bikpela misa long Bomana seminari, 14-pela yangpela man bilong Papua Niugini na Solomon Ailan i kisis sakramen bilong ordo bilong kamap diken insait long Katolik sios. Diken em i wanpela mak klostu long ordo bilong kamap pater. Bisop bilong Kundiawa, Kiunga/Daru na Kerema i bin go pas long dispela bikpela misa.

Ol 14-pela diken em ol long Andrew Anis, Michael Glenus, Hilary Wapiningi, Bernard Boam na Bernard Perite bilong Wewak daiosis. Daniel Animarin bilong Madang asdaiosis. Mathew Kunglame bilong Kundiawa. Philip Suvi bilong Kerema daiosis. Christopher Kini bilong Daru/Kiunga daiosis. Don Kelly na Beno Labuse bilong Honiara Daiosis, Solomon Ailan. John Taba bilong Auki daiosis, Solomon

Ailan. Charles Gingo n a Ales Garuai tupela memba bilong Sosaiti bilong Divain Wod Misinaris (SVD).

Bisop William Kurztz bilong Kundiawa daiosis i skulim ol diken long bihainim Jisas Kraisi. Em i tokim ol tu olsem nau ol i statim nupela laip. Em i nupela taim long laip bilong ol. Ol i stap olsem pablik man long sosaiti. Bisop Kurztz i salensim ol long bilipim ol tok i stap long baibel, go aut na telimautilim dispela gutnius na tu bihainim ol tok long baibel long laip bilong ol. Em i tokim ol olsem: 'Kraisi i no kam olsem wanpela masta tasol olsem wanpela wok boi nating. Na olsem tasol ol diken i mas go aut na mekim wok olsem Kraisi. Ol i mas stap olsem wok boi bilong ol man'. Long dispela skul tok yet, Bisop Kurztz i tokaut long ol wokman bilong gavman husat nau i lusim as tingting bilong wok tru bilong ol bilong mekim wok na i noken yusim op's bilong ol bai ol pipel i mekim wok bilong ol.

"Kraisi i no les liklik long mekim wok bilong em. Nogat tru. Em i givim taim na laip bilong em olgeta long mekim wanem samting papa bilong em i laikim. Na em i mekim olgeta dispela inap long taim em i dai long diwai kros. Long wankain pasin, yupela tu i mas tingim dispela na bihainim," Bisop Kurztz i tok. Long strongim bilip bilong ol diken, Bisop i Kurztz i mekim wanpela tok piksa bilong mama Theresia bilong Kalkata olsem: 'Love begins when it hurts' o stat bilong laikim tru arapela i save kamap sapos yu pilim pen. Olsem na em i askim ol diken long redi long karim pen na dai olsem Kraisi i go pas na mekim. Moa yet, Bisop Kurztz i tok, Kraisi i bin kam long inapim olgeta laik bilong papa bilong em. "Na em i no mekim long strong bilong em. Nogat. Em i putia yau na harim wanem samting God i laikim em i mekim. Na bihainim em i mekim," Bisop Kurztz i tok. "Kraisi i no askim Peter long amas save em i gat, taim em i

askim em: 'Simon pikinini bilong John, yu laikim mi?' Wanem samting Jisas i laikim tumas em, bikpela laik," Bisop Kurztz i tok.

Em i askim ol diken long harim tok bilong ol bisop na ol bos bilong ol. "Nau arpela man bai mekim disisen long laip bilong yu. Na yu gat bikpela salens bilong harim singaut bilong God i kam long dispela man," Bisop Kurztz i tok. Em i tokim ol diken long lain long karim pen olsem Kraisi i mekim.

Klostu olsem 500 manmeri na pikinini bin kamap na witesim dispela bikpela de. Ol meri long Simbu i danis na bringim ol diken i go insait long Misa. Long rit bilong gutnius, ol Buka i kisis baibel i go long alta. Ol Kavieng tu i mekim save wantaim stail danis bilong ol na bringim ofa i go long alta. Na long pinisim misa, ol stail lain bilong Madang i kirapim das wantaim samsam bilong ol na kisis ol diken i kam ausait long Misa.

Kas laikim ol setelmen i go

GAVANA bilong Madang, Jim Kas i tokim ol setelmen long lusim graun bilong gavman nau ol i stap long en na go bek long ples bilong ol.

Mista Kas i tok ol lain long setelmen mas lusim dispela hap na mekim we long ol bisnismen long kam yusim ol dispela graun long mekim bisnis. Em i tok, ol manmeri long Madang mas lusim dispela graun bilong gavman sapos ol i laik lukim developmen insait long provins. Taim ol manmeri i go na givim spes long ol kompani i kam sindaun, ol pipel inap kam bek na painim wok long ol bisnis i bai kamap long dispela graun.

Long strongim toktok bilong Mista Kas, Administreta bilong Madang, Clant Alok i tok dispela em namba tri singaut i kam long gavman long ol manmeri long lusim graun bilong gavman. Mista Alok i tok, sapos ol lain long setelmen i no harim tok na sindaun yet long graun bilong gavman, Madang gavman bai yusim masin long rausim ol haus na arapela samting. Em i askim tu ol bisnismen insait long ol setelmen long rausim bisnis bilong ol bipo long ol masin i kam insait na brukim daun ol bisnis bilong ol.

Mista Alok i singautim ol bisnismen long baim graun na wokim ol haus bilong wokman bilong ol. Em i tok em i harim pinis olsem sampela bisnismen i wok long sutim bel bilong ol setelmen lain long sakim tok bilong disisen bilong Madang gavman.

Siaman bilong komiti husat i go pas long rausim ol setelmen, na Memba bilong Sumkar, Mathew Gubag i givim bikipela sapot long Mista Kas. Em i tok klostu taim bai ol i karim aut oda bilong ol bilong rausim ol setelmen.

Memba bilong Raikos Open, Samuel Pariwa i sapotim tu dispela disisen bilong gavman. Em i tok ol manmeri i stap long graun bilong gavman na i no kisim tok orait long gavman i mas go bek long ples bilong ol.

Ripot i kam long Madang plis ste-sen i tok, ol i redi pinis na wetim oda bilong gavman long rausim ol setelmen.

Tingim ol pikinini na tumbuna

...na yusim gut mani bilong OK Tedi main: Lupari

OL DAIREKTA bilong Star Maunten papa graun bilong OK Tedi projek i kisim strongpela tok lukaut i kam long Sekreteri bilong Finens, Isaac Lupari long yusim gut ol mani OK Tedi main na gavman i givim ol. Mista Lupari i tok em i pret nogut ol wankain-hevi nau i kamap long Bogenvil bai kamap bihain long OK Tedi sapos ol papa graun i no yusim gut mani ol i kisim long dispela taim.

WENCESLAUS MAGUN i raitim

"Mi singaut ken long yupela long yusim gut mani bilong yupela. Mi askim yupela long mekim ol gutpela disisen wantaim mani yupela i kisim. Putim i go long ol benk o insait long gutpela rot bilong kisim mani. Mipela i no laik lukim ol pikinini na tumbuna bilong yupela long bihain taim i kros pait long dispela mani," Mista Lupari i tok. Em i tokim ol papa graun bilong 10-pela ples, ol

dispela toktok taim ol i sainim tok orait wantaim gavman, long Mosbi long Ogus 29 bilong kisim 2.5 ekwiti mani. Long rekot bilong main long Papua Niugini, dispela em i namba wan taim ol papa graun i sainim kain kontrak. Sekreteri bilong Star Maunten Developmen Korporesen, Henry Asemki i tok wantaim dispela mani olgeta 10-pela ples bai kisim K78,000 'cash' mani na arapela 2.5 pesen bilong dispela ekwiti bai ol yusim long putim i go long benk o yusim long ol arapela rot bilong kisim mani. Ol mausman bilong ol papa graun i makim Atemkit, Kaworabip, Finalbin, Wangbin, Migalsim, Kumkit, Aukit, Nioksiwi, Okteditau na Bultem ples.

Ol Ok Tedi main lease papa graun i kisim pinis ol arapela helpim i kam long Ok Tedi main long kainkain we olsem long pe bilong yusim graun o kompensesen. Ol papagraun i save kisim

pe aninit long Land Lease Compensation Agreement na Additional Compensation and Benefit Package Agreement. Long 1996, aninit long land lease compensation agreement ol papa graun i kisim samting olsem K1.28 milion olsem kompensesen bilong graun bilong ol. Ol i kisim tu samting olsem K3.35 bilong K11.15 milion royalti. Long dispela mani, K7.8 milion i go long Fly River provinsel gavman. Orait aninit long Additional Compensation and Benefits Package Agreement we ol papa graun i sainim tok orait long en long las yia (1996), sikpela ples insait long main lease eria i mas kisim: K200,000 long wan wan yia inap long 5-pela yia. Ol samting olsem haus, wara saplai, statim bisnis na ol arapela projek i kam aninit long dispela mani. Samting olsem K1.3 milion i stap bilong baim ol kainkain kompensesen we ol papa graun i sainim dispela

tok orait long las yia na ol i surukim i go olgeta long 1984.

Antap long royalti, lease, na kompensesen pe ol i save kisim, gavman i save givim ol tu ol arapela helpim i kam aninit long Special Support Grants. Na moa yet, ol i save kisim ol arapela komiyuniti na sosel benefit o helpim olsem ol i ken painim wok long main, kisim save long ol skul na tren long kainkain wok long main o ausait we main i baim fi bilong skul na treining bilong ol. I gat ol arapela infrastraksa developmen o servis bilong wokim skul, haus sik, rot, bris, ples balus, na dua i op bilong ol papa graun i ken statim ol kainkain bisnis.

Lupari i askim tu Mineral Resources Development Company long go het na lukautim gut ol man bilong ol papa graun bilong Ok Tedi na ol arapela main long PNG.

UNDP painim rot bilong helpim ol Isten Hailens meri

MAUSMAN bilong Yunaited Nesen Developmen progrem (UNDP), Peter Witham i tok mikrokredit skim o liklik rot bilong mekim dinau bilong statim bisnis em i as tru o rot tru bilong bringim developmen long ol meri long Papua Niugini. Em i mekim dispela toktok insait long tu de maikro kredit woksop long Goroko. Dispela woksop i glasim sampela rot bilong kamapim ol manmeri na pikinini olsem ol gutpela pipel.

AIVA TAMATE i raitim

As tingting bilong dispela woksop em bilong kamap wantaim wanpela bodi i gat mausman i kam long ol komiyuniti ogenaísesen, non-gavman ogenaísesen na ol arapela grup i gat mani long toktok na painim rot bilong strongim maikrokredi skim bilong helpim ol meri. Moa long 35 manmeri i kamap long dispela woksop.

Ol lain i kam long dispela woksop i sapotim tru tingting olsem gavman i mas kamapim ples we i luk gutpela bilong ol meri long go het wantaim dispela skim. Ol i laikim gavman i mas stretim ol rot, bris, plés balus, skul, haus sik bai i mekim isi long wok bilong maikrokredit skim i ken go het long ol ples ausait long taun. Dispela bai helpim ol meri long kisim ol samting bilong ol i go na kam long maket na salim bilong kisim mani.

Mista Witham i tok UNDP, i redi long go het wantaim ol wok bilong em long kreditskim bilong ol meri long Goroko. Tasol em i askim tu ol arapela lain long Isten Hailans provins long sapotim tu ol meri.

Ol arapela bikmanmeri i stap long dispela bung em long minista kaunsela bilong AusAID, Anmaree O'Keefe na Gavana bilong Isten Hailens, Peti Lafanama.

Planti pipel i hangre long rit na rait

WANPELA MAN bilong raitim buk na tumbuna stori, Russel Soaba em wanpela bilong ol man husat bai givim toktok long literisi na tok pait.

BARBARA MASIKE i raitim

Dispela tok pait bai kamap long Yunivesiti bilong Papua Niugini (UPNG) long Septemba 10, siks kilok abinun. YWCA i oganasim dispela tok pait long soim gavman olsem planti manmeri long kantri i nidim stret skul long save long rit na rait.

Ol narapela man husat bai toktok tu long dispela taim, em Dokta Antonio Salvadori na Sakarepe Kamene ol tisa long UPNG.

Ephraim Manhi wanpela sumatin long UPNG na


Janet Pat, Kodineta bilong YWCA literisi progrem. YWCA long kantri i bin oganasim.

Het tok bilong dispela tok pait em ol i kolim long "literisi, em rait bilong ol man" na dispela tok pait bai kamap wantaim Nesenel Literisi Wik long narapela wik.

Mausman bilong YWCA, Josie Sataro i tok dispela tok pait bai soim olsem literisi em rait bilong ol manmeri na Nesenel Literisi Awenes Karikulum Developmen yuniti bai rekodim dispela long video tep.

Ol bai lukautim dispela kaset na yusim long bihain taim bilong skulim ol manmeri na pikinini.

CONCENTRATED CLEANING POWER



SBDC helpim yu wantaim liklik wok bisnis



GUTPELA LONG WAN MAN BISNIS

Wan man bisnis em wangepela man tasol husat i ting em i ken mekim samting i kamap. Bilip long wanem strong na save yu gat long mekim wok na winim ol traim na hevi inap kamap.

Wan man bisnis i gat bikipela wok na hevi long em yet. Hevi bilong em i bikipela winim hevi bilong menesa bilong kampani husat i save mekim plen na putim ol aidia na ol wokman i save karimaut wok. Wan man bisnis i gat planti wok tu bikos em yet bai go pas long wok na em yet bai karimaut na salim ol samting bilong bisnis.

OLGETA LONG WAN MAN BISNIS

Olgeta samting yumi ken glasim long pasin bilong wan man bisnis. Planti manmeri i gat dispela kain pasin, tasol ol wan man bisnis i save gut long dispela kain pasin na ol i save yusim moa na kisim na kamapim samting.

Bai yumi ken glasim na skelim dispela kain pasin na yu yet i ken skelim i kam bek long yu yet sapos yu gat dispela kain pasin o nogat. Traim na luksave long ol strong na hevi bilong yu yet na skelim wanem kain rot yu inap stretim ol.

- Bilip long yu yet: Man i mas bilip long em yet olsem em i ken mekim samting i kamap. Bilip long wanem strong na save yu gat long mekim wok na winim ol traim na hevi inap kamap.

- Strong na mekim wok: Strongpela na trupela wan man bisnis i no save kisim gutpela malolo. Em i ken wok longpela aua na long wiken em i wok yet, maski arapela i kisim malolo i stap tasol em i wok yet.

- Pasin bilong lida: Soim pasin tru bilong lida long ol wokman. Soim pasin na save we ol arapela bai lukim na bilip na givim yu sapos bilong mekim wok wantaim. Tokim ol arapela long wanem samting ol i mas mekim.

- Strongpela na gutpela wok bung: Yusim ol gutpela rot bilong arapela i bilip na laikim yu. Yusim bisnis na arapela kontek long kamapim dispela plen bilong yu.

- Strong long kamapim gutpela wok: Wok strong long kamapim gutpela samting we i gutpela moa long olupela samting long bipo.

- Save long stretim hevi: Save long stretim ol hevi, na go fowet stret long ol hevi na stretim.

- Olgeta taim painim gutpela rot: Traim long lukim na painim ol gutpela rot bilong mekim samting bihainim. Kamapim ol gutpela plen na painim ol rot bilong kisim helpim long kirapim ol nupela wok na tingting.

- Wari long kamapim gutpela samting: Olgeta taim tingim long kamapim gutpela wok na gutpela kaikai bilong wok i mas kamap.

- Strong long wok hat: Wok strong long pinisim ol wok wantaim strong na bilip bilong yu long kamapim samting.

- Redi long kisim hevi: Redi long stap insait long hevi sapos i kamap long bisnis na stretim stret long taim hevi i kamap.

- Yusim tingting long mekim ol samting: Mekim samting pastaim long arapela i tokim em long mekim.

- Sanapim Plen: Makim plen na gol bilong wok i go fowet long en na kamapim kaikai bilong en.

- Gutpela man bilong mekim ol plen: Kamapim na mekim ol plen bilong bihainim isi isi i go inap long mak yu makim pinis long bungim. Glasim na skelim ol senis we i wok long kamap long wok na putim nupela plen bilong wok i go bihainim long bungim mak yu sanapim pinis long kamap long en.

- Mekim arapela i wanbel long yu: Yu ken toktok wantaim arapela bisnisman long mekim bisnis wantaim ol. Yusim sampela strongpela biknem man long bisnis bilong yu i ken go fowet long mak bilong em.

- Painim moa save na tingting: Save gut long ol kastoma, saplaia na arapela bisnis husat bai resis wantaim yu. Toktok wantaim ol saveman bilong bisnis long sampela gutpela save. Yusim ol savelain o bisnis poroman bilong yu long kisim moa save na aidia long mekim wok bisnis bilong yu.

- I ken senis: Save long stiaim bisnis i go long narapela rot sapos i gat hevi i kamap. Mekim wok ekstra wok long pinisim ol wok bilong yu. Sanap strong long bilip na save bilong yu sapos i gat ol tok beksait o salens i kamap.

- Tingim long wokim profit: Bikipela as tingting bilong mekim mani na pulim sampela profit bilong bisnis long ron gut i mas stap strong long het bilong yu oltaim.

Long kisim moa tingting na helpim long wok bilong Smol Bisnis Developmen Kopresen (SBDC)

**ASKIM:
FRANCIS DAKENNY,
SBDC INFOMESAN KODINETA
PO BOX 286,
WAIGANI, NCD**

Gavman i no tokaut yet sapos VAT i ken go het o nogat

GAVMAN bai putim 10 pe sen takis antap long planti samting i save kam insait long Papua Niugini na rausim 11 pe sen takis we ol i save kisim long tariff na 3 pe sen sales takis ol i save kisim long wan wan provins. Dispela provinsel takis em i no wankain long olgeta provins. Sampela i save kisim antap na sampela daunbilo. Wantaim VAT bai i gat wangepela takis bilong 10 pe sen tasol long olgeta samting i go daun long olgeta provins.

Gavman i kamapim VAT bikos: namba wan em i laik skelim gut takis long wok bisnis insait long Papua Niugini na autsait. Em i ting olsem taim em i mekim olsem em bai kirapim na strongim planti ol bisnis man long ronim ol bisnis. Long tingting bilong ol saveman bilong IRC, John Lohberger na Nik Soni, planti bisnis bai kirap sapos VAT i kamap. Na namba tu as tingting bilong VAT em olsem, planti lain pipel long PNG bai baim takis na dispela i ken helpim gavman long kisim inap mani bilong yusim long wok developmen long kantri. Ol saveman bilong IRC i tok nau yet liklik lain tasol i save baim takis. Tasol wantaim VAT, olgeta lain i baim kaikai na yusim ol sevis we gavman i sasim VAT long ol, bai baim takis na dispela em i gutpela. Ol i tok tu olsem VAT bai kamapimol liklik takis long ol aid projekts. Dispela i min olsem wantaim dispela takis sistem yumi gat, gavman i no save sasim takis long ol lain i bringim sevis long gutpela pasin. Olsem aid projek bilong wokim haus bilong ol plisman na ami na ol kain samting olsem. Long dispela as, planti ol lain husat i save bringim aid o helpim sevis i kam long PNG i save baim ol samting long arapela kantri bikos prais bilong ol samting ol i laik kisim i kam long PNG em i gutpela. Na ol i bringim i kam insait long PNG tasol gavman i no inap kisim takis. Olsem na gavman i no mekim mani. VAT long PNG em i no wankain long VAT long ol arapela kantri ol i tok. Ol i tok, ol i yusim singel ret sistem. Ol i tok tu olsem VAT ol i tingting long yusim long PNG em i no regressive system.

ERICSSON

business phone **Telephone Systems**

I no bikipela moni, Isi long yusim, Planti kainkain we long yusim.



Bilong liklik na bikipela bisnis tu.

- Kontrolim kos bilong telipon bilong yu
- Toktok gut long ol kastoma
- Kamapim gutpela bisnis wok

ERICSSON

ERICSSON BUSINESS COMMUNICATIONS
CROTON STREET, HOHOLA,
P.O. BOX 5602, I OROKO.
LAE Office, P.O. BOX 2593, Lae Morobe Province.

RINGIM ERICSSON KASTOMA SELS TIM *business phone*

Ol nupela kabinet minista bilong Solomon Ailan

PRAIM MINISTA Bartholomew Ulufa'alu i makim pinis ol nupela kabinet minista bilong em. I gat 15 minista olgeta long nupela gavman bilong em.

- | | |
|-------------------------|--|
| 1. Baddeley Devesi | - Deputi Praim Minista na Minista bilong Trensport, Woks na Yutilitisi; |
| 2. Jackson Piasi | - Lens na Hausing; |
| 3. Hilda Kari | - Fores, Envaironmen na Konsevesen; |
| 4. Manasseh Sogavare | - Fainens Minista; |
| 5. Patterson Oti | - Foren Afeas; |
| 6. Fred Fono | - Developmen Plening; |
| 7. Japhet Waipora | - Provinsal Gavman; |
| 8. Rev Leslie Boseto | - Hom Afeas; |
| 9. Rodney Mannie | - Edukesen na Trening; |
| 10. Enele Kwanairara | - Komes na Turisim; |
| 11. Walton Naeson | - Mains na Eneji; |
| 12. Dokta Steven Aumanu | - Agrikalsa na Fisaris; |
| 13. Dickson Warakohia | - Helt na Medikel Sevises; |
| 14. Lester Saomasi | - Plis na Nesenel Sekyuriti; |
| 15. Robin Mesepitu | - Ol Meri, Yut na Spot. |

Praim Minista Ulufa'alu i tok Solomon Ailan em i liklik ailan kantri tumas. Olsem na gavman bilong em i no inap long tokim ol biknem ovasis kantri olsem Ostrelia na Nu Silan, na tu ol helpim moni haus olsem Wol Benk na Intanesenel Moneteri Fan (IMF), long wanem kain rot ol i laikim helpim moni i go long developim kantri. Em i tok

kain pasin bilong kros wantaim ol long dispela i westim taim.

Em i tok wanem samting gavman bilong em bai mekim long putim ol dispela helpim mani i go long ol ol wok we gavman i lukim i gutpela long developim laip na sindaun bilong ol pipel.

Ripot i kam long PACNEWS

Senis long plis fos daunim raskol pasin long Honiara

SOLOMON AILAN: Dispela em wanpela gutpela stori we plis fos long Papua Niugini i ken lainim na traim bihainim. Plis fos long Solomon Ailan i stretim nau wok bilong em long pait egensim raskol pasin wantaim ol arapela lo na oda hevi long biktaun, Honiara. Na sampela gutpela kaikai i kamap, bikos long ol dispela senis.

Plis Komisina Frank Short i go pas long dispela. Short i bilong Ostrelia, tasol mama i bin karim em long Gret Briten.

Ripot i tok ol dispela senis i mekim na raskol pasin olsem bilong brukim haus o opis na stil, pasin nogut bilong baim na smokim ol spak brus,

na salm bia long blak maket i go daun. Hatwok na ol gutpela senis em Short i bringim i mekim na nogat moa hevi bilong ka na trak i paspas long ol rot long biktaun Honiara. Bipo em ol ka save ron isi isi long rot. Mekim na ol draiva na pasindia save bel kaskas stret. Bikos long go long narapela hap long biktaun bai kisim longpela minit o aua stret.

Ripot i tok moa olsem Short i mekim na nau ol plisman i gat disiplin na wokhat gut.

Wanpela bikpela senis em i mekim em long mekim odit o sekim ol buk na pepa wok wantaim moni bilong plis fos long Solomon Ailan. Em i sekim tu kos bilong ronim pepa wok

o opis wok bilong plis fos. Bikpela astingting bilong dispela em long daunim kos bilong ronim plis fos. Na plis fos bai wok gut long sevim stret na gut ol pipel bilong kantri.

Short i tok klostu bai em tokim nupela Praim Minista, Bartolomew Ulufa'alu, na kabinet bilong em long dispela ripot bilong plis fos.

Short i gat nem long wok plis na sekyuriti long Inglen, na tu long planti arapela liklik kantri long Afrika, Ejsia na Pasifik, husat i bin stap aninit long lukaut bilong Gret Briten long bipo. Long Pasifik, em bin wok long Ostrelia na Vanuatu.

Ripot i kam long PACNEWS

Man wantaim gan sutim indai pikinini

LONG pinis bilong mun Ogas, wanpela man wantaim gan i sutim indai wanpela boi husat i gat 5-pela krismas tasol. Plis i givim nem bilong dispela boi olsem Dillon Hull.

Plis ripot i tok boi ya i bin stap wantaim was papa bilong em, taim birua ya i kamap long wanpela rot long Bolton, Menjesta, Gret Briten. "Em i hat tru long makim kain man husat i ken kamap na sutim wanpela pikinini long gan." wanpela opisa husat i go pas long wok painimaut long dispela birua i tok. Plis i bilip olsem birua ya i kamap bihainim sampela asua long pasin bilong baim na smokim ol marasin nogut bilong spakim bodi olsem spak brus. Plis givim nem bilong was papa bilong dispela pikinini olsem John Bates, husat i gat 28 krismas.

Ripot i tok Bates na pikinini bilong em i bin wokabaut arere long haus. Na wanpela man husat i putim kain helmet bilong putim wantaim na ronim motobaik i sut long tupela long gan. Man ya wantaim gan i sut long tupela tripela taim. Na bihain em ranawe i go daun long rot.

Ol doka i katim bodi bilong pikinini ya na lukim wanpela katres insait long em. Dispela i soim olsem wanpela katres tasol i kilim indai dispela pikinini. Mista Bates em katres i sutim em long bel. Em i pilim orait na go bek stap long haus, wantaim karim mama bilong dispela pikinini, Jane Hull. Plis i tok ol bai putim strongpela lukaut long haus bilong Jane Hull na namba tu man bilong em, Bates. Ripot i tok Bates na was pikinini bilong em Dillon i bin stap insait long haus na lukim tele-

visen. Na wanpela man wantaim gan i sut tupela taim i go insait long haus.

Tumbuna man bilong Dillon i tok, Dillon i gat wanpela yangpela brata, Codie, husat em mama Jane i karim wanpela mun bipo long birua ya i kamap. Na pikinini Codie i gat marasin nogut, em ol i kolim heroin insait long blut bilong em. Pikinini i stap yet long haus sik, we ol doka i traim long stretim wantaim sut marasin.

Ripot i tok mama bilong Dillon na Codie, Jane i gat nem long yusim heroin, we plis i gat save.

Tupela yia i go pinis, kot bin kalabusim Bates long 21 mun olgeta. Dispela em long sas bilong heroin.

Ripot i kam long The Guardian Weekly



WOL NUS



1961 - 1997

Prinses Diana indai

Frans bai kotim ol kamera man long indai bilong Prinses Diana

SEVENPELA kamera man husat em plis long Frans i holimpasim na givim sampela askim long indai bilong Diana, Prinses bilong Wales, bai sanap long kot long sas bilong mekim na Diana i dai. Ripot i tok dispela bai kamap, maski i gat ripot olsem draiva bilong ka i spit na ka i pam.

Ripot i tok ol kamera man bai kot tu long sas bilong mekim na boipren bilong Diana, Dodi-al-Fayed tu i bin dai.

Ripot i tok ol kamera man husat i bihainim Prinses Diana na Dodi long kisim piksa, i mekim na ka i pam insait long rot i go aninit long graun. Nau yet ol kamera man i kisim bikipela tok hevi long dispela. Na i no draiva em ripot i tok i bin dring planti bia o strongpela dring, we i winim mak em lo i oraitim bipo long holim stia bilong ka.

Plis husat i painimaut long dispela birua i tok ripot olsem draiva i spak i no daunim ripot bilong ol kamera man long mekim long birua ya i kamap. Bikos i gat strongpela bilip olsem ol i as bilong dispela trabel. Birua i bin kamap bipo long 12 klok

nait long Sande (Yuropian taim). Bihain long birua, plis i bin holim pasim dispela 7-pela man long 48 aua olgeta. Na givim sampela askim long ol.

Ripot i kam long ol loya i tok ol i go het nau long redim ol sas bilong kotim dispela 7-pela kamera man.

Ol loya i tok moa olsem ol bai tingim tu sas bilong ol kamera man ya long i no givim sampela kwik helpim taim ol i lukim dispela birua. Long Frans i gat kain lo olsem sampela yu lukim wanpela birua, na i no givim helpim long sevim wanpela laip, yu ken sanap long kot.

Ol niuspepa ripot i tok i gat bikipela sans long sampela bilong dispela 7-pela kamera man i kalabus aninit long dispela sas.

Ripot i tok 6-pela bilong ol dispela kamera man i bilong Frans. Na wanpela i bilong Macedon. Olgeta i tok ol i no as bilong dispela birua. Sampela ripot i tok ol kamera man i tok ol i ron sampela 100 mita bihain long Mercedes ka, em Prinses Diana i ron long em, we i pam.

-AAP



• Piksa bilong Diana taim em i gat 19 krismas, bihain tasol long em i maritim Prins Charlie long 1981.

Diana no amamas na marit i bruk

PRINSES Diana, i bin maritim Prins Charles long 1981 taim em i gat 19 krismas tasol. Dispela taim em Prins Charles i gat 31 krismas.

Taim tupela i tokaut olsem tupela bai marit, Prins Charles i tok, "Mi amamas olsem em i strongim tinging na bilip bilong em long maritim mi."

Marit bilong tupela i bin kamap long bikipela Santu Paul haus lotu long Inglen. Dispela i bin wanpela bikipela marit stret, we i holimpas ai bilong planti manmeri long dispela graun. Bikos olgeta niuspepa, redio na televisen long wol i ripot long dispela marit, we i kamap nais tru. Daina i bilas long waitpela longpela klos we i hanagapam i kam bihain long em.

Em i karim tupela pikinini man, Prins William na Harry. Prins William bai kisim ples bilong papa bilong em, na kamap King bilong Inglen.

Sampela yia bihain long marit bilong Prinses Diana long Prins Charles, planti foto i piksa bilong em i save kamap long ol niuspepa na televisen long wol.

I kam na taim ripot bilong marit bilong em na Prins Charles i laik bruk, em i kamap wanpela meri long wol we i gat moa poto long niuspepa na televisen.

Tasol wanpela yia i go pinis tupela i brukim dispela marit. Diana painimaut olsem dispela marit i no gutpela, maski em i gat planti amamas wantaim moni, kisim biknem. Marit bilong tupela i stap strong long 15 yia tasol.

Prinses Diana save stap bilong em yet. Na Charles save prenim olpela prenmeri bilong em, Camilla Parker.

Diana i lusim tupela susa na wanpela brata, husat i marit na stap long Saut Afrika. EM i lusim tu tupela pikinini man bilong em, husat i gat nau namel long 20 na 10 krismas. Mama bilong em i stap laip yet.

Meri bilong helpim ol trangu pipel

LAIPSTORI BILONG PRINSES DIANA

WANPELA bikipela samting Prinses Diana i save pait egensim em sik leprosi, AIDS, na ol bom bilong woa taim we i stap hait aninit long graun, na kamapim birua long laip bilong planti manmeri na pikinini long wol. Ol kantri we Prinses Diana i limlimbur pinis long sekim ol ol dispela bom, na tok strong long ol gavman long rausim em Angola long Afrika, na Bosnia long Yurop.

Prinses Diana save givim bikipela helpim tu long wok bilong ol helpim grup long graun, husat i sanap long helpim ol sikman meri long dispela graun olsem ol AIDS. Em i lusim dispela graun taim em i petron o wasmeri bilong ol dispela helpim grup.

Long ol AIDS sikman meri na pikinini, em lukluk raun long planti haus sik long wol. Na holim han na toktok long ol dispela sikman meri, husat i bilip olsem ol i nogat moa laip long dispela graun. Taim ol i bungim Diana, ol save pilim amamas. Na kisim gutpela tingting long strongim bilip bilong stap laip na amamas long dispela graun. Maski ol i gat bikipela sik nogut. Long Angola, em bungim na holimpas ol manmeri na pikinini em bom i katim lek han o sampela hap bilong bodi bilong ol. Na toktok wantaim ol sikman meri na pikinini.

Em i mekim ol dispela wok wantaim amamas, maski em i gat hevi bilong em yet. Ol dispela hevi i stat long taim em brukim marit wantaim Prins Charles. Na Prins Charles save pren raun wantaim olpela prenmeri bilong em, Camilla Parker.

Brata sutim tok long ol niusman meri

EARL SPENCER, brata bilong Diana, husat i stap nau long Saut Afrika i sutim tok long ol niusman meri long indai bilong susa bilong em. Em i tok "ol niusman meri i gat blut long han bilong ol" bikos long dispela indai.

"Mi save long bipo yet olsem ol niusman meri yet bai kilim susa bilong mi. Bikos olgeta taim ol save bihainim em tumas olsem blulang, na laik kisim piksa na stori bilong em. Ol i no save larim em i stap long ama-

Ol dispela samting i bagarapim olgeta pren o wok bung bilong em wantaim Royals Famili. Tasol em save bilip na amamas long em yet long ausait. Insait em save stap wantaim wari. Ol kamera man save bihainim tumas long kisim ol kainkain poto we em i limlimbur o amamas wantaim ol nupela boipren o wanwok bilong em. Na salim long bikipela moni tru. Em save painim hat stret long hait long ol. Na amamasim praivent laip na sindaun bilong em.

Bipo long indai bilong em, em bin holim bikipela honsen sel long Amerika, we em salim ol olpela klos laplap bilong em long ol maniman meri. Moni bilong ol dispela klos laplap i winim K2 milien. Dispela bikipela mani i bilong givim long helpim ol trangu manmeri bilong dispela graun. Em i mekim dispela bihainim tingting o askim bilong namba wan pikinini man bilong em, Prins William, husat bai tekova long papa, Prins Charles long kamap King bilong Briten.

Nau yet ol bikipela helpim grup long olgeta hap kona bilong dispela graun i stap wantaim bikipela wari tru. Bikos Diana em wanpela meri husat i save go pas long helpim na promotim go bikipela wok bilong ol.

Ripot i tok bikipela samting long laip bilong Prinses bilong Wales, Diana em long tupela pikinini man bilong em, Prins William na Harry. Em i tok maski em i lusim pinis Royals famili bikos em i brukim marit wantaim Charles, em bai mekim olgeta samting long helpim pikinini Prins William i kamap gutpela king. Na tu em i redi tu pikinini Harry long luksave, na sapatim bikipela brata William long wok bilong em.

masim fri taim bilong em. "Nau mi ken tok olsem ol yet i putim han long indai bilong em," Earl i tok.

Earl i tok moa olsem "i luk olsem olgeta edita, na papa o bos bilong ol niuspepa, redio na televisen kampani, husat i baim bikipela mani long ol piksa bilong Diana i gat blut long han long indai bilong Diana. Ol i as long indai bilong susa bilong mi."

...AAP...

Toksore bilong Frans Presiden, Jacques Chirac

Diana, Prinses bilong Wales, em i wanpela yanpela meri bilong tude. Long laip bilong em, em i pulap long pasin bilong helpim ol arapela. Mipela olgeta bai stap wantaim sore long dispela indai bilong em. Bikos planti manmeri bilong dispela graun i save harim stori, na lukim piksa long ol gutpela helpim wok em i save mekim. Olsem na mipela olgeta bai sore long em.

Kwin oraitim bikipela las lotu long Prinses Diana

BIKPELA las lotu stret bai kamap long bodi bilong Diana, Prinses bilong Wales. Maski Diana i no moa memba bilong Royal famili, askim bilong holim dispela bikipela lotu i kisim pinis tokorait bilong Kwin Elizabeth II long dispela wik Mande yet.

Ripot i kam long opis na haus bilong Kwin Elizabeth II i tok ol i no laik givim nem "Royal" long dispela lotu. Ol i tok tasol olsem lotu bai kisim bikipela namba stret. Bikos Diana em i wanpela spesel meri. Lotu bai kamap long Sarere. Na opis bilong Kwin i invaitim pinis moa long 2,000 bikman meri long kamap. Ol dispela bikman meri bai kam long kain kain hap bilong wol.

Long Briten yet, planti stua, opis, ol pablik trenspot, na kainkain pilai bai stap long taim bilong lotu. Dispela em long larim ol pipel i lukim lotu long televisen. Em i olsem mak bilong soim las rispek long wanpela gutpela meri, husat i bin mekim bikipela hatwok long helpim ol trangu manmeri. Na bringim amamas long dispela graun.

Man bilong Prinses Diana na bihain taim king bilong Briten, Prins Charles i bin holido wantaim tupela pikinini man bilong tupela, Prins William na Harry long Skotten taim birua i kamap.

Taim em kisim dispela ripot long indai bilong olpela meri na mama bilong tupela pikinini man bilong em, bel na lewa bilong em i pas olgeta. Long Sande moning tru em tokim tupela pikinini man long dispela birua. Bihain em lusim tupela na flai i go long London, we em bungim tupela blut susa bilong Diana, na ol i go long Paris. Na kisim bodi bilong Prinses Diana i go bek long Briten.

Balus we i kisim bodi bilong Diana i go bek long Briten em wanpela Royals Skwadron balus.

Dispela nius long indai bilong Diana i kamap pinis long mama bilong em, Frances Shand Kydd long haus bilong em, we i stap long wanpela ailan long Skotten.

Long Sande, pater long peris bilong em i lukim dispela nius long indai bilong Diana long televisen. Nem bilong dispela pater em Sean MacAulay bilong Santu Columba haus lotu. Em i tok "mi bin givim gutpela tingting long wanpela man husat i gat sampela bikipela wari na laik kilim em yet. Bihain mi wokabaut i go antap long haus na putim televisen i on, na harim olsem Diana i dai pinis," em i tok.

"Mi ringim mama bilong Diana, Frances, na em tokim mi olsem ol i kilim pinis Diana. Em i tok sampla famili pren i harim long dispela nius. Olsem na ol draiv i go long haus na stap wantaim em.

Toksore bilong Prais Minista bilong Briten, Tony Blair.

Diana em i wanpela gutpela naispela meri em planti pipel long Gret Briten na olgeta hap bilong dispela graun i laikim, na bai stap wantaim sore na tingim em olsem wanpela gutpela pren. Tude, mipela olsem ol pipel bilong wanpela kantri i kalap nogut tru long indai bilong em. Na stap wantaim bikipela sore.

LAIPSTAIL

KANAGE

"Em nau, narapela wik bilong mi ken"



□ Kanage wantaim sampela wantok i wetim pmv bilong go long ples Kainantu. Ol i sanap long Eriku long Lae i stap na wanpela waitman tu i laik go long Kainantu na em i kam stop na askim, "who's going to Kainantu, jump on." Kanage muvim olgeta lain i go long beksait na em yet saitim long fran wantaim waitman ya. Ol i draiv i go na waitman i mekim ol stori long tok Inglis na Kanage i no save. Tasol em i wok long giaman lap na muvim het bilong em tasol. Olgeta taim waitman i toktok bai Kanage i lap na muvim het na tok, "Agenes o, mi kam o". Waitman i harim na askim Kanage gen, "whats the kilometer from here to Kainantu?". Kanage harim na subim het i go ausait long windua na tokim ol lain long beksait olsem, "yupela holim strong, masta i tok bai em i givim long 60". Taim ka i kamap long Wararais na abusim go antap liklik long Kasam Pas, waitman i askim gen long amas kilomita bilong rot i stap yet. Na Kanage i mekim wankain samting gen. Em subim het i go ausait long windua na tokim ol lain, "ol lain o, holim strong o, masta bai givim long 60". Taim waitman i harim olsem, em stopim ka na rausim Kanage na olgeta lain i go daun na em yet draiv i go. Olgeta lain i kros nogut tru na askim Kanage long wanem samting i kamap. Na Kanage tok, "Agenes em gel pren bilong mitupela wantaim olsem na em kros bikos mi spikim Inglis moa yet winim em."

Ted Maya
Kerevat,
Is Nu Briten provins.

■ Kanage i bilong Sepik tasol em i stap long Wau long Morobe provins. Wanpela taim em wantaim ol manki i stori i stap na wanpela man tolai i kam. Olsem na Kanage i singautim man ya na askim em, "tobaras, yu bilong wanem hap tru long Rabaul?". Na man ya tanim na tok, mi bilong Vunapope. Kanage harim na holim em pas na tok, "mi wantok bilong yu stret ya tasol mi no save toktok long yu. Ples bilong mi em long Vunakapriman arere tasol long ples bilong yu".

Richard Mari
Wau,
Morobe provins.

□ Kanage i bilong Morobe na em i bin pinis wok long Fraide na kisim potnait. Orait em i go kamap long taun na baim wanpela 6 peks long Best Buy stua na em karim long plastik na wok-about i go daun long sot kat rot bilong Mambu Taven. Em i go sindaun na dring i stap na tupela meri hailans i spak na i kam. Tupela lukim Kanage i dring i stap na tupela giaman saitim em. Wanpela i wisel long Kanage na tok, "hei bras, yu gat sampela tingting o?". Kanage tanim na tok, "tingting long wanem, tingting long kol rais ya?. Sapos em i hot yet na nupela yet bai orait. Tasol nau em i kol pinis". "Karim i go bek long kol ples antap na ol yet bai skelim". Kanage i tok olsem na tupela meri ya i les long toktok moa na kirap lusim dispela hap na go.

Kanage Spai
Lae



• Ol mameri husat i bung long welkamim na harim toktok bilong New Zealand foreign ministra Don Mckinnon long las fraide long Ogas 29. Foto: Veronica Hatutasi.

Kirapim bek Bogenvil

VERONICA HATUTASI
i raitim

GUTPELA sindaun na pinisim ol hevi na trabel long Bogenvil em ol bikpela poin we ol pipel bilong provins i tingting long em taim ol i putim han wantaim long wok strong long dispela taim.

Gutpela wok bung wantaim, pasin bilong toktok na wok olsem ol pren em samting we i kamap nau namel long ol Bogenvil Revoluseneri Ami, ol resistens memba, ol sekyuriti fos, ol siefs, ol meri na sios grup na komyuniti long olgeta hap bilong provins.

Em i kisim 10-pela kismas olgeta long ol grup ya we ol i birua tru long kamap long dispela gutpela luksave long las mun tasol. Pret pasin long wanpela arapela long ol birua grup i wok long lus insait long dispela liklik taim bihainim bun bilong ol Bogenvil lida Wanem samting i kamapim dispela gutpela pasin bilong toktok na wok bung wantaim?

Kantri Nu Silan na gavman bilong em. Long las mun em i bungim wantaim ol lida bilong Bogenvil long sindaun wantaim, kamapim bel isi pasin na toktok long sampela gutpela rot we ol i bihainim long pinisim ol hevi long ailan bilong ol yet.

Dispela yia 1997 em i 10-pela yia bilong ol trabel long ailan Bogenvil. Na insait long dispela taim, planti bung i kamap. namel long ol Bogenvil lida na nesenel gavman, planti tok promis, planti mani i lus na planti tausent manmeri na pikinini long Bogenvil na tu long sait bilong ol sekyuriti fos na plis i dai insait long dispela pait long ailan.

Planti pipel long Bogenvil i sutim tok long Australia olsem wanpela bikpela as long ol trabel i kamap long Bogenvil na bagarapim laip

na gutpela sindaun bilong planti tausent pipel long ailan.

As long dispela en em papa bilong Panguna Kopa Main we hevi long Bogenvil i kirap long en em wanpela bikpela maining kamap bilong Australia yet, Conzinc Riotintji ov Australia (CRA). Na Australia wantaim PNG gavman i kisim bikpela belkros long ol papagraun na planti pipel long Bogenvil bikos ol i no riviuwim o glasim gen maining agrikmen bihain long olgeta 7-pela kismas. Dispela i bihainim luksave na agrimen long dispela samting we gavman i mekim wantaim ol papagraun, bihain long Bogenvil Rijnol memba, Pater John Momis i bin toktok strong na nesenel gavman i bin top orait long en.

Narapela samting tu em ol BRA i lukim olsem Australia i saplaim helikopta, ol samting bilong pait wantaim na helpim long trenim ol soldia bilong PNG long dispela pait long Bogenvil.

Long ol dispela as na belkros bilong ol pipel bilong Bogenvil, moa yet ol BRA, ol i no laik karimaut ol toktok long stretim hevi insait long Bogenvil wantaim Australia. Tasol ol i laikim helpim bilong kantri Nu Silan long dispela samting bikos em i no helpim wanpela sait. Em i stap olsem namel kantri we i gat kliapela save long dispela hevi long Bogenvil. Na em i sanap sambai long givim helpim bilong em Dispela bung bilong ol Bogenvil lida long Nu Silan i no kamap nating, nogat. Em i kamap bihainim planti toktok na bung namel long Bogenvil Primia we nau em Gerard Sinato i holim i stap, ol BTG memba, komyuniti long Bogenvil, nesenel gavman naol BRA/BIG lida.

Hevi i stap long 10-pela kismas na ol pipel long Bogenvil i les pinis long en. Les long nogat ples long sindaun long em bikos ol haus bilong ol i bagarap taim ol birua grup i

pait, sot long klos kaikai na ol planti arapela samting, ol pikinini i no go skul, ol no kisim gutpela helt ke, les long wari sapos ol bai i kirap long lukim narapela de laip na ol arapela samting moa.

Insait long dispela wo, ol BRA paitman tu i save kisim taim stret bikos ol i mas was oltaim long ol birua bilong ol olsem ol resistens grup na ol lain sekyuriti fos. Bikos long longpela taim ol i stap long bus na ol i no kisim sevis, ol i sot long ol klos, marasin na ol arapela samting bilong helpim ol long go hetim gut laip na sindaun bilong ol.

"Nau em olgeta grup i les pinis long kain sindaun olsem na ol i tok inap long pait. Mipela i mas bung wantaim long stapim pait na kamapim gutpela sindaun bikos i no gutpela long ol pikinini na mama husat i kisim traipela hevi stret long samting we ol i no kamapim. Na bung long Nu Silan las mun wantaim ol tingting we ol Bogenvil lida i bin kamap wantaim ol i kolim long Burnham Dekleresen em bihainim dispela laik bilong wok bung wantaim na stretim hevi long ailan bilong ol yet", wanpela mama bilong Sentrel Bogenvil husat Wantok i bin nap long toktok long en long en long Buka las Fraide i tok.

Em i tok long Sentrel Bogenvil, ol BRA i wok long i go i kam long ol eria we gavman i lukautim, stat yet long 1994 taim Arawa Pis konprensi i bin kamap. Sapos ol pait na sampela samting i kamap namel long na ol sekyuriti fos, ol i save stapim dispela wokabout. Tasol dispela kain wokabout i gutpela bikos ol BRA i kisim sans long lukim wanem ol gutpela sevis na wok developmen nesenel gavman i kamapim long ol pipel we i kama aninit long lukaut bilong ol.

Mama ya i tok em i laikim tu ol sekyuriti fos i mas givim gutpela luksave na larim fri

muvmen bilong ol pipel i go i kam long tupela eria wantaim.

Bihainim dispela bung long Nu Silan, i luk olsem olgeta grup i gat bikpela laik long wok bung wantaim na i no olsem bipo we bihain long bung, yumi harim na lukim bel kros, pait na dai i kamap. Na ol wok i bagarap gen.

Long Siwai, Nagovis na long olgeta hap bilong bikailan Bogenvil, wok bung wantaim long kamapim gutpela sindaun, bel isi pasin na stretim ples i go strong tru.

Tasol wanpela samting we planti lain Wantok i bungim long Buka na toktok long ol i autim em long nogat mani bilong karimaut ol restorens wok na tu wok bilong kamapim gutpela sindun.

Peter Tengka, Distrik Manesa bilong Siwai Distrik i tok em i amamas tru long gutpela wok bung namel long olgeta grup i kamap na go het long dispela taim insait long distrik bilong em. Tasol dispela i kamap long hatwok bilong ol pipel yet bikos ol i laikim tru gutpela sindaun na sevis.

"Mi bin kisim wok olsem distrik manesa bilong Siwai Distrik na insait long 9-pela mun, mi no lukim o kisim hap mani i kam long helpim go hetim wok bilong restorens na kamapim bel isi pasin long Saut ews Distrik," Mista Tengka i tok.

Mama bilong Sentrel Bogenvil i bin autim wankain tingting long situesen long distrik bilong em.

Nau yumi askim we bikpela helpim mani yumi lukim gavman i katim i go long helpim long stretim Bogenvil i go long en.

"Em toktok tasol long apim nem long pablik o mani ya em ol i yusim long satarim helikopta na mekim ol dispela kain wok we tru tru, ol i katim long helpim go hetim ol wok restorens na bel isi pasin", planti lain Bogenvil we Wantok i kisim tingting bilong ol i tok..

• *Noken wes-tim taim... Ol yut manki long Mosbi i mekim sampela kain wok bilong wasim ka long kisim mani.*



Painim isi mani i kamapim les pasin

PLANTI taim yumi save karim na ridim long ol niuspepa olsem Tambul em i wanpela ples we planti manmeri na pikinini i save wok agrikalsa na mekim gutpela mani. Yes, dispela i tru tasol i no olgeta manmeri bilong Tambul i save wok na kisim mani long hat wok bilong ol.

MICHAEL MONDO
i raitim

Planti bilong ol dispela taim i save painim mani long isi we tru.

Dispela isi wei bilong mekim mani em long pilai kas we ol i kolim, "kwin-win" o Pasi - Pasi kas gem.

Dispela i no pinis bilong em long dispela sem hap sampela bilong ol bai hangamapim dat bod i stap i stap na ol bai singaut "simok 10t faiv spia" na tu ol bai singaut olsem Coke-Cola 10t tu spia.

Long ples bilong dispela ol manmeri bung long en bai yu lukim ol mama wantaim sampela man i lain ap gut tru na wok long salim buai, simuk, pinat, hom bek skon na planti ol narapela samting.

Wanpela samting, yu bai ino inap lukim wanela nupela pes man or meri.

Ol dispela lain em ol soim lain manmeri tasol.

Ol i save kirap long bk moning yet long 9 oklok o 10 oklok na wok long sindaun long traipela hot san i go painim 6.30 long apinun.

Taim tudak i laik karamapim ples ol i save go bek long haus bilong ol.

Neks moning ol i kam mekim wan kain samting tasol.

Dispela sem samting bilong pilai kas, Pasi Pasi na dat bod long simok na Coke-Cola i save go seven deis a wik.

Mi no save ol i save kaikai gut na slip o

nogat. Ol i save wok gaden tu o, em mi no klia yet.

Long olgeta de 10-pela o 20-pela kas kandis bai go on yet long olgeta de i go painim apinun. Manmeri husait i nogut mani long pilai kas a dat bai raunim wanpela bikpela banis autsait na raunim ol manmeri husait i pilai long en.

Bilong westim gutpela taim bilong ol, ol i save boskru long narapela husait i save pilai long en na tu sampela bai glasim nating tasol i stap.

Olsem mi tok pinis ol sem lain manmeri tasol bai stap.

Sapos yu go raun long ol narapela Hailens provins na tu long ol mein sentas bilong yumi long kain ples olsem ol setelmen olsem Mosbi, Lae, Goroka, Simbu, Mt Hagen, Enga, Mendi na planti moa, dispela sem sik olsem long Tambul i stap yet. Ol planti lain manmeri i kamap les manmeri tru bilong wok gaden.

Bipo dispela kain pasin i save stap long ol taun na siti tasol nau dispela pasin i wok long go isnait stret long ol asples bilong ol stret.

Planti yangpela manmeri i kamap les manmeri bilong wok isnait long ples stret bilongol.

Taim ol i lukim olsem ol i nogat mani long painim kaikai na mani ol i go sindaun long ples bilong pilai kas na dat long painim kaikai long ol wantok bilong ol.

Taim ol i no painim kaikai long dispela hap ol i go from haus tu haus painim kaikai.

Sapos dispela i nogat ol i kamapim pasin stil o kamapim pasin pamuk.

Dispela i mekim ol gutpela komuniti i kamap birua na long sem taim PNG bai inap kamapim ol les manmeri tru long bihain taim maski ol i gat gutpela graun.


93FM YUMI Redio Stesen bilong yumi yet Harim olgeta gutpela program long 93FM YUMI

- * Olgeta lokol sing sing, na ol musik bilong bipo yet
- * PNG Motors prais bilong kes krop
- * Yamaha Provinsel weda ripot
- * BSP liklik bisnisman ripot
- * Pepsi lunch hour rikwest
- * City Pharmacy Lukaut bilong bebi
- * Post (PNG) Ron bilong ol Sip
- * Ela Motors kantri kaundaun
- * American God
- * Sande Gospol so

Em rait redio stesen ikamap pinis harim long tok ples bilong yumi yet, 93FM YUMI

Salim rekwest i kam long: **YUMI** request
Locked Bag 93
Port Moresby, NCD.
Fax: 320 1995

PNG FM



NAUFM

YUMI

PNG FM PTY. LTD.
Trading as
NAUFM and YUMI FM
P.O. Box 774,
Port Moresby,
Papua New Guinea
Ph: (675) 320 1996
Fax: (675) 320 1995

Biang laikim Kopi rait lo long musik i mas kamap

JOE KANEKANE i raitim

KLOSTU long pinis bilong yia 1979 planti pipel long PNG bai save gut long dispela singsing, Karasiva we wanpela ben bilong Rabaul i wok long pilaim long dispela taim.

Dispela singsing em ol i bin singim long amamasim namba wan Malagan So long Niu Ailan.

Nem bilong dispela ben em Pila Zerkmates, husat i kisim dispela singsing long wanpela stringben bilong Niu Ailan na tanim i go long wanpela gutpela singsing tru.

Long dispela taim long NBC na ol provinsel redio stesin, dispela singsing i bin go pas tru long dispela laik bilong wanpela wanpela program.

Man husat i bin go pas long dispela ben em, Daniel Biang, wanpela namba wan man bilong kamapim musik long PNG.

Tude em i save wok olsem wanpela sels eksekutiv bilong Rothmans long Rabaul, na tu em i holim wok olsem wanpela siaman bilong Is Niu Briten Musik makers.

Biang i wok long mekim dispela tok long wanem em i bilip olsem planti bilong ol lain bilong mekim musik i wok long lusim planti ol gutpela sans long mekim mani long wanem i nogat sampela lo i banisim ol singsing bilong ol.

Mista Biang i tok olsem em i wanpela bilong dispela ol pes lain long statim musik insait long kantri, na em i tok olsem em i bilip olsem planti ol singa i lusim bikpela mani bilong ol.

Em i sutim tok i go long ol kampani i save mekim rekot olsem ol i no laik helpim ol lain bilong mekim musik, bikpela tingting bilong ol em i bilong



mekim mani long dispela ol lain.

Em i srukim tok olsem planti bilong dispela ol lain bilong mekim musik i no bisi long wanem kain mani ol i wokim, bikpela tingting bilong ol em long kamapim wanpela album.

Na, taim ol i kamapim dispela pinis, ol rekot studio i save kisim bikpela mani, na turangu ol lain bilong mekim musik i save kisim liklik mani ol royalti long kaset bilong ol.

"Nau yet planti ol gutpela ben na ol wanwan atis i wok long lusim gutpela wok bilong ol long han bilong ol rekot kampani.

"Tasol, maski sapos ol i mekim wanpela album, olgeta mani i save go long han bilong ol lain i save wokim ol kaset," em i tok.

Mista Biang i laikim bai gavman aninit long ministri bilong kalsa i mas givim sampela luk-save i go long pait bilong ol lain bilong kamapim musik.

Em i tok olsem gavman i save givim baksait long musik indastri, long wanem i no gat lo long banisim rait bilong ol singa.

"Gavman i mas luksave olsem musik indastri long kantri i wanpela bikpela bisnis na ol i mas kamapim sampela lo long helpim mipela, helpim dispela ol lain i save kamapim musik," em i tok.


Mista Biang i salensim ol lain bilong mekim musik olsem ol i mas kam wantaim na tokim gavman olsem ol i rere long kirapim sampela lo, we bai ol lain bilong mekim musik i ken

kisim sampela helpim i kam long kain eria olsem.

Biang husat i wanpela promotora bilong PNG musik i tok, tu olsem i nogat lo na olsem na kain kain man i ken go na mekim rekoting, maski sapos musik bilong ol i no gutpela.


Em i tok olsem kain tingting i no hat long wanem hap wok em i bilong olgeta atis na ol rekot kampani long kam wantaim na stretim dispela hap wok we i stap long longpela taim nau.

"Sapos mipela i laikim musik indastri long kantri long go het, mipela yet i mas go pas long kamapim ol lo we i ken helpim mipela, na mipela i noken pasim han na larim ol studio i makim mani long wok bilong mipela," em i tok.



TOP 20 This Week!

| L/W | T/W | SONG | ARTIST |
|-----|-----|-------------------|--------------|
| 2 | 1 | ERE BINI TU | KABANI |
| 1 | 2 | OPERESSIN RAUSIM | K. PINERI |
| 2 | 3 | SHERRY | S. SEREVI |
| 3 | 4 | AZZIMBA | AZZIMBAH |
| 7 | 5 | LESE MORI | AZZIMBAH |
| 9 | 6 | MAI TAURI AU | KABANI |
| 8 | 7 | STAP SORE | U. KANIA |
| 5 | 8 | MERI DOI | C. KUSKUS |
| 6 | 9 | TAMOATA | QUAKES |
| 13 | 10 | FROOKS LONG MI | AZZIMBAH |
| 7 | 11 | GIA BOX I BAGARAP | W. TROPU |
| 9 | 12 | NIPSCO | MOLACHS |
| 10 | 13 | O VAVINE | AZZIMBAH |
| 15 | 14 | MASINGE | K. PINERI |
| 16 | 15 | KALUNGA | W. TROPU |
| 18 | 16 | LULU | QUAKES |
| 14 | 17 | BOMANA | AZZIMBAH |
| 19 | 18 | ACTING YANG | WALI HITS |
| 12 | 19 | LAGATOI | HIRI BAND |
| 0 | 20 | JUSTINA | LEO WALILING |



NEM: Lydia Napio
KRISMAS: 22 (meri)
ADRES: PO Box 112, Ambunti, Is Sepik provins.
LAIKIM: Go lotu, wokim bilum, pilai volibal, wk gaden, harim PNG musik na raitim pas.

NEM: Joicelyn Wadaris
KRISMAS: 15 (meri)
ADRES: Kunjingini Primary School, PO Box 51, Maprik, Is Sepik province.
LAIKIM: Raitim pas na pilai spot.

NEM: Jenny Mangas
KRISMAS: 17 (meri)
ADRES: Kunjingini, Catholic Mission, PO Box 51, Maprik, Is Sepik provins.
LAIKIM: harim ol lokol musik na raitim pas long ol pren.

NEM: Elizabeth George
KRISMAS: 17 (meri)
ADRES: Kunjingini Catholic Mission, PO Box 51, Maprik, Is Sepik provins.
LAIKIM: Harim musik na pilai spot.

NEM: Nazzo George
KRISMAS: 15 (meri)
ADRES: Kunjingini Catholic Mission, PO Box 51, Maprik, Is Sepik provins.
LAIKIM: harim lokol PNG musik na tro-moi lek.

NEM: Nazi Tapukein
KRISMAS: 17 (meri)
ADRES: Kunjingini Catholic Mission, PO Box 51, Maprik, Is Sepik provins.
LAIKIM: Pilai gita, mekim tok pilai na stori wantaim ol pren.

NEM: Miso Joicelyn
KRISMAS: 14 (meri)
ADRES: Kunjingini Catholic Mission, PO Box 51, Maprik, Is Sepik provins.
LAIKIM: Lukim pilai na pilai volibal.

NEM: Frank Kandi
KRISMAS: 18 (man)
ADRES: c/ Nepol Pole, PO Box 1507, Goroka, Isten Hailans provins.

LAIKIM: Harim PNG musik, ritim buk na niuspepa, pilai volibal na basket-bal, raun lukim ol pren na narapela ples na senisim ol presen.

NEM: Jiwi Ess
KRISMAS: 18 (man)
ADRES: Woo Settlement Bialla, PO Box 180, Bialla, WNPB.
LAIKIM: Boskru long ol pmv, tok pilai, go lotu na mekim pren.

NEM: Michael Toadimi
KRISMAS: 16 (man)
ADRES: St Joseph Training Centre, PO Box 47, Kavieng, Nu Allan provins.
LAIKIM: mekim penpren wantaim ol arapela manmeri bilong narapela provins. Mi bai amamas long senisim ol poto na presen nabaut.

NEM: Jacob Peap
KRISMAS: 19 (man)
ADRES: Danny Trading, PO Box 129, Bialla, Wes Nu Briten provins.
LAIKIM: Tok pilai wantaim ol meri tasol, raitim pas long penpren na senisim ol poto wantaim ol penpren.

PNG FM PTY. LTD.
Trading as
NAU FM
and
YUMI FM

P.O. Box 774,
Port Moresby
Papua New Guinea
Ph: (675) 320 1996
Fax: (675) 320 1995

Gutpela taim i stap yet

WANPELA Redio Program i skulim ol meri bilong El Salvador long pasin bilong stretim gen sindaun bilong ol yet na famili bilong ol na samapim gen bikpela bruk kantri bilong ol i bin bungim long taim bilong woa.

"Mi tokim em long bungim ol samting bilong em na go, tasol em i no i go. Sapos olsem, orait kikim em i go ausait long haus."

"Yutupela i krangi... Ol meri i gat wankain rait olsem ol man, na ol man mas inspektim ol. Na meri i stap olsem tripela krismas wantaim man i gat wankain rait olsem em i marit pinis long dispela man."

Dispela em wanpela redio program bilong helpim ol meri na kamapim sampela gutpela rot long sindaun bilong ol meri long biktaun El Salvador insait long Latin Amerika.

Long wanpela redio program bilong ol meri, wanpela wokmeri i toktok hat wantaim bos bilong em long wok bikos em i gat bel. Em tok kros olsem bos i no inap long rausim em long wok taim em i go kisim malolo long karim bebi. Olsem na meri ya i holim bek wok bilong em na bos i no rausim em.

Insait long wanpela redio program tu, wanpela yangpela meri i raitim pas na i tok, "papa bilong mi i save paitim mama ogeta taim. Em i save paitim mi tu wantaim olgeta liklik brata susa bilong mi. Olsem na mi ting em i no moa laikim mipela". Ol toktok em isi, tasol toksave em bikpela samting.



• Ol meri insait long Mosbi siti mas long amamasim nesenel de bilong ol meri.

OL GUTPELA SAMTING LONG LAIP

Dispela redio program em ol meri bilong El Salvador i save kolim Bueno tiempos mujer... na dispela redio program i save kisim 30 minit. Drama ya i save kamapim ol stori, musik na ol arapela samting bilong kirapim bel isi na staim gutpela tingting i kamapim long ol meri long ol hevi ol i save bungim oltaim long famili na insait long sindaun bilong ol wanwan. Dispela tu bai helpim ol meri long kisim helpim bilong arapela taim ol i harim dispela redio

program. Ol sampela bikpela hevi ol meri i save bungim em; pait insait long haus, ol meri na yumen raits, helt na gutpela sindaun bilong ol meri insait long komyuniti em ol sampela samting we 40 redio stesin i save kamapim ol redio drama na pilai long en olgeta taim long skulim ol meri. Dispela program i kamap olsem wanpela rot bilong UNESCO Kalsa ov Pis Prorem bilong El Salvador long edukesen wok bilong en long bungim bek dispela sosaiti we i bin bruk nabaut bikos long 12-pela krismas woa.

Woa i bin stop long 1992 tasol ol manmeri insait long sosaiti i gat bel nogut na kros pasin i stap yet. Pasin bilong ol manmeri long arapela i gutpela tumas na sindaun gut na poroman wantaim arapela i bruk. Woa na bagarap long laip bilong ol manmeri i mekim olgeta lain i birua long arapela yet, maski woa i pinis.

Minista bilong Edukesen, Cecilia Gallardo i tok, "bikpela wok nau em, wanem kain rot bai yumi traim long stretim na senisim ol manmeri

long pasin na tingting bilong ol long arapela."

Olsem na wok bilong kirapim na apim gutpela samting long laip olsem long dispela kain redio program i kamap. Woa i bin bringim dai i kam klostu tru long laip. Long stap laip em bikpela astingting, ol aidia bilong mekim laip i gutpela i bikpela samting long kamapim.

Long dispela as, dispela redio drama o program i bin kamap na i sut long ol meri. Ol meri i namba wan lain bilong kamapim dispela bung wantaim gen. Ol i gat bikpela wok long stretim haus na famili bilong ol wanwan. Dispela gutpela wok bilong ol long haus na famili i ken go aut long komyuniti gen.

Namba olsem 60 meri i bin kisim nem long kamap olsem komyuniti kontek. Ol i kisim trening long yusim tep rekoda (redio tep) long kisim stori bilong ol manmeri na rekotim long redio bilong ol. Na ol i kamapim moa grup bilong ol meri na tim bilong ol i kamap planti. Ol i wok strong long kisim ol stori na wari bilong ol meri na putim kamap ol redio drama na program na wokim ol piksa bilong skulim ol meri na arapela tu. Insait long ol dispela wok bilong ol tu, ol meri i kamapim arapela program tu bilong skulim ol meri long ol rot bilong wok bung wantaim. Ol i lainim ol liklik wok bilong kamapim bisnis bilong ol yet na tu bungim dispela wantaim literesi trening o wok bilong lainim long rit na rait.

Dispela program i opim rot long ol meri i ken luksave long ol samting na hevi na ol i ken askim ol kwesten long sampela samting ol i laikim o i no laikim na putim moa tingting i go long kamapim gutpela wok bilong rausim ol tingting nogut na ol nogut memori bilong woa.

RICE

That's right





25th Anniversary



CAMBRIDGE CUP



25th Anniversary
CAMBRIDGE CUP

THE 1997 CAMBRIDGE CUP
BE PART OF THE RUGBY LEAGUE ACTION!





Bik Bro

REBO



OL POLIS SUTIM LIDA BILONG RASKOL...

FOX UNIT, KAR I GO LONG ROT BILONG YUPELA .. STAN-BAI!




EM KAR YAH TASOL!

YUMI GO!!



G*Z!?! OL POLS IKAM LONG WANEM HAP TRU Z!




OL RASKOL INO ISI LONG GIVIM SIKSTI.. MITA I GO DAWI 90 STRET...



WOW! LUKIM OL RASKOL GO!

BIHAINIM TASOL! BAIMI SUTIM TAIK BILONG OL!



AAARG! CRAASSH!!

SCREEEEECH

TASOL NOGAT.. KAR I LAIK TANIM KONA NA KAPSAT...

Igo moa Neks Wik!!



SIPAK MAIK



MAIK I STOKIM BILAK MAKET BIA BILONG SAUM..

EM NAU!



EM LUS TINGTING OLSEM OL POLS I PUTIM WAS LONG EM...

YUMI MUV IN LONG TAIM EMI SALIM BIA!



DISPELA TAIM MAIK INO CAT ESKILIS...

OH-NO!! MI PAIA PINIS!

GUT DE MAIK! HAU IS BISNIS!



MIPELA KAM SEKIM OL STOK-TEK YU KISIM NAU LONG MONING!

ER.. BOSS.. INAP YUPELA KAM LONG NEKS WIK?



OL INO HARIM TOK BILONG MAIK NA OL I GO INSAT NA SEKIMSTUA...

WEEYAKAH! SAPAI BILONG WAN VIA OLGETA YAH!



OKE, BOS! KAM NA RAUSIM OL KAGO LONG HIA!!

Igo moa Neks Wik!!

KANAGE

"Em nau, narapela wik bilong mi ken"



□ Wanpela taim Kanage i trikim meri bilong em olsem em i laik go raun painim abus long nait. Olsem na long 8 kilok nait, Kanage kisim spia na tos na lusim haus. Taim Kanage go ausait long haus, meri bilong em tu i sanap long dua na lukim em. Misis Kanage sanap lukluk i stap na em lukim Kanage i go long kona na haitim spia long bus na katim long narapela rot i go. Nau Misis i kisim save olsem i gat bikipela danis long ples na Kanage i laik mekim trik.

Misis Kanage tu i kirap bilas stail moa yet na em i go long disko ples. Taim em i go kamap, em lukim paps Kanage i sindaun laitim spia na smok i stap. Em nau Misis Kanage mekim trik na salim wanpela boi i go tokim Kanage olsem wanpela meri i laik danis wantaim em. Taim Kanage i harim dispela, em seksek tru na lusim hap spia istap na kirap i go na bungim meri ya. Misis Kanage i bilas stail moa yet na Kanage i no klia long em. Tupela danis i go na Misis Kanage i tokim Kanage, "bai mitupela tasol i danis olsem i go tulait. Noken danis wantaim narapela meri". Kanage harim na filings kukim lewa bilong em olgeta. Tupela danis i go na meri askim Kanage, "mi gat bikipela laik long yu tasol mi save olsem yu marit man ya". Na kwiktaim Kanage bekim na tok, "em bipo, nau mi singel ya, just love mi tasol".

Tupela danis i go na meri i tok long lukim Kanage gen long narapela taim. Olsem na em i go pas long haus na go giaman slip i stap. Klostu tulait na Kanage i go kamap wantaim spia na bunara bilong painim abus. Em nok na meri bilong em i kam opim dua. Em nau. misis i askim, "ol abus we?". Na Kanage tok, "sori taim nogut na ol abus i ronawe nabaut long mi." Em nau misis bilong em tok, "em orait, mi gel pren bilong yu olsem na yu bai trikim mi na maritim nupela meri bikos yu bruk marit pinis wantaim namba wan meri bilong yu a?". Meri i hatim em gen, "olgeta lapun i save isi long danis ya, tasol yu ya nogat, beksait bilong yu i mas sanap stret yet olsem na disko bilong yu i brukim tulait na trikim ol meri olsem yu singel man". Turangu Kanage kisim bikipela mama bilong sem nogut tru na i no go raun ausait inap wanpela wik olgeta.

Watson Watok
Sandaun

■ Kanage i bilong Buang na wanpela taim em i sik na i go long haus sik. Em i go sindaun long fom na wetim dokta long harim sik bilong. Tasol dokta i kirap na i go insait long opis na Kanage i sindaun wet tasol. Nogat narapela sikmanmeri i kam. Na Kanage wanpela tasol. Olsem na em wet longpela taim i go na em les. Nau em lukim olsem nogat man na em surik i go long fran na lukim sampela marasin. Em kirap na holim marasin bilong pekpek wara na ting olsem marasin bilong skin pen. Em kisim na rapim long skin bilong em na i go bek sindaun wetim dokta i stap. Taim dokta i kam bek, em smelim olsem sampela kain marasin i smel olsem na em askim, "sikman, wanem marasin i smel ya?". Na Kanage i tok, "dokta, nogat man long givim mi marasin olsem na mi yet kisim marasin bilong skin pen pinis". Dokta harim na bikmas na tok, "yu longlong, em ino marasin bilong skin pen, em marasin bilong pekpek wara".

Yasaptung Bullang
Buang, Morobe provins.

Raun wara i kamap na sevim planti pipel

BIPO bipo tru i gat tupela lain klen i stap. Tupela lain ya em Pawa Kobeya na lain bilong Pombo Wareya. Tupela lain ya i save stap na wokim bikipela gaden tru. Tasol long dispela taim, i nogat gutpela wara bilong dring o ol kaikai bilong gaden i ken kisim long groa.

Tupela klen ya i save stap gut na amamas tu. Olgeta taim ol i save amamas long wok bung wantaim long gaden na serim ol kaikai na samting.

Wanpela taim ol i pasim tok long wokim wanpela bikipela gaden. Long dispela gaden bai ol i planim ol kumu tasol.

Olsem na long narapela de, olgeta lain bilong tupela klen ya i sanap lain na stat long katim bus na ol diwai i go. Ol i wokim bikipela gaden tru na planim ol kumu long het bilong gaden i go daun long lek bilong en.

Ol i planim ol kumu pinis na ol i stat long brukim gaden ya i go long tupela hap. Wanpela sait em bilong Pawaw Kobeya klen na narapela sait em bilong Pombo Wareya klen. Ol i mekim olsem pinis na olgeta taim ol i save i go i kam long klinim na lukautim dispela bikipela gaden kumu.

Wanpela taim, olgeta manmeri bilong tupela klen yai go long klinim dispela gaden.

San i hot nogut tru na ol i mekimsave long klinim gaden i go i go na i no longtaim, ol i harim wanpela man i toktok. Ol i stop wok na putim ia long harim wanem samting tru i kamap. Ol i go klostu na harim wanpela nek i tok, "hap gaden i bilong yu na hap gaden i bilong mi". Ol i harim dispela nek tasol. Na man tru em nogat man i lukim.

Olgeta i pret nogut tru long dispela na ol i hariap long bungim ol samting na tekov i go bek long ples bilong ol na ol i stat long stori na kamautim olgeta kain kain stori na bilip nabaut long ol pasin bilong



kastam na tumbuna na ol kain spirit bilong bus nabaut.

Long moning, ol i salim wanpela strongpela man tasol i go bek bilong lukim sapos wanpela samting i kamap long dispela gaden.

Ol i salim sampela man i go na ol i hait na lukluk i go longwe long traim lukim sapos sampela samting i kamap. Ol i lukluk gut tru i go na kamap long dispela boda o namel bilong mak we i brukim gaden bilong tupela klen, ol i lukim wanpela raun wara i kamap. Ol i go klostu na lukim olsem

bikipela raun wara i wok long kamap na i kamap bikipela nau. Ol i kwiktaim i go bek long ples na stori long olgeta manmeri long dispela samting ol i lukim. Taim olgeta manmeri i go bek lukim, ol i traim long tasim, tasol nogat wanpela samting i kamap long ol. Ol i go insait na pilim gutpela kol tru na ol i traim long testing na i swit gut tru na i kolim gut bodi bilong ol tru.

Dispela nupela samting i mekim ol i amamas nogut tru na ol i pasim tok gen long lukautim gut dispela samting.

Na ol i mas serim gen wantaim olgeta lain yet bilong tupela klen wantaim.

Nau dispela raun wara i kamap na i stap na olgeta manmeri bilong tupela klen ya i save yusim wantaim.

Dispela wara i stap nau yet na i kamap bikipela bikos long stori bilong en. Ol i save kolim dispela wara nau em Bune long hap bilong Lepiti long lalibu Sauten Hailans provins.

**Bembo Maka
Is Taraka
Lae, Morobe provins.**

Mi laikim narapela pikinini tasol meri bilong mi bel yet



Dia Laipain,

Mi marit man wantaim tupela pikinini. Meri bilong mi i no bel gen, maski planti taim mitupela i slip wantaim.

Mi askim em wanem as tru long dispela samting i kamap na em i tok mama bilong em i laikim sampela samting long mi pastaim bipo em i larim pikinini meri bilong em i karim narapela pikinini. Mama bilong em i laikim mani na klos samting.

Mama bilong em i ken stapim em long gat bel long rot bilong pasin tumbuna tasol mi no bilip tumas long dispela.

NOT CONVINCED

Dia Pren,

Yu toktok gut wantaim meri bilong yu long kisim tingting bilong em long dispela samting? Em i laikim narapela pikinini gen? Ating em i laik malolo pastaim na lukautim gut tupela liklik pikinini pastaim bipo long em i bel long narapela bebi. Yu save soim meri bilong yu olsem yu gat bikipela tingting long gutpela sindaun bilong em na em no stap olsem samting bilong karim pikinini tasol? Namba tu pikinini bilong yu i winim pinis tupela kris-mas? Sapos nogat, i moabeta long yu i stap isi na wetim pikinini i bikipela moa bipo yupela i tingting long wokim namba tri pikinini.

Wanpela samting tu em meri bilong yu i mas wok long givim ol gutpela kaikai long yu na ol pikinini na em yet i no kisim gut kaikai. Dispela inap kamapim hevi long helt bilong em nastapim em long gat bel.

Gutpela sapos yu kisim meri bilong yu i go long haus sik o klinim bilong ol nes na dokta long sekim em.

Mama bilong em i givim em sampela kain marasin bilong stapim em long karim bebi? Ating meri bilong yu i pret nogut mama bilong em i wokim sampela kain puripuri long en. Pret pasin i ken stapim meri long karim pikinini.

Watpo na tambu mama bilong yu i askim long mani? Man bilong em i stap laip yet o em i gat samepla arapela pikinini man na meri bilong sapatim na lukautim em?

Em i gat gaden kaikai bilong em tu? Moabeta yu sindaun toktok wantaim meri bilong yu na ol brata susa bilong em long rot bilong lukautim em na lukim olsem em i kisim inap kaikai na klos. Narapela samting tu em yu pinis baim meri bilong yu o nogat? Sapos nogat tambu mama bilong yu i pilim olsem yu: gat dinau yet long stremit wantaim famili bilong meri.

I gutpela sapos ol arapela hauslain bilong yu i helpim yu na meri bilong yu i stremit dispela wari wantaim gutpela tingting.

LAIPLAIN

Wokim pablik toilet long Hagen siti

Dia Edita,

PLIS inap long yu givim mi liklik hap spes bai mi ken autim wari bilong mi i go long Wantok niuspepa.

Wari bilong mi i go olsem: mi wanpela grasrut mangi long Jiwaka tasol, taim mi i gat wok long Hagen na kam raun sampela taim mi save painim ples stret long go toilet. Tasol Hagen siti i nogat toilet olsem na mi painim hap liklik bus na tromoi

pipia. Bihain long mi kamaut long bus, ol sekyuriti bilong taun holim mi na sasim mi o bringim i go na lokim mi long sel.

Mi pilim dispela i no stret olgeta. Ol wokman meri ol i gat ples long go na rausim pipia bilong ol, tasol kain grass rut olsem mi i nogat ples. Olsem na mi singaut strong i go long Hagen siti kaunsel long glasim dispela hevi na mekim samting hariap. Sapos nogat pablik toilet, na ol pipel i go yusim bus, yupela i noken sasim o krosim na paitim ol. Asua i

stap long yupela. so editor plis yu mas lukim olsem em i wanpela bikpela samting.

Em tasol na tenkyu tru long harim na mekim samting long dispela bikpela hevi. Sapos yu husat i laik sapotim mi, rait i kam long Wantok niuspepa na bai mi ken ritim.

Tenkyu tru.

**Mi Frank Tusky Kusingin
Jiwaka grass ruts**

Apim pe bilong ol kampani wokman

Dia Edita,

Mi wanpela mangi long siks mail long Lae. Na mi laik autim wari bilong mi i go long Niugini Table Birds (NTB) kampani long Lae.

Stat long 1974 i kam long 1997, mi lukim olsem NTB i no hapim pe bilong ol wokman. Planti ol wokman meri i save komplem long pe bilong ol bikos ol i no amamas long en.

Tude prais bilong ol samting i go antap tasol NTB i no hapim pe tu bilong ol wokman. Moa yet, taim ol i save wok ova taim, ol i no save kisim gutpela pe.

Olsem na planti taim ol yangpela

meri i save wok liklik, malolo na bihain ol i go wok.

Ol kampani i mas save olsem ol wokman i lusim ples na i kam stap long taun na tu prais bilong olgeta samting long stoa tu i go antap.

Olsem na hapim pe bilong ol wokman na mekim ol wokman meri, i amamas long wok.

Em tasol wari bilong mipela ol wokman bilong NTB. Sapos yu husat i laik sapotim mi rait i go long *Wantok* niuspepa bai mi ken ritim.

Tenkyu na God i blesim yu.

**Yang. Singe
6-mile, Lae**

Givim wok plisman na ami long ol gret 10 sumatin

Dia Edita,

Mi wanpela mangi husat i pinisim Gret 10 na mi stap long ples. Mi bin westim bikpela mani long go kisim skol.

Tasol nau mi stap long ples na mi pilim olsem laik bilong mi i bagarap nogut tru. Olsem na mi laik autim displa wari bilong mi long Wantok niuspepa.

Mi gat wari olsem inap gavman i ken lukluk na stretim dispela kain lain husat i bin pinisim gret 10. Yupela i ken luk save olsem i gat kain kain hevi i kamap long taun. Sapos gavman i gat tingting yupela i ken helpim mipela. Wanpela we gavman i ken helpim mipela ol yut i pinisim gret 10 na i stap long ples o raun nating long taun em, kisim mipela long mekim wok plisman, ami o woda. Mi save olsem gavman i gat bikpela han long wokim dispela kain wok. Tasol i luk olsem gavman i apas yet long ol hevi bilong mipela ol lain i pinisim skol na i stap nating.

Tenkyu long harim krai bilong mipela ol grasrut mangi.

Cletus Waiu

Wokim pablik toilet long Kimbe taun

Dia Edita,

DISPELA wari bilong mi i go olsem watpo tru na Kimbe taun i nogat pablik toilet na olgeta manmeri i save wokabaut long taun na ol i save pilim hat long go pispis na pekpek.

Long dispela as, ol i save i go nambaut long luklik bus nambaut long taun na pispis o pekpek. Dispela i no stret.

Olsem na mi askim Kimbe taun kaunsel long glasim dispela hevi na mekim ol pablik toilet. Yupela i mas opim ai na lukim ol dispela samting. Noken slip tumas. Kirap nau na stretim wari bilong ol pipel long taun.

Sapos yu husat i laik sapotim o agensim pas bilong rait i go long Wantok niuspepa bai mi ken ritim.

Tenkyu tru na God i blesim yu.

**Sony Aipet
Kimbe**

Sapos yu laik raitim pas i kam long Edita, rait long dispela adres:
P.O. Box 1982,
Boroko, NCD.

Kisim ol grasrut long mekim wok

Dia Edita,

Mi wanpela mama Morobe na mi stap long Hagen. Komplem bilong mi i go long ol wokman bilong gavman long Hagen long 1997 nesenol ileksen.

Yupela ol wokman bilong gavman, yupela mas wokim wok bilong yupela na givim sans long ol grasrut bilong yumi long mekim wok bilong ileksen.

Em i no hatpela wok bilong mekim. Narapela komplem bilong mi i go long ol plis man long Hagen.

Yupela tu i wok long kisim ol wokman long wok olsem ol risev plisman.

Sapos yupela kisim ol grasrut na dropout long mekim dispela wok, mi no ting ol kain trabel olsem fait, raskol pasin o stil long taun bai kamap.

Olsem na opim ai na skelim wanem samting i wok long kamap. Em tasol na i wanem man o meri laik sapotim mi, yu welkam tasol.

**Glenda Taki
Mt Hagen-WHP**

Nogat lo long Ambunti

Dia Edita,

Mi bilong Ambunti na mi lukim olsem nau i nogat lo na oda long Ambunti. Bikos plis stesen komanda i mekim gut wok bilong em.

Em i slek tumas na olsem ol arapela plisman em i bosim i no mekim gutpela wok. Planti trabel i wok long kamap, tasol ol plisman i no mekim wanpela samting. bilong wanem tru na bos bilong ol plis i salim kain ol skin i dai plisman i kam long Ambunti. Mi askim bos bilong plis long Wewak long sekim ol plisman bilong em.

No gut lo na oda i go bikpela long Ambunti na bai yumi sutim tasol tok long ol man long ples. Asua i stap long ol plisman bilong Ambunti tu.

Em tasol wari bilong mi na sapos yu husat i laik bekim pas na sapotim mi o agensim em laik tasol. Rait i go long *Wantok* niuspepa bai mi ritim.

**Kosi Gama
Ambunti**

Ol Sandaun memba mas wok bung

Dia Edita,

Inap yupela givim mi spes, bai mi autim liklik wari bilong mi. Yes, wari bilong mi i go olsem.

Mi wanpela mangi long ples na mi laikim ol foapela open memba bilong Sandaun i mas wok bung wantaim Riginol Memba bilong mipela long Sandaun, John Tekwei bai mipela ol pipel bilong Sandaun bai lukim sampela senis.

Sapos yupela foapela open memba bilong Sandaun tok long sanap wan wan

em bai hat tru long yupela toktok long palamen na bringim wok kamap long wanwan ilektoret bilong yupela.

Wanpela tok mi laik tokim yupela em yupela mas wok bung wantaim riginol memba bilong mipela yet long Sandaun Mista Tekwei bai yupela lukim ol sampela senis i kamap. Sapos nogat bai nogat stret.

Em tasol mi amamas tasol long harim yu.

**Robert Wilson
Transmita Kamp
Vanimo, Sandaun
provins.**

Oposisen mas kisim gavman

Dia Edita,

Mi wanpela mangi long Menyamy insait long Morobe provins. Na mi laik tok olsem ol oposisen mas hariap na kisim gavman. Sapos ol i tok bihain na larim, i luk olsem gavman bai bagarapim olgeta samting.

Ol disisen we Praim Minista Bill Skate i mekim i soim olsem insait long 5-pela yia taim dispela gavman bai i no inap long ronim gut kantri long yumi. Olsem na mi laik bai oposisen i mas kisim gavman.

Em tasol liklik bel hevi bilong mi. Husat brata o susa i laik sapotim o egesnim mi rait tasol long *Wantok Nius* na mipela i ken lukim na sekim wantaim.

**Toby Apa Steven
Menyamy
Lae, Morobe provins.**

Noken yusim nem bilong bikpela long Kanage

Dia Edita,

Mi wanpela mangi bilong Lake Kapiago insait long Sauten Hailens provins tasol nau mi kam wok wantaim Christian Leaders Training College (CLTC) long Banz (WHP).

Mi laik sapotim pas bilong brata Kila Leswol, long Rabaul.

Long Ogus 7, 1997 mi bin ridim Wantok Niuspepa na mi bin ridim wanpela brata long Sepik i bin yusim nem bilong Bikpela na raitim kain kain fani o giaman stori bilong Kanage long *Wantok*.

Brata Amigo Kunaua, long Sepik, mi laik tokim yu stret olsem dispela God Papa, Jisas Krai na Holi Spirit yumi save lotu long en, ol i no pilai God o giaman God.

Em dispela God husat i wokim yu na mi. Olsem na sapos yu laik raitim stori bilong Kanage, orait i gat kain kain stori bilong yu yet long dispela graun na noken yusim nem bilong bikpela.

Na tu noken tok pilai long Holi Komunio bilong bikpela. Em samting bilong yumi olgeta ol Kristen ken kisim na tingim dai bilong bikpela bilong yumi, Jisas Krai, pikinini bilong God.

Em tasol na mi askim yu laik sapotim mi orait rait i kam long Wantok Niuspepa.

**Ben A Tolea
CLTC-Banz**

Upper Keram i nogat senis

Dia Edita,

Mi wanpela mangi bilong Upper Keram long Banaro. Nau mi laik autim bel hevi bilong mi.

Nau mi laik askim memba bilong Angoram, Arthur Somare wantaim papa bilong em Michael Somare long lukluk long mipela ol lain long boda, mak bilong Sepik na Madang.

Taim bilong tupela nau long lukim mipela ol bus manmeri. Hamas taim mipela putim Somare long kamap Riginol memba tasol i nogat wanpela gutpela samting i kam long ol ples bilong mipela.

Taim bilong kempen bai ol i kam na tokim mipela olsem sapos yupela votim mi, mi bai lukluk pastaim long yupela ol bus pipel kain ol lain olsem mipela i stap long boda.

Mipela nau sanapim pikinini Authur Somare. Olsem na mipela i putim olgeta tingting bilong mipela nau long tupela long bringim sevis long mipela.

Planti yia i go pinis ol nesenol memba bai raun long taun tasol. Na ol i no save kamlong ples long bod a bilong Madang na Sepik na lukim mipela. Bilong wanem na yupela save givim baksait long mipela.

Insait long planti yia i kam, mipela i no lukim han bilong Sir Michael.

Tasol long faipela yia i go pinis mipela i lukim liklik helpim long Peter Barter. Olsem wanem, Madang i lukautim mipela o Sepik i lukautim mipela? Kain ol skol olsem Toko, Wuseta, na Mui na helt senta Bunam na ol aid pos i nogat wokman na i nogat marasin.

Mipela bungim planti hevi olgeta taim.

Sapos gavaman bilong Sepik i les long lukautim mipela orait larim Madang gavman i lukautim mipela nau.

Tenkyu long harim wari bilong mi. Sapos yu laik bekim pas bilong mi na sapotim mi o agensim mi rait i go long *Wantok* niuspepa bai mi ken lukim.

**Benny Hygam
Ambunti, East Sepik provins**

Maski daunim gavman bilong Bill Skate

Dia Edita,

Mi wanpela grasrut mangi na mi stap long Kandrian long Wes Niu Britain provins.

Mi wok long putim hia long radio, lukim long niuspepa, we ol memba i wok long komplem na toktok planti long Bill Skate i kamap praim minista.

Dispela pasin ol i wok long mekim em i no gutpela. Yupela i mas save

olsem dispela gavman nau Bill Skate wantaim ol arapela lida i fomim em God yet i makim bilong ronim dispela kantri.

Taim 1997 ileksen i no kamap yet planti Papua Niugini manmeri i wok long prea na askim papa God long makim gutpela lida bilong PNG, na nau em God i makim pinis.

Na yupela ting olsem wanem ating God i mekim krangi pasin? Moabeta

yupela memba bilong wanwan ilektoret bilong PNG, yupela i mas tingting gut pastaim, na sanap proman wantaim na ronim dispela kantri.

Em tasol tingting bilong mi na yu husat i laik sapotim mi o agensim mi plis rait tasol long *Wantok* niuspepa na yumi ken skelim.

**Maro A Gala
Kandrian
West Niu Britain provins**

Putim kolta long rot bilong Vanimo

Dia Edita,

Mi wanpela mangi Sandaun na mi autim bel hevi bilong mi olsem. Ating bai yumi mas kolim Vanimo taun em dasti taun. Na yumi noken kolim Paradais ples. Moabeta yumi mas kolim Vanimo das ples. Yu ken lukim, das stat long Vanimo taun na i go inap long DPI stesin.

Na tu wankain olsem long Wes Kos rot tu. Tarangu ol manmeri na pikinini ol i kisim bikpela bagarap tru long das. Ating ol memba bilong mipela

mas dai pinis o? Olsem na ol i no moa lukluk long ol kainkain hevi i wok long kamap insait long provins. Mipela ol pipol i makim yupela i go long Mosbi long pulapim poket o makim yupela long bringim developmen long provins.

Em tasol liklik belhevi bilong mi. Yu husat i laik sapotim mi o egenisim rait tasol i go long Wantok Niuspepa na bai mi ken lukim.

Mista Thowai W. Wesley Vanimo, Sandaun provins.

Maski bagarapim ol lapun

Dia Edita,

MI no amamas long ol meri Ambunti husat i save salim bret plaua long Ambunti maket, bikos sampela taim ol pikinini i kisim sik long dispela ol plaua. Ol meri husat i save salim plaua, ol i no save rausim lang na ol i save sindaun antap long ol bret plaua.

Na tu i luk olsem taim ol man i no baim plaua bilong ol meri, ol meri i save kisim plaua bilong ol i go bek long haus, na long arapela de ol bai kisim dispela plaua i go long maket na salim. Dispela em i no gutpela pasin. Dispela kain pasin i save mekim na ol pikinini i kisim sik taipoid.

Plaua em wanem gaden kaikai bilong yupela a? "Sem tru".

Bilong wanem na yupela ol meri bilong Ambunti i save salim ol olupela paua.

Jackson Sau Ambunti

Stretim rot bilong Menyamya

Dia Edita,

MI wanpela mangi bilong Aseki Lokol Gavman Kaunsel insait long Menyamya Distrik. Mi laik autim bel hevi bilong mi long rot bilong mipela long Aseki na Menyamya olsem rot i bagarap na planti hul nambaut i stap.

Ol ka i no save ron gut na planti sevis i stop.

Mi laik memba bilong Menyamya, Thomas Pelika na Morobe Gavana Luther Wenge i mas putim sampela mani hariap long dispela yia long stretim rot bilong mipela.

Planti ka bilong kampani na ol PMV i save karim kopi na kaikai na man i go i kam long dispela rot. Plis ol pipel i votim yu. Yu mas traim long stretim hevi bilong ol pipel insait long Aseki Lokol

Levol Gavman Kaunsel na Menyamya Distrik. Em bikpela wari mi gat long em.

Sapos ka bilong kamapim na PMV i kilim man, em i no asua bilong ol dispela kampani o, PMV. Nogat. Em i asua bilong yu dispela gavman bilong Menyamya Distrik bikos yu no givim sampela mani bilong stretim rot bilong mipela.

Dispela em strongpela tok mi mekim bai memba bilong Menyamya i mas luksave long dispela. Sapos yu husat i laik bekim na sapotim o egenisim plis rait i go long *Wantok* niuspela bai mi ken ritim.

Smena Tameka Menyamya Distrik

Redio Morobe i sot long mani

Dia Edita,

Mi laik bekim pas bilong Michael Wosako i kamap long *Wantok Niuspepa* 24 Julai, 1997 na bilong Jimmy Wata, Wau Vokesinol Senta long 7 Ogas, 1997.

Yes, Mista Wosako na Mista Wata, mi laik tok amamas long wari bilong yutupela long redio Morobe i no save kraik gut. Kain pas olsem i ken givim mipela aidia na save long redio Morobe i kraik gut o nogat.

Mipela i kisim planti pas olsem i kam long ol lain i save harim redio Morobe long olgeta hap bilong Papua Niugini. Na ol tu i komplem long redio Morobe i no save kamap klia. Olsem na nau bai mi traim tok klia liklik long yutupela na tu ol arapela lain i save putim yau long redio Morobe. Wanem as na redio Morobe i no save kamap klia o i no save kraik gut. I gat planti as bilong wanem redio Morobe i no save kamap klia;

(1) Waia bilong salim toktok i go aut ol kolim long eriol. Sapos eriol i no gutpela bai signal o toktok i no inap kamap klia o redio bilong yu i no inap kraik gut. (2) Strong bilong masin bilong salim toktok, ol i kolim long transmita. Sapos pawa bilong transmita i no strong redio bilong yu i no inap kraik strong. Tasol nau yet redio Morobe i gat gutpela transmita. Pawa bilong em inap olsem 10 kilowats. (3) Ainospea, olsem lukluk long taim. Taim bilong ren, taim bilong san, kilaut i pas long skai, nait o de, ol dispela samting tu i save i go wantaim na redio i no save kraik gut. (4) Ples we transmita i stap long en wantaim eriol i ken bagarapim o daunim strong bilong redio. (5) Planti arapela samting moa i save bagarapim kraik bilong redio, sampela bilong ol mi kolim pinis.

Oke, wanpela rot tasol long stretim dispela hevi bilong redio em yumi mas i gat mani. Mipela long redio Morobe, i save long ol dispela hevi, tasol yumi i nogat mani long stretim na mekim redio Morobe i kamap klia olsem ol arapela redio stesen long kauntri. Mipela i go het na toktok wantaim ol palamen memba bilong yumi, tasol i nogat wanpela luksave long redio na kamap wantaim helpim. Wanpela memba tasol em long memba bilong Tewae/Siassi Mao Zeming. Sapos yumi i gat mani bai yumi i ken kisim ol saveman bilong stretim eriol long Mosbi i kam stretim na bai yumi i ken kisim klia redio Morobe, maus bilong Kundu. Bai mipela toktok yet wantaim ol 10-pela palamen memba bilong yumi long givim yumi mani long stretim hevi bilong redio bilong yumi.

Em tasol na tenkyu long ridim dispela bekim pas.

Kekalem M. Meruk Sinia Redio Opis Redio Morobe Lae, Morobe provins.



**National Heart Foundation
of Papua New Guinea Inc.**

***Lukautim lewa bilong yu
Smok kamapim moa sik long lewa***

!! Stop nau !!



***Yu inap pilim gutpela na lewa
bilong yu bai kisim gutpela win
bilong amamas.***

**NATIONAL HEART FOUNDATION OF PAPUA NEW GUINEA INC.
P.O. Box 158, Mount Hagen, W.H.P. Phone: 542 2199 Fax: 542 2384**



WANTOK PABLIK NOTIS

Sapo yu laik advertais, telepon 325 2500 na askim long

Miri Aiori Ext. 214
Jeffrey Maliou Ext. 215
Jack Mahuru Ext. 217


Hepi Betde

KARON HOJAO

I tanim kamap 2 pela Krismas, em i planti wei tumas long laip bilong yu. Tasol kain gutpela pikinini olsem yu kamapim hamamas na gutpela sindaun bilong famili na ol wantok.

Lav na kisis i kam long aunty NAOMI long Dauli Tisas Kolis long Tari. Natu gritins i kam long KOL PLES GOROKA, bik sis LYAN na SANDRA, Bubu ASO na TATA, uncle LINAX POL na BENNY, bro ALEKON na MORIS. Spesol wan i kam long PAPS na MAMS long MOSBI.

Lastly ol lain Wildlife long POM City.
**NENASARO
NAHANE - GOD
BLESS!**



FAX 325 5213 9152 2579

TOKSAVE LONG ROT BAI PAS

CURTAIN BROS (QLD) PTY LTD LAIK TOKSAVE LONG OLGETA DRAIVA BILONG POT MOSBI OLSEM. ROT NAMEL LONG WAIGANI DRAIV NA CAMERON ROT NA TU LONG ROT BUNG BILONG WARDS RANABAUT BAI PAS LONG TRAFIK I GO OLSEM LONG BOROKO STAT LONG SARERE 6 SEPTEMBER 1997 LONG 6 KLOK MONING NA STAP OLSEM SEVENPELA DE OLGETA.

OLGETA KA LAIK GO OLSEM LONG BOROKO MAS TANIM I GO LONG LEF HAN SAIT LONG CAMERON ROT.


NA OL KA I KAM OLSEM LONG BOROKO MAS DRAIV ISI ISI BIHAINIM WARDS ROT NA KAMAP LONG ROT BUNG.

OL KA RON ANTAP LONG WARDS ROT MAS TAINIM LEF NA I GO OLSEM LONG WAIGANI DRAIV TASOL.

CURTAIN BROS TOK SORI LONG WANEM KAIN PAUL PASIN BAI KAMAP LONG DISPELA TAIM BILONG ROT I PAS.

**BUY YOUR WEEKLY
WANTOK COPY!**

**50¢
Tasol!**



PNG BUSINESS

*Lukluk long September issue,
i kamaut NAU!*

Stori bilong niupela takis gavamen i laik wokim ol i kolim V.A.T.

Na nius bilong wok bisnis insait long PNG.

DISPELA OLGETA BAI KAMAP LONG SEPTEMBER PNG BUSINESS NIUS...

PROUDLY PUBLISHED BY WORD PUBLISHING COMPANY PTY. LTD.

More information

call 325 2500 or Fax: 325 2579



PAPUA NEW GUINEA FOREST INDUSTRIES ASSOCIATION (INC)

P.O. BOX 4037, Boroko. Phone: 325 9458 Fax: 325 9563

PAS I GO LONG GAVMAN, PAPAGRAUN LONG OL FORES RISOSES ERIA NA OL PAPAGRAUN KAMPANI BILONG OL

Toktok i go long husat:

Fores Indastri i save pulim ol ausait lain i kam insait long kantri long karim out ol wok bilong fores risoses we ol papagraun i givim i go long gavman, na wanem kain ol wok i kamap aninit long dispela bisnis i ken lukautim olgeta lain.

Long Gavman, ol kain helpim i save kamap olsem impot takis duti, long ekspot tax, perol tax na stedi gro bilong ekonomi na stedi rurel development na ol kain wokim long infastraksa na ol sevis i kam plong ol projek developmen long ekonomi.

Dispela kain ol helpim gavman i kisim bikos ol lain investa i putim mani long kamapim dispela wok, na ol helpim i go long ol papa graun aninit long agrimen bilong ol.

Ol papagraun, ol kain helpim em olsem ol i ken kisim wok, royalti moni, win moni bilong kampani bilong ol, na wantaim ol arapela liklik helpim. Nau aninit long Fores Mensemen Agrimen wok bisnis long timba bai kamap seken taim na ol nupela timba projek bai kamap olsem bikpela bisnis long bihain taim na go yet.

Ol dispela kain helpim i kamap bikos long hatwok bilong olgeta operatas.

Long Operatas, em bai i no inap kisim o wokim wanpela mani sapos bisnis i no gutpela. Sapos em i no kisim profit, bai i no inap mekim wok o strongim bisnis long kamap strong.

Sapos em i no wokim profit long ol invesmen, bisnis bai bruk, nogat profit na tu ino inap strongim bisnis.

Nau yet forestri sekta i kisim taim stret. Planti ol operata o papa bilong bisnis i no wokim mani na i min olsem ol bai ino inap wokim profit long wanwan yia o sapos nogat tupela o tripela krismas olgeta.

Olsem na gavman na tu papagraun tu bai ino inap kisim helpim ikam long ol dispela bisnis.

Sapos ol operatas i pasim bisnis bilong long ol, bikos long ol dispela kain hevi:-

- * royalti
- * primium paymen
- * VAT (ol i makim bilong em i go long 9 pesen nau)
- * senis long levy sistem i go bek long July 1996 na gavman na papagraun tu bai i kisim taim
- * nogat ekspot tax
- * nogat wok
- * nogat royalti
- * nogat sevis
- * nogat ekonomik developmen

Taim Fores Operatas i pas bikos ol bisnisman i mas stapim wok.

Gavman yet bai lusim bikpela mani stret long ekspot tax revenu taim bisnis i stop. Na tu gavman bai baim yet ol wokman bilong forestri.

Tasol ol yet bai painim olsem i nogat wok tu.

Wok bisnis bilong forestri em nambawan tru long PNG, long pipel long risos eria, na tu long gavman.


Ol hevi bilong mani i hatwok tru, na istap tasol long ol investa. Oltaim ol bisnis lain tasol i save karim hevi taim ol arapela lain i laik kisim tasol ol helpim o mani, maski ol i no mekim mani, na dispela i no gutpela tumas, na i no stret tumas.

Na long dispela tasol gavman na papagraun i mas save gut long wanem kain ol hevi bai kamap nau na bihain taim. Na i gutpela long tupela sait wantaim i mas skelim na larim ol bisnis i karim kaikai na dispela i ken helpim ol long gutpela taim na taim nogut wantaim.

Mipela i bin tromoi dispela toktok o askim planti taim na singaut nau long nupela gavman long senisim revenu sistem long kamapim nupela ekspot takis i wantaim long US\$ na rausim 70 persen ekses, na larim VAT long arapela 12 mun, na lusim tingting bilong levi asesement, na lusim tingting bilong nupela i prosessin takis long ol timba i wokim long PNG. Dispela bai helpim ol fores bisnis i kamap strong.

**Tok ikam long: Eksekyutif Komiti,
F.I.A**

* **bikpela ekspot takis level**



• Kaikai bilong win bilong ol. Lukim pasin bilong ol na yu yet i ken tingim.

Stori bilong pilaia

Nem: Peter Auwo

Niknem: Puta.

Hevi: 165 kilo

Longpela: 180 cm

Liklik ples: Emo-Kama

Provins: Isten Hailens.

Yu marit o singel? Singel

Yu mekim wanem kain wok? Mi stap nating.

Wanem taim yu stat pilai soka? 1988 (Junia divisen) wantaim Rapatona long Goroka.

Nau yu pilai wantaim wanem tim? Goroka United.

Yu pilai long wanem posisen? Mi save pilai olsem straika na sampela taim long wing long primia divisen.

Wanem arapela spot yu save pilai? Ragbi lig.

Feveret PNG pilai: Peter Koboni.

Feveret kosa: Augustine Tom (Goroka).

Feveret referi: Nelson Yamap.

Feveret Kaikai: Raise na tin-fish.

Feveret dring: Longlife milk.

Yu save mekim wanem taim yu no pilai soka? Lukim TV na go long muvi.

Feveret muvi: Kick Boxer


Feveret TV So: Walker Texas Ranger.

Wanem pasin yu save laikim? Disaplin na winim gem.


Wanem pasin yu no save laikim? Lus na taim tim i fofit.

Wanem driman bilong yu? Long pilai gut long olgeta gem na makim Goroka wande.

Yu tingting long mekim wanem bihain long 10-pela krismas? Pilai soka yet. Na sem taim stap olsem kosa.



• Siaman bilong Lae Bombers Jim Kari kisim K7,000 sek long Jenerel Brens Menesa bilong SP Holdings long Lae.



• Ol meri waliya bilong Lahi soka asosiesen. Nau yet ol i go pas long resis bihain long i nilim Asiawe 3-0 long las wiken. (Lephan) Trena bilong Bombers laik putim banis long han bilong Darby Joseph bipo long gren fainel pilai.



Ol pilaia i kirapim pait wantaim referi long Madang fainel

SIAMAN bilong Madang ragbi lig, John Jacob bai holim wampela judiseri miting sampela taim dispela wik na kamap wantaim wampela disisen long ol pilaia husat i save kirapim pait wantaim ol referi.

Long semi na gren fainel pilai bilong dispela sisen, ol pilaia bilong wanwan divisen i bin raunim ol referi na paitim ol. Tupela referi, Rueben Tropu' na Hubert Sipa i bin kisim taim long han bilong ol pilaia long dispela sisen.

Ol A-risev pilaia bilong Tarangau i bin paitim Tropu nogut tru bihain long ol i bin lus long fainel. Ol anda 17 pilaia bilong Brothers tu i bin holimpas Sipa na paitim em taim ol i bin lus long gren fainel pilai las wiken.


Mausman bilong referi Saia Kavora, husat i bin bungim wankain hevi bipo i bin tok olsem planti taim ol pilaia i save kirapim pait wantaim referi na ol i gat bikipela lis bilong ol pilaia husat bai fesim judiseri sampela taim neks wik. Em tok tu olsem long sampela taim, ol ofisel bilong klap i save tok nogutim ol referi. Olsem na em askim ol klap long disiplinim ol pilaia na ofisel bilong ol gut.

Em tok olsem i nogat wampela disiplin i stap long klap level olsem na hevi i wok long kamap bikipela long Madang.

Nau yet, Newtown Globe Trotters Panthers i bin rausim tiket bilong Nabasa Tigers long gren fainel bilong Madang ragbi lig resis wantaim 21-12 skoa lain. Pilaia meka bilong Panthers, Simon Jack i bin kamapim gutpela pilai long bringim ol manki bilong winim dispela taitel long namba tu dispela yia.

Hawks i bin winim Brothers long A-risev divisen na long anda 17 divisen, North Raiders rausim tiket bilong Brothers.

Wina bilong Anda 19 i no klia yet bikos i gat tok pait namel long Brothers, Panthers na Tarangau i no stret yet.



• Kepten bilong Hagen Eagles, Max Tiri flai antap tru olsem pisin taim ol rausim Bombers 29-10 long SP Inta Siti gren fainel.

Hagen Eagles brukim 7-pela yia driman

WATSON GABANA i raitim

MT HAGEN Eagles brukim 7-pela yia driman bilong ol las wik Sande taim ol winim Lae Bombers 29-10 long 1997 SP Inta-siti Kap gren fainel long Lae ragbi lig graun.

Eagles i no bin winim dispela kap inap sevenpela krismas olgeta. Taim SP Inta-siti resis i bin stat long 1990, ol i bin pilai insait long gren fainel tripela krismas. Em long 1990 i go inap 1992. Tasol dispela taim, ol i bin kam bek strong tru long namba tu hap taim ol i bin stap wantaim 10-8 skoa lain na karim dispela kap i go antap long Mt Hagen.

"Bihain long sevenpela krismas," kosa Simon Moi tok. "Mi nogat planti toktok. Dispela em histri bilong Westen Hailens provins."

Kepten na bek lowa bilong Eagles, Max Tiri i bin tok: "Mi no inap bilip olsem ol mangi bilong mi winim dispela kap. Mipela kisim sikspela krismas olgeta long karim dispela kap i go antap long Hagen. Nau hatwok na driman bilong mipela i karim kaikai."

Em tok olsem, pundaun na kraik.

Kosa bilong Bombers, Joe Katsir i bin tok olsem Eagles i gat planti eksperiens pilaia na ol i bin pilai gut tru.

"Mi gat planti yangpela pilaia. Ol i gat planti gutpela na eksperiens pilaia," Katsir tok. "Olsem na ol kam aut wina. Pilai i no pinis. Bai mipela traime gen neks yia," em tok.

Pilai i bin kamap long gutpela tingting bilong spotmansip. Dispela i bin kamap ples klia taim ol Bombers i bin tokaut olsem ol i lus bikos Eagles i bin pilai gut tru.

Stat long kik ov, tupela tim wantaim i bin kamap wantaim strongpela pilai tru. Ol salim ol fowet bilong tupela siksti i go insait long kompaun bilong birua klostu klostu. Mekim olsem i go na paia pawa winga bilong Eagles, James Kopps tas daun long arere bilong trai lain foapela minit tasol long kik ov. Kik bilong fulbek na men-ov-mets, Stanely Sukot i painim taget na ol Eagles i go pas wantaim siks points. I stap liklik, ol Bombers i mekim wampela paul pilai insait long teritori bilong ol yet. Sukot i kikim penalti gol na skurim skoa bilong Bombers i go antap long eit points.

Ol Bombers, husat wok long ran strong na traime long painim mak i no stap longpela taim long bekim dinau. Ol kamap wantaim tupela trai. Wampela long 21 minit mak long han bilong bek lowa, Tom Bill na narapela gen long 34th minit mak long han bilong Theophile Kehono long skurim poin i go antap long 10 points.

Taim ol kam bek long seken hap, Eagles i lokim difens bilong ol na salim bal i go i kam long putim foapela moa trai. Gutpela pilai bilong longtaim insait senta, David Gomia, huka Michael Temba, autsait senta Chris Itam na fulbek Sukot i bin tas daun long trai lain bilong ol Bombers long ranawe long bom bilong ol mangi Lae.

Sukot i bin kikim faipela gol.

Moa long 16 tausen manmeri i bin go long lukim dispela pilai. Kain ol bikman olsem, Gavana bilong Westen hailens, Fr Robert Lak, memba bilong Lae, Bart Philemon, ol bikman bilong kain kain kampani long Lae na bikman bilong PNGRFL i bin kamap long dispela taim long lukim dispela gren fainel.

Naispela gren fainel tru: McLay

MEYA bilong Lae siti aotoriti, Allan McLay i bin tok olsem, gren fainel bilong SP Inta-siti resis long dispela yia i bin wampela gutpela gren fainel ol sapota bilong ragbi lig i bin lukim.

I no bin i gat wampela bagarap na ol plisman i no bin westim wampela liklik taim bilong ol long traime stretim wampela hevi long dispela taim bilong gren fainel. Klostu 16,000 manmeri husat i bin stap long dispela taim long lukim gren fainel pilai namel long Lae Bombers na Mt Hagen Eagles. McLay i bin givim bikipela tok tenkyu bilong em i go long gutpela wok tru ol plisman i bin mekim long lukim dispela gren fainel i pinis wantaim nogat trabel. Em tok olsem sapos ol plisman i no bin stap, wankain hevi long las yia inap stat gen.

McLay tok, klostu 7 klok tasol ol manmeri i bin pulap yet long ragbi fil. "Yumi mas lukim 1997 gren fainel olsem wampela eksampel olsem ragbi i no bilong pilai na pait," McLay tok. "I bin tru olsem ol pilaia i bin putim kamap wampela strongpela pilai tru tasol dispela i bin soim gutpela spotmansip namel long wan wan pilaia," em tok.

"Mi bin amamas tru long lukim hau ol manmeri i bin sapotim tim bilong ol. I nogat wampela tok nogut ol wampela tin, ston o botel flai i go insait long fil olsem planti arapela gren fainel," McLay tok moa.

Bikipela lain plisman i bin stap long lukim olsem dispela pilai i ran gut na trabel i no ken kamap. Ol plis i bin stap long olgeta rot na banis we ol ting ol sapota i ken go insait na kirapim pait. Arapela plisman i bin go raunim ragbi graun long stat bilong pilai i go inap long laspela wisel na i go inap long biknait.

McLay i bin soim amamas bilong em tu i go long olgeta wok man bilong SP Holdings, ol bikman bilong Papua Niugini ragbi futbol lig (PNGRFL) na Lae ragbi lig long putim kamap gutpela kala long dispela apinun.

Bipo long pilai, wampela lain grup bilong Manus i bin putim kamap danis bilong ol we mekim olgeta sapota i no sindaun gut. Ol lain Is Nu Briten kwaya grup tu i bin go pas long naispela nesenel antem o singsing bilong yumi na ol sumatin na yut grup long Lae i bin karim traipela flek bilong PNG, we klostu karamapim hav bilong ragbi lig graun.



Driman bilong Eagles i karim kaikai

HAGEN EAGLES i slekim bom bilong Lae Bombers 29-10 long kisim dispela Inta-siti kap wantaim K14,000 win moni long gren fainel long Lae ragbi lig oval las wik Sande.

Driman bilong Eagles long kisim dispela kap i kamap tru. Na tingting bilong Bombers long holim kap namba tu taim i wara nating.

Ol mangi asples i holim ol kange 10-8 long hap taim tasol long seken hap. Ol Kanage i no marimari long ol asples na putim tripela trai long kisim 21 poin na larim B52 Bombers i no skoa. Ol Kanage i sapim akis na katim ol asples long mekim ol stail bilong ol.

Olsem na planti taim ol asples i paul taim ol i kisim bal i go long teritori bilong ol mangi Hagen.

Winga James Kopps i opim rot bilong Eagles taim em i skoa

long kona insait long 4 minit na man-ov-mets na fulbek Stanely Sukot i putim wanpela gutpela kik long kisim skoa i go 6 nil. I no long taim ol i kisim narapela 2-pela poin long wanpela penalti na skruim skoa i go antap long 8 poin.

Ol grin siti mangi i sem long karim nem nogut long asples bilong ol yet olsem na oli pasim tok na salim lok fowet Tom Bill long putim wanpela trai.

Replesman beklain Theophile Kehono i soim Wanpela stail bilong en tu na putim narapela trai. Kik bilong Eddie Mark i go insait na skurim skoa i antap 10-8 i go inap hap taim.

Bihain long ol Eagles i kisim strongpela tok long kosa Simon Mel Moi, ol i rausim olgeta hait tingting bilong ol. Senta David Gomia i setim Michael Temba long kisim narapela foapela

poin. Kik bilong Sukot i gutpela na skoa i go antap long 14 poin. Bihain Gomia i putim narapela trai na skurim skoa bilong i go 20-10.

Ol Bombers i traim olgeta rot long setim bom tasol ol i no inap. Fowet Wilby Brown na Peter Dai i painim hat long kalapim banis bilong birua. Resa mangi Robert Sio tu i i no inap wokim ol stail bilong em bikos birua bilong em Sukot i pasim olgeta rot.

Ol kange i holim ol asples long banis bilong yet. Long dispela taim Gomia i kisim wanpela fil gol na bihain Chris Itam i putim wanpela trai long kisim skoa i go 29-10 long pasim olgeta wok.

Ol mangi long Kanage kantri i kisim SP kap na K14,000 win moni na ol mangi grin siti i luk sore wantaim K7,000.



Buko helpim Magani long winim Hawks

MAGANI bai pilaim Tarangau insait long gren fainel kwalifaing gem dispela wiken. Tenk yu i go long olpela Kumul fulbek, David Buko.

Anman bilong Pot Mosbi Vipers, David Buko putim kamap wanpela strongpela pilai tru las wik Sande na helpim Magani long winim Hawks 18-16.

Buko, husat i bin stap risev long i bin go insait long fil bihain long 15 minit bihain long kik. Em i bin karim mejik bilong em i go insait long fil na helpim ol manki Magani long putim kamap wanpela strongpela pilai na winim Hawks.

David i bin setim wanpela trai na em yet i bin tas daun tupela taim long namba tu hav bilong pilai.

Kain strongpela pilai bilong em i mekim na em i bin kisim men-ov-mets awod long pinis bilong pilai.

Magani i bin stap damblo wantaim 6-10 skoa lain long hav taim. Tasol taim David i kam insait long pilai, em sensim olgeta stail na plen bilong ol boi Magani. Em kamap wantaim sampela strongpela pilai na setim ol beklain bilong em long

skoalim tripela moa trai long namba tu hav. Dispela win bilong Magani i putim ol i stap long mak bilong pilai wantaim maina primia, Tarangau long gren fainel kwalifaing gem dispela wiken.

Hawks, husat i bin stap long mak bilong winim dispela pilai i bin abrusim sans bilong ol taim, Noel John i bin misim wanpela penalti gol long ai bilong mak stret. I no long taim i go pinis, em i bin kikim wanpela gol long serrhap. Tasol long dispela taim, kik bilong em i no bin painim mak na dispela i mekim tim bilong em lusim sans bilong ol long pilai insait long gren fainel kwalifaing pilai.

Buko i bin mekim wanpela gutpela muv long setim senta, Colin Geno we em i bin karim bal i go klostu long trai lain. Tasol strongpela difens bilong ol manki Hawks i bin stapim em. Taim Buko kisim bal long han bilong Geno, em bamim tupela

fowet bilong Hawks pundaun na em slip antap long trai lain. Dispela hatwok bilong Buko i putim Magani i go level wantaim Hawks long 10 poin.

Gutpela kik bilong faiv-eit,

Larry Saea i kisim taket na long namba wan taim, Magani i go pas wantaim 12 poin.

Tairi pilai i go gut, wanpela gutpela sans bilong Magani i bin go wara taim kepten Gerega Vaira i nokim bal i go fowet.

Tupela tim wantaim i bin misim planti gutpela sans bilong tupela. Long stat bilong pilai long fes hav, Hawks i bin gat tupela gutpela sans long skoa. Tasol dispela tu i no bin kamap gut.

Tasol long pairap bilong laspela wisel, Magani wokabaut i go aut long fil wantaim amamas. Bikos long dispela wiken, ol bai pilai wantaim Tarangau. Bihain long dispela pilai, ol bai save husat bai i go wetim gren fainel.

Pilai namel long Paga Panthers na Hasting Dearing Defence i no bin kamap bihain long ol Brothers pilaia i bin sindaun insait long fil. Ol Brothers i bin komplin olsem, Defence i no sapos long win bikos Lipirin Palangat i no sapos long pilai wantaim Defence.

Nau yet, dispela hevi stap long han bilong Pot Mosbi ragbi lig bod. Ol bai stretim olgeta toktok sampela taim dispela wik.



• Dispela yangpela boi Mendi Lupi Hungi em wanpela dai-hat sapota bilong Hagen Eagles. Las wiken em i go long Lae long lukim gren fainel namel long Eagles na Lae Bombers wantaim pisin bilong em. Foto: Watson Gabana.

Royals bai bungim Yunitek long Morobe yunien gren fainel

BUSTIN ANZU i raitim

BISMAK Marines Royals bai brukim bun wantaim Yunitek dispela wik Sarere long Morobe ragbi yunien gren fainel long Skaram ovel. Yunitek i winim Bratas long las wik Sarere long go insait long dispela fainel.

Tupela tim wantaim i gat namba long biklain na fowet. Na tu tupela wantaim i gat ol eksperien pilaia i stap olsem na bai tupela strongim banis bilong ol. Ol bai no inap long givim spes long narapela long putim trai.

Olpela pukpuk na nau pilaia-kosa bilong Bismark Marines Royals Roger Somo i tok olsem ol bai plenim displa gem olsem wanpela gem nating we ol i save pilai long en. Em tok olsem ol beklain bilong ol na Yunitek i wankan, tasol ol fowets bilong en i gat pawa liklik. Ol man olsem Peter Wapuan, Tomack Josephath, Anthony Agi na Somo yet bai gat planti weit long mak na namel beklain em kepten na Pukpuk veteran Kevin Vitolo, John Asimda, Philemon Hulo na Tau Leo bai lukau-

tim. Ol bai traim long yusim ol stail we ol i bin prektisim long taim bilong trening tupela wik i go pinis.

Yunitek tu i gat man wankain strong olsem Royals i stap. Pukpuk veteran David Tiki na Aiem Pilakos bai lukatim ol sumating long presa gem i olsem wanem. Kepten John Kinit bai helpim Tiki long fowet long ol kain samting olsem rak na maul. David Kamilus na Clyde Diuvia bai helpim Pilakos long beksait na wokim planti kiks.

Las taim ol sumatin i winim dispela kap long 1992 na nau ol i ran insait long fainel olsem na ol i les long dispela hatwok bilong ol i lus nating. Ol bai karim olgeta haus lain long Kempas i kam long rausim bom bilong ol plisman

Ol mangi long Bumbu Barracks i no laik bai trening bilong ol i lus nating. Long olgeta yia, ol i save go long gren fainel na lus. Olsem nau ol i redim ol samting bilong pairapim ol sumatin i stap na ol i no wari ol i laik wokim samting stret tasol. Wanem tim i pilai strong long pes wisel na strongim kona bilong em i go inap laspela wisel bai amamas wantaim pinis bilong pilai.

Mosbi redim tim long pilaim Kwinslen Cowboys

TRENING bilong wanpela kombain sait long pilaim Kwinslen Kaubois i stat pinis long Lyod Robson ovel. Dispela kombain tim i bihainim wanbel bilong PNGRFL na NRL long kamapim wanpela resis tasol neks yia.

Ol pilaia husat save pilai insait long Pot Mosbi Vipers na Capital City Cowboys i bin bung wantaim na kamapim wanpela tim ol kolim ol yet, olsem Hiri Moale Lakatoi bai pilaim Kwinslen Cowboys husat save pilai insait long Supa lig resis long Australia.

Ol bai pilai long bikpela selebresen bilong Hiri Moale Festival long Septemba.

Ol boi husat nau trening long pilai insait long dispela pilai em: Beks; David Buko, Lipirin Palangat, Robert Volu, Aquila Emil, K. Tete (Vipers), Zackery Kipsy, Geroge Kele, Joe Kenosi, Joe Rema, Obert Batia (Cowboys)

Fowets: Kera Ngaffin, Leonard Tarum, Francis Pegu, Chris Lome, Ahi Paru, (Vipers), Billy Eki, M Marney, Fred Leo, Peter Wembri, Dominic Rema (Cowboys).

Adrian Genolagani bai stap olsem het kosa, Gaius Kula olsem asisten kosa. Jimmy Peters eim trena na Michael Wilson na P Wagi bai stap olsem tim dokta.



Ol Brothers pilaia sindaun insait long fil na stapim pilai

OL PILAIA bilong Brothers ragbi lig klap long Mosbi las Sande i bin sindaun insait long Lyold Robson ovel long stapim wanpela A-gret gem namel long Defence na Paga Panthers. I nogat gutpela toktok i kamap yet wanem taim bai tupela tim ya bai pilai.

Long Tunde dispela wik, West ragbi lig klap tresera, Newton Morimai i bin tokaut olsem Palangat i bin regista wantaim ol long April dispela yia.

"Siknesa bilong Palangat i stap long rekot buk bilong West klap," Morimai tok. "Tasol em i no bin pilai wanpela gem wantaim klap stat long taim em i bin sainim nem bilong em wantaim West."

Tresera Morimai i tok olsem long wanpela taim long stat bilong dispela sisen, Palangat i bin kam lukim A-gret kosa bilong West, Hoada Kouoru na givim nem bilong em. Olsem na West ragbi lig klap i bin baim K25 rejistresen fi bilong em long PRL.

Ol Brothers i bin straik bihainim wanpela komplek pas bilong ol las wik, we bod bilong PRL judiseri i no hariap long bekim. Long dispela komplek pas, ol Bothers i bin tok olsem winga bilong Defence, Lipirin Palangat i no sapos long pilai wantaim Defence. Ol tok olsem Lipirin i bin rijista wantaim West na i no Defence. Brothers i bin mekim dispela komplek taim ol i bin lus long Defence tupela wik i go pinis long husat bai stap long namba seven ples. Long dispela taim, Palangat i bin pilai wantaim Defence.

Ol i bin komplek long Pot Mosbi lig judiseri olsem Palangat i rejista wantaim tupela klap wantaim. Olsem na em i no kwalifai long pilai ragbi long dispela sisen. Na tu em i no sapos long pilai long wanpela bilong tupela tim.

Tasol ol Defence i tok olsem Palangat i bin regista wantaim ol na i no West olsem ol Brothers tok.

Judiseri i bin tokaut olsem Palangat i bin regista wantaim Defence na i no wantaim West olsem ol Brothers i bin tok. Olsem na ol i bin brukim komplek pas bilong ol na tromoi i go.


Tasol ol Brothers pilaia i no bin wanbel long dispela na ol i bin sindaun insait long fil taim pilai namel long Defence na Paga laik kik ov.

Presiden bilong Defence, Oscar Oksap i tok olsem em i gat olgeta rejistresen pepa bilong Palangat i stap wantaim em we i soim olgeta samting olsem, Lipirin i bin regista wantaim Defence na i no West.

Tasol presiden bilong Brothers, Robert Akunai i bilip olsem em i gat olgeta pepa long soim olsem Palangat i bin regista namba wan taim wantaim West na i no Defence long stat bilong dispela sisen.

Dispela hevi nau i stap long han bilong Pot Mosbi ragbi lig bod long kamap wantaim wanpela disisen.

Nau yet, Paga Panthers i wet tasol long pilaim husat tim i winim dispela, kot long maina semi fainel neks wik.



Fit man..

• Andrew Norman snta bilong LBC Bombers kisim John Jacobi Medel awod olsem wanpela strongpela na gutpela pilaia long dispela sisen long han bilong namba tu siaman bilong PNGRFL, John Numapo.

Tarangau i go insait long narapela gren fainel

WANPELA strongpela ragbi lig salens bai kamap taim foapela taim sempion A gret tim Tarangau bai go ap agensim maina primias Brothers long Goroka Ragbi Lig gren fainol kompetisen long Danny Leahy pilai graun long Goroka dispela wiken.

Brothers husat i winim pinis maina primiasip taitel tupela wik i go pinis i bin pilaim Tarangau gem long midwik gem las Fonde na ol boi woda i tanim tebol long ol wantaim 16-9 taim na i go ap stret long gren fainol Brothers i drup bek na pilaim Tigers las wiken we ol i daunim Tigers wansait long i gat rait long bungim Tarangau gen long gren fainol salens dspela Sande.

Brothers i dastim Tarangau long maina primiasip pilai, na Tarangau bekim bek dinau long maina semi fainol pilai las wiken. Tupela tim wantaim i levolim skoa pinis na long dispela Sande husat tru bai autim dis-

pela primiasip taitel? Save i stap long tupela tim wantaim Brothers husat i gat planti ol nupela na yangpela pilaia long lain ap bilong ol bai i go insait long pilai graun olsem anda doks.

Long planti ol sisen i go pinis Brothers i bin pilai i kam antap long semi fainols, tasol long dispela mak ol arapela tim i save makim ol i go daun na ol i no bin sanap na pilai insait long gren fainol inap dispela sisen.

Ol yangpela pilaia bilong Brothers olsem Peter Walok, Kevin Kombonari, Michael Moseh, Paul Elisha, Lawrence Tatsin na Gise Paul i no gat eksperiens long pilai insait long gren fainol, tasol wantaim gutpela tingting na stail bilong ol long pilai we i lukim ol i kamap na winim maina primia taitel ol i ken nekim na rausim trausis na taitel tu long han bilong Tarangau. Ol dispela pilaia i gat gutpela save na fom long pilai na stail bilong ol

long pilai i save kamapim planti paia woks na sapos. Brothers i ken yusim gut ol dispela pilaia, ol i ken daunim Tarangau na kamaut wantaim bikipela win.

Long sait bilong Tarangau, ol i gat ol eksperiens pilaia olsem Fatty Buka, Andrew Mao, Malum Oiyufa, David Nul, Ivan Mosoka na Omae husat i bin pilaim pinis ol gren fainol salens long ol sisen i go pinis we i lukim ol i lidim ol arapela yangpela pilaia long winim ol gren fainol pilai na primiasip taitel.

Buka, Mosoka, Mao na Oiyufa i gat moa eksperiens bikos ol i representativ pilaia bilong Lahanis na sapos ol i yusim ol dispela inta siti tektiks na stail, ol i ken kamap wantaim primiasip win namba 5 na mekim histori insait long buk ov rekot bilong Goroka ragbi lig asosiesen.

Mei da bes tim win.

Kembris Kap resis bai bungim ol PNGRFL na NRL klap

WATSON GABANA i raitim

OL PRIMIA klap bilong PNGRFL na NRL afiliat asosiesen bai salens insait 1997 cambridge Kap resis. Dispela wanbel i bihainim toktok bilong tupela siaman bilong PNGRFL na NRL long kam bung wantaim na kamapim wanpela ragbi lig resis tasol neks yia.

Tupela ragbi lig asosiesen long Papua Niugini, PNGRFL (Supa Lig) na Nesenel Ragbi Lig (ARL) bai kam bung wantaim neks yia na statim wanpela resis tasol. Tupela asosiesen wantaim i lus tingting long kain kain tok pait na kros bilong tupela na laik kamapim wanpela resis tasol neks yia.

Long wanpela tok tasol, siaman bilong PNGRFL, Kevin Murphy na siaman bilong NRL, Tau Peruka tokaut olsem tupela asosiesen laik bung wantaim na kamapim wanpela bodi tasol long lukluk na glasim gutpela ron bilong ragbi long kantri bilong yumi. Tupela siaman wantaim i bin tok olsem dispela bruk i bin daunim tru ragbi lig pilai long kantri longpela taim tru na laik bagarapim olgeta. Olsem na ol laik lusim tingting long dispela olgeta samting na kam bung wantaim.

Long dispela rot, wanpela sponsa tasol i ken sponsorim tim bilong yumi long i go pilai insait long bikipela ol tonamen long ovasis.

Long dispela tupela yia, tupela asosiesen wantaim i no bin ran

gut. I bin i gat planti bagarap i bin kamap long menesmen na tu long klap level insait long wan wan provins. Olsem na long dispela rot bilong bungim tupela asosiesen wantaim, bai olgeta i ken wok bung na kamap wanpela strongpela tim bilong kantri bilong yumi long pilai insait long wol kap salens long neks yia.

Peruka na Murphy i bin pasim tok olsem ol bai kamapim wanpela bodi tasol long kisim olgeta asosiesen long kantri i kam bek na pilai wantaim. Ol bai lus tingting long olgeta pasin birua bilong ol long dispela yia na lukluk long kamapim wanpela strongpela resis long neks yia.

Long soim olsem dispela toktok bilong bung wantaim i no mauswara tasol, tupela siaman wantaim i bin pasim tok pinis

olsem dispela yia Kembris kap bai pulim ol tim bilong NRL na Supa lig long kantri i kam pilai wantaim.

Nau long belo, bai PNGRFL lousim Cambridge Kap kempen bilong ol long Gateway Hotel. Long dispela taim, ol bai tokaut long husat husat tim bilong NRL na Supa lig long PNG na bai bungim het.

Olgeta menesmen bilong dispela nupela bung-wantaim resis bilong neks yia bai kamap bihain long wanpela miting sampela taim neks mun.

Stail bilong makim ol pilaia bilong yumi i go insait long Kumuls tim tu bai sens. Dispela olgeta samting bai kamap bihain long nupela menesmen i kisim ofis sampela taim neks mun.



Junia Simanu bai traim strong long Mauten Jon soka tonamen

JUNIA Simanu, husat i bin winim Mauten jon soka tonamen tupela yia long ples Kasangan long hap bilong Erap insait long Morobe provins bai traim long holimpas dispela taitel, taim moa long 15 tim bungim pes long Insii insait long Makam Veli long Independens wiken. Tonamen bai kik ol long Septemba 12 i go inap long 17.

Dispela tonamen i bringim moa long 15 tim long sampela mauten ples insait long Nawae, Kaiapit na Nahu Rawa distrik bilong Madang na Morobe provins. Ol tim bilong dispela tripela distrik bai i kam bung long ples Insii insait long Makam Veli na pilai insait dispela namba wan Mauten jon soka sempionsip long Independens wiken. Ol tim bai kam olsem long Erap long hap bilong Nawae na Naiko insait long hap bilong Madang long bung wantaim ol tim bilong Ufim insait long Makam het wara long dispela tonamen.

Man husat i go pas long dispela tonamen, Bobby Michael i tok olsem eitpela tim long hap bilong Nahu Rawa (Raicoast) na tupela tim bilong Erap (Nawae) bai bung wantaim ol tim bilong Ufim insait long Makam Het Wara long dispela tonamen.

Ol ples insait long Ufim olsem; Lankuwam, Samula, Insii, Malaboi, Yanuf na Beo i redim pinis tim bilong ol long kik insait long dispela bikpela tonamen.

"Mipela tingting long bungim olgeta yangpela insait long mauten eria bilong Morobe provins long kam na pilai wantaim," Gibani Kidabing wanelpa boi husat i go pas long dispela tonamen i tok. "Mipela laik traim long kamapim wanelpa asosiesen bilong mauten eria insait long Morobe provins. Ol ples stap insait long Erap, Waeng, Wantoat, Ufim na Yarus," em tok.

Dispela resis i bin stat tupela krismas i go pinis.

Long 1995 na 96, ol boi Junia Simanu bilong ples Beo insait long Makam i bin go pilai long ples Kasangan insait long Erap na winim taitel tupela taim. Na tu long las yia, tripela tim bilong Ufim i bin go long Wawiwi insait long Nahu Rawa (Raicoast) long wanelpa bikpela tonamen. Long dispela taim, ol i bin pasim tok long holim wanelpa tonamen na bungim dispela tupela resis wantaim.

Olsem na long dispela yia, ol pasim tok long bungim dispela tupela resis wantaim na laik kamapim wanelpa pilai tasol. Olsem na Bobby wantaim ol ekseyutiv bilong em i bin kamap wantaim dispela tingting long holim tonamen long Insii long Independens wiken.

Sempion tim bilong dispela tonamen, Junia Simanu i kamap pinis wantaim tupela tim long pilai insait long dispela tonamen. Ol i bin winim dispela resis tupela taim pinis. Tasol long nau, ol bai bungim sampela strongpela salens i kam long tim bilong Wawiwi, Insii, Lankuwam, Samula na Erap.

Junia Simanu i bin brukim tim bilong ol i go tupela hap: Ol mangi husat i stap long tim wan em: Zawa Morombi, Bingiding, Kidabing, Timothy Yasaptung, Morom Bingmalu, Yakip Giob, Ngayaeng Josiah, Boma Opa, Sapu Yambutau, Lukas Gidion, Kokop Matrus, Ambrias Opa, Morombi Nugana, Lazarus Babu na Sogewe Sakai.

Tim tu: Gibani Kidabing, Bobby Michael, Marongo Giwisa, Mathew Yasaptung, Yasipsa Matrus, Embut Morombi, Siome Opa, Kipalip David, Banda Gideon, Gibson Raboni, Rex Babu, Martin Dingo na Kephayalamu.

Ol referi stapim fainel bilong LFA

WATSON GABANA i raitim

OL REFERI i bin stapim fainels bilong Lae Futbol Asosiesen las wiken taim ol lukim olsem bikpela gras i karamapim fil na tu pilai graun i nogat mak.

Instrakta bilong LFA referi asosiesen, Nelson Peka i bin tok olsem tim bilong ol meri na fes divisin sapos long pilaim fainels bilong ol las wiken. Tasol dispela i no bin kamap bikos, bikpela gras i karamapim fil. Na tu ol i no makim lain long pilai graun we

Nelson na arapela ol referi i no laik statim pilai.

Faopela tim bilong meri; Jaura, Blue Kumuls, Bara na Goro i bin kamap long pilai graun long moning taim tru. Ol i bin redi gut tru long pilaim fainel bilong ol. Tasol taim ol kamap long fil, ol lukim toksave antap long banis olsem ol referi i kanselim olgeta gem na skurim i go long dispela wiken.

Olgeta tim i no wanbel tru. "Mipela westim moni na taim bilong mipela long kem na redim mipela yet long dispela fainel," Desi Ross, president bilong Bara soka klap i bin tok. "Ol i no laik

toksave hariap long mipela, na mipela westim nating taim na moni bilong mipela long redi long dispela fainels," em tok.

Tasol, Nelson i tok olsem dispela wok bilong lukautim fil i no wok bilong referi. Dispela em wok bilong ol ekseyutiv bilong LFA na ol sapos long redim fil na long taim yet.

Nelson tok tu olsem em salim tok i go pinis long olgeta klap olsem dispela wik bai i nogat pilai. "Mi salim toksave long las wik Fonde yet," em tok. "Ating ol i no bin salim tok i go i kam olsem na ol paul nabaut," Nelson tok.

Olgeta fainel bilong meri na fes divisin klap long LFA bai stat neks wik Sarere. Long dispela taim, ol bai stretim pilai graun na redim olgeta ples. Tasol, tupela tim bilong ol meri; Bara na Blue Kumuls bai redi long i go pilai long nesene klap sempionsip long Madang. Olsem na ol tok bai skurim fainel bilong ol i go bihain long nesene klap sempionsip.

"I luk olsem mipela i no inap pilai hariap long dispela fainel bilong LFA, bikos mipela mas redi tu long i go pilai long Madang," kosa Bob Barry i tok.

Bogia soka tonamen pulim planti tim

HENRY MORABANG i raitim

LADEN Soka Kap tonamen long Almami Lokel Gavman hetkwata bai kirapim bikpela das Independens De.

Dispela soka tonamen i pulim tim i kam long Madang, Karkar, Mt Hagen, Mendi, Goroka, RaiKos, Manam Ailan na tu ol lain long Yawar Lokel Gavman Kaunsil.

Siaman bilong tonamen Ignatius Zorromotta i askim husat tim laik stap long dispela kik resis i mas bai K300 nominesen fi. De bilong nominesen bai pas long dispela wik Fraide, namba 5 de bilong mun Septemba.

Em i tok planti tim i soim laik tasol ol ino baim yet nominesen fi. Ol i ya em Kamado (Aidibal viles), Brothers (Milalimuda viles), Vitos (Dugumor stesin), Kuri (Kaukambar viles), Laden 1 (Busip), Laden 2 (Uligan viles), Maru (Suaru Viles), Damugani (Bari viles), Ivar-tudera (Apengan viles), Bugakawa (Dugulaba viles - Manam Ailan), labu 2 (Abaria viles - Manam Ailan), labu 2 (Tabele stesin - Manam Ailan)

Zorromotta i tok ol arapela tim husat bai kam olsem long Karkar Ailan, Goroka, Mt Hagen and Mendi, Not Kos and Raikos em: Lilo (Karkar Ailan), Kilden (Karkar Ailan), Aigob (Karkar Ailan), Karar (Karkar Ailan) Kwinin (Saidor), Pangpang (Saidor) na Mirap (Not Kos Rot) Kalibobo (Goroka), Kalibobo (Mt Hagen) and Royals (Mendi)

Arapela bikpela samting tu Zorromotta i tok ol asples stat long



• Goroka Kalibobo i olupela sempion bilong Laden Soka kap.

Dugumor stesin na i go kamap long Moap bai lukautim ol wanwan tim. Hia em nem bilong tim na wanem viles ol bai stap long en; Damugani bai stap long Widaro, Ivar-tudera (Dugumor), Bugakawa (Tobenam), Lilo (Dalua) Kilden (Dugumor), Aigob (Milalimuda), Kwinin (Kabak), Pangpang (Banara Skul), Mirap (Daigul), Uligan (Banara Skul) Katox (Kabak) Kalibobo Goroka (Milalimuda), Royals Mendi ((Suaru)

Zorromotta i tok Kalibobo tim bilong Goroka em sempion tim bilong las yia. Em i bin salensim Brothers tim bilong Milalimuda na win 3-2.

Ol arapela toktok i kamap, Zorromotta i putim strongpela tambu

long ol rejista bilong bilong Madang Soka Asosiesen long joinim ol arapela tim long dispela tonamen. Em i autim dispela tok bihain long wanelpa bikpela pait i bin kamap long 1995 we ol biknem soka pilai bilong Madang i bin paitim sinia referi bilong Paul Marika.

Em i singaut tu long ol arapela pipel bilong Almami Lokel Gavman kaunsil i stap long arapela hap bilong kantri long joinim dispela soka tonamen. Dispela tonamen em bilong bungim olgeta pipel long pilai soka.

Zorromotta i amamas tru olsem ol lain Kalibobo tim bilong Hagen an Goroka i joinim Laden Soka Kap.

Kundiawa bai paia long Hailans soka tonamen

YAKAM KELO i raitim

BIKPELA soka tonamen bilong hailans rijon bai kukim Kundiawa tau long dispela wiken. Dispela soka tonamen bai pulim ol tim bilong ol manmeri i kam olsem long Wabeg, Mendi, Hagen, Wapenamanda, Kutubu, Pangia, Goroka na Kundiawa.

Dispela rijinol soka tonamen bilong hailans i save kamap olgeta yia na i save bungim olgeta hailans soka senta wantaim.

Long las yia, Goroka i bin autim taitel bilong ol man bihain long em i bin dro wantaim ol manki Wabeg. Tupela i dro long poin tasol Goroka i win long gol everis we Goroka i bin skorim planti gol long tonamen. Olsem na Goroka i bin sempion bilong dispela tonamen long las yia.

Long sait bilong ol meri, ol susa bilong Wabeg i bin autim tiket na karim taitel bilong ol meri i go antap long Wabeg. Dispela wiken bai ol i laitim paia gen long holim bek dispela taitel bilong ol.

Ol meri long Wabeg bai bungim sampela bikpela salens i kam long ol lain susa bilong Hagen na Goroka long dispela wiken. Tasol ol meri Wabeg i gat planti gutpela pilai na ol smok balus olsem Christa Egari husat i bin wokim nem bipo long PNG tim bilong ol meri, Mitchel Apea, Fosi Mekeo na Mirriam Yapao na yangpela Betty Gaya.

Long kik bilong ol man, bai dispela i bikpela salens tru bikos olgeta tim i redi gut pinis na ol bai givim bikpela salens long winim dispela taitel.

Long dispela yia, tupela tim bilong ol man i kam long Kutubu na Pangia. Tupela i nogat tim bilong ol meri bikos dispela i namba wan taim bilong tupela long stap insait long dispela hailans rijinol soka tonamen.

Tupela bikpela kampani, Will PNG bai helpim dispela tonamen wantaim olgeta tropi na ol sil bilong givimaut long ol tim na pilaia husat i win long dispela tonamen. Na Coca Cola kampani i givim K1,000 long ol komiti bilong tonamen long yusim. Olsem na komiti bilong tonamen bai skelim dispela mani long prais mani na

givim i go long ol tim na pilaia husat i kamapim ol gutpela risal long dispela tonamen.

Tonamen bai stat long Fonde tude na pinis long Sande dispela wik.

I gat bilip olsem bai bikpela lain manmeri tru i pulapim soka fil long Kundiawa long dispela wiken na bai i gat bikpela sapot na nois tru long ol sapota na ol manmeri long tim bilong ol.

Hailans rijinol soka tonamen em wanelpa bikpela soka tonamen em i save kamap olgeta yia aninit long lo bilong Papua Niugini Futbol Asosiesen (PNGFA) long kirapim na strongim soka insait long provins na rijon.

Dispela soka tonamen i wok long groa bikpela bikos em i wok long pulim sapot na moa interes long arapela hailans senta long joinim na pilai. Ol sampela hailans soka senta olsem Wapenamanda, Kutubu, Simbu na Pangia i no save stap insait long ol soka resis long bipo. Tasol nau dispela spot tu i wok long pulim laik na interes long ol dispela senta long join na pilai tu.

Uni memeim bratas long semi fainol bilong Morobe Ragbi Yunion

LAE YUNITEK i rausim Bratas 10-nil long go insait long Morobe Ragbi Yunion Gren Fainol na bai pilaim Bismak Marin Royals long dispela wik Sarere long go graun fil.

Samting olsem 10 minits i stap yet na i bin gat wanelpa pait insait long fil na gem ino bin pinis. Tasol i luk olsem gem ol i givim igo long Unitek.

Dispela em wanelpa strongpela gem we tupela tim wantaim igat namba long fowet na beks. Olsem na pes 20 minits ino bin igat skoa.

Uniteck igat ol eksperiens playia olsem David Tiki na John Kihit (Kepten) long holim ol rak na mau. Ol beklain em veteran pukpuks Aiem Pilakos, David Komilus na Clyde Diuvia i kirapim das long pinisim olgeta wok. Ol tu i bin gat weit na spit wantaim.

Bratas tu i wankain tasol oli nogat hevi bilong pulim birua long taim bilong rak. Ol fowet olsena tok namba 8 Jimi Agais, Joseph Mas long prop na break away Paulus Bak i sot win long sapot. Bek lain tu, aninit long kepten John Kavali long hapbek, Andy Tatil long sentas na lan Murphy ino pinism tok long painim ol liklik spes. Olgeta taim biura i bungim ol. Unitek i les long westim taim. Olsem na ol fowet i pasin tok na rausim bal long beklain na ol i kik. Kamilus i lukim dispela bal na bihainim igo na silip antap long bal. Oli lid long 5 poin bihain long kik bilong Kamilus ino gutpela na haptaim.

Seken hap, tupela tim bilong ol sumatin long Yunitite i tingting strong long kisim dispela kap. Olsem Yunitite i tingting strong long kisim dispela kap. Olsem na tupela tim wantaim i palailait stret.

PMSA SOCCER DRAWS

Week Seven
 Saturday, September 6, 1997.
Sir John Guise 1
 Time Div Fixtures
 8.30 U19 Hoods vs Defence
 9.45 U19 Blue Kumuls vs Kurti-Andra
 11.00 U19 Pom United vs Ela United
 12.15 W2 PS Rutz vs CT. Kings
 1.30 W1 Defence vs Bommers
 2.45 1st Buresong vs Bommers

SJG 2
 9.45 RP2 Tarangau vs Togelu
 11.00 W2 Pom United vs Blue Kumuls
 12.15 RP2 Rapatona vs Pepsi Momase
 1.30 RP2 Babaka vs Keweh
 2.45 RP2 Wata United vs Defence
 4.00 2nd Kenmore vs Chauka

Bisini 1
 8.00 2nd Cyclone vs Wata United
 9.15 W2 Naniu vs Bomana BK
 10.30 W2 Cyclone vs Tawala
 11.45 2nd Togelu vs Fairdeal
 1.00 U19 Sobou vs Tarangau
 2.15 1st Adu vs PS Rutz
 4.00 Prem Blue Kumuls vs Momase

Ground B2
 8.00 U19 Guria vs Momase
 9.15 W1 Uni vs Normads
 10.30 U19 Uni vs Rapatona
 11.45 W1 Sobou vs Tarangau
 1.00 1st Simla vs Wanzesi
 2.15 Prem Guria vs Ela United
 4.00 Prem Kurti-Andra vs Defence
 Byes: 1st: Normads

Sunday, September 7, 1997.

Ground SJG 1
 9.00 U19 Guria vs Hoods
 10.15 U19 Pom United vs Kurti-Andra
 11.30 U19 Sobou vs Momase
 12.45 RP1 Uni vs Ela United
 2.00 RP1 Kurti-Andra vs Bommers
 3.20 2nd Cyclone vs Kenmore

SJG 2
 9.00 U19 Tarangau vs Ela United
 10.15 RP1 Normads vs Blue Kumuls
 11.30 W2 Morata United vs Naniu
 12.45 W2 GFC vs Tawala
 2.00 W2 Keweh vs CT. Kings
 3.20 RP1 CT. Kings vs Guria

Ground B1
 8.00 U19 Uni vs Defence
 9.15 W2 PS Rutz vs Blue Kumuls
 10.25 First Keweh vs GFC
 11.35 W1 Telikom vs Wanzesi
 12.45 1st Pom United vs Eastenders
 2.30 Prem Kurti-Andra vs Momase
 4.15 Prem Uni vs Hoods

Ground B2
 8.00 2nd Toring vs M. Gaindu
 9.15 W1 Guria vs TST Stars
 10.25 U19 Blue Kumuls vs Rapatona
 11.35 W2 Pom United vs Bomana BK
 12.45 Prem Tarangau vs Ela United
 2.30 Prem Sobou vs Guria
 4.15 Prem Rapatona vs Babaka

Byes: 1st: Normads
Note: Ela United and Kenmore will play double up games starting this weekend and play their catch up games the following weekend.



• Ol susa bilong Bara Soka klap long Lae. Ol bai i go pilai long Nesanel Klap sempionsip long Madang long Independens wiken. Fran l-r: Freda Yamis, Edna Thomas, Julie Yakum, Margaret Pakau, Desi Ross (presiden bilong klap). Namael: Henrica Amele, Jenny Atu, Barbara Tongias. Baksait: Susan Watpore, Sandy Wilbert, Helen Nesepe, Erica Mani, Teri Tupiap na Wanting Yagum.



• Ol pilaia bilong Lae Bombers i bilas na redi long pilai.

LAHI SOCCER ASSOCIATION DRAW

WEEK 23

Sik Stadium
 6/9/97
 Time Div Fixtures
 0800 U19-1 Morobe United vs Sobou
 0915 W2 Lae Biscuits vs Eastern Star
 1030 U19-1 Bugandi vs Sunstriders
 1145 W1 Asiawe vs Unitech
 1300 W1 Elcom vs Waliya
 1415 W1 Sobou vs Unitech
 1600 P1 Guria vs Asiawe

07/09
 0800 U19-1 Telikom vs Elcom
 0915 W1 Rapatona vs Sunstriders
 1030 D2 Eastern Star vs Dal Labu
 1200 D1 Lae Biscuit vs Gee Otton
 1400 P1 Rapatona vs Elcom
 1600 P1 Telikom vs Sikambu

Uni 1
06/09
 1100 D2 Bugandi vs Kalam United
 1230 P2 Telikom vs Sikambu

1400 P2 Rapatona vs Elcom
 1530 P2 Sobou vs Unitech
07/09
 1100 D2 Sunstriders vs Kurti-Andra
 1230 D2 Suten Blues vs Mungkas
 1400 P2 Guria vs Asiawe
 1530 P2 Rapatona vs Sikambu

Uni 2
06/09
 1100 U19-1 Rapatona vs Milne Bay United
 1215 U19-2 Defence vs Gee Otton
 1330 D1 Wullet vs Milne Bay United
 1530 D1 Mungkas vs Northwest United

07/09
 1100 U19-1 Bugandi vs Unitech
 1215 U19-1 Sunstriders vs Asiawe
 1330 P2 Unitech vs Elcom
 1500 D1 Sunstriders vs Muna

Ground 3
 Sat 06/09
 1100 U19-2 Lae Biscuit vs Sikambu
 1215 U19-2 Guria vs Mungkas

AUSTRALIAN RUGBY LEAGUE SEMI FINALS

FRIDAY
 Illawarra v Gold Coast

Saturday
 Norths Sydney v Sydney City

Sunday
 Newcastle Knights v Parramatta

SUPER LEAGUE RUGBY LEAGUE SEMI FINALS




Saturday
 Brisbane Broncos v Cronulla Sutherland

Monday
 Penrith Panthers v Canberra Raiders



• Waliya tim bilong ol meri insait long Lahi soka resis.

WANTOK SPOT



Marcus Bai brukim rekot long Ostrelia

HENRY MORABANG
i raitim

WANPELA pilaia bilong Kumul bai kamap namba wan man long pilai insait long ragbi lig fainol bilong Ostrelia Ragbi Lg.

Nem bilong pilaia em Marcus Bai. Bai i save pilai wantaim Gold Coast Chargers tim long Queensland, Ostrelia.

Bai i bin joinim Chargers bihain long tim bilong em long Inglan, Hull i nogat mani long lukautim ol ovasis pilaia.

Em i joinim ol boi long Gold Coast Chargers i traim tasol Ilawarra i wawaim stret ol. Boi nogut Marcus Bai i wok long givim

siksti i go i kam tasol em i nogat pawa long daunim biknem pilaia bilong Ostrelia, Paul Macgregor.

Bai i kamap namba wan PNG pilaia long pilai long fainol bikos ol arapela bipo i no bin pilai olsem em. Tim bilong ol i lus, tasol tim bilong Bai i stap long fainol ya.

Ol pilaia i pilai long Ostrelia bipo em Steve Malum (Balmain Tigers), Bal Numapo (Canterbury Bulldogs), Dairi Kovae (Norths na Newcastle) na Arnold Krewanty.


Aquila Emil i stap wanpela mun tasol wantaim North Queensland Cowboys. Em i nogat namba stret long fainol ya. Stail bilong ragbi lig long Ostrelia i winim tru stail bilong ol arapela kantri olsem Nu Silan na Inglan.

I tru olsem Stanley Gene tasol i winim ol arapela pilaia long pilai long gren fainol. Em i pilai long Hull Kingston Rovers long Nambawan divisen long Inglan Ragbi Lig.

Planti ol rita i no save i mas amamas bikos Marcus Bai i kamap gutpela spotman tru em i strongim tru nem bilong em olsem na em i makim Rest Of The World tim.

Insait long wanpela ripot bipo, em i skelim sampela tingting olsem sapos yu mekim liklik straf o sakrifais em bai yu inap win.

Marcus Bai yet i laik kamap gutpela pilaia olsem na em i mekim bikpela sakrifais na em stap yet long Ostrelia.



• Marcus Bai.

PMSA tokorait long Ela United statim pilai gen

WATSON GABANA i raitim

POT MOSBI soka asosiesan disapaneri komiti i bin tok orait long Ela United i statim gen pilai long dispela wiken. Taso sapos ol i no pinisim ogeta fi bilong dispela sison, ol i no inap pilai nek ya.

Siaman bilong PMSA Mark Kelep on tok aut olsem ol disapaneri komiti tok orait long Ela United i pinisim ogeta pila bilong em long dispela sison. Ol mekim dispela disisen bihain long ol ukim olsem PMSA i gat loapela gam tasol i stap bipo long fainols. Disem na ol i no laik long rausim wanpela tim na dispela bai bagrapim dro na poin tabel.

Mipela plim disem hain bilong fainols i kam klozu. Disem na mipela tingting long outim Ela United i go bak long pin, Kelep tok. Taso dispela i no man olsem ol i no inap baim fi bilong ol. Ol mas baim ogeta substading fi bilong ol. em tok.

PMSA i bin saspandim Ela United fainols wik i go pins, bihain long ol pinim aut olsem ol i no bin baim ol referens na afiliasan fi bilong ol. PMSA i bin pasim tok tu long rausim morose na arapela tes divisen stap olsem long, DFC na Kenmore. Taso dispela ol tim i bin baim ol fi bilong ol olsem na ol statim gen pilai bilong ol las wiken.

Long ming bilong disapaneri komiti long Mande dispela wik ol i bin pasim tok long bihain bak Ela United i kam long PMSA rola. Long dispela fainol na ol tim tok orait long Kenmore bar statim gen gen bilong ol.

Long ol arapela gam, Ela United na Kenmore i no bin pilai Kelep tok olsem ol bi dabel ap long ovasis wiken. Taso em tok bai ol i no inap givim poin long ol genis ol bin abutan tim ol stap long saspandim.

Kelep i bin tok tu olsem long wanpela apul asosiesan ming (AGM) bilong PMSA sampela tim dispela mun em bai avain dispela stap long pasim tok na apul poin bilong kamapim hapel em. Em ol ovasis tim nat i stap na pila foto PMSA mas kamapim pibana mekem na inap olsem ol i no man long streching stap.

Ol tim dispela kamap wantaim streching na long pasim hapel ol stap i no man hapel fi bilong long ol long stap ming em. Kelep tok. Disem na ol morose long wawan hap na statim gen ogeta fi bilong ol pila na inap afiliasan hapel bipo long nek ya em i laik ya.



Lukaut long ol susa... • Ol susa bilong Morobe Patrol Post, Jaura nau wok long kirapim das long Lae soka resis. Baksait (L-R) Purni Mano, Telly Dawa, Stacey Banabas, Wawasai Kiwai, Manige Peoga, Magili Tapugo na Sesia Seba. Fron (L-R) Sioti Mano (menesa), Sarah Magane, Salome Zewai, Kokopai Muyu, Woge Manu, Apetia Bui na Kosa Muyu Pono. Foto: Watson Gabana.

You get much more than in a 285ml bottle!

In this great new 500ml BOTTLE for only K1.00

THIS MUCH MORE

ALWAYS RIGHT SIZE RIGHT PRICE RIGHT SHAPE

K1 NEW

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.